

يحظر بيعه للرجال



أبو عبدو البغل

تعويذة شففتشي

ندى ترك



ندى ترك

تعويذة شفّثي

إهداء

شكراً بابا.. د. م رجائي ترك..

علمتني فن الاستمتاع بالحياة..

شكراً ماما.. م. أميرة احمد..

علمتيني فن تقبل الآخر..

شكراً زوجي الحبيب أحمد قاسم.. ربنا يديمك نعمة..

شكراً أحمد ترك ومحمود ترك.. ديزاينرز حياتي

شكراً هبة الصيفي.. شكراً منة على رفقاء الطريق

شكراً لكل فنان صفحة شفتشي.. كل لايك وكل كومنت وكل دعوة

حلوة كانت سبب في ظهور كتاب شفتشي منكموا.. وليكوا

المقدمة

٤
٢

إحنا ماجيناش الدنيا عشان نعمل نفس اللي عملوها هالينا
بالظبط من غير ما نغير أي حاجة ونعيش نفس مشاكلهم..
إحنا جينا هنا عشان نحط «ال touch بتاعنا»

إحنا اتضحك علينا.. جيل كامل من البنات ضحكوا عليه
وخلّوه يعيش «جوة الصندوق» المقفول بعيد وما يصحش ولازم
والمفروض..

جيل كامل كان «عايش ومش عايش».. طلعوننا رجالة
وشايلين مسئوليات مش بتاعتنا.. نسينا أنوثتنا ولبسنا الجينز
والكوتشي.. بس إحنا كبرنا وعرفنا إن «كيدكس عظيم» وإن
«المسيطر اقتصاديًا» مسيطر سياسيًا فاشتغلنا ووصلنا لشغلانات
جيلنا بس اللي وصلها.. إحنا غيرنا من نفسنا زي ما بنغير
«الأسنان اللبينة»..

واكتشفنا إن «تعليم السواقه» سهل وبقينا بنسوق مسافات
ووقت أطول من سواقين التاكسيات أنفسهم.. وبنعمل بنفسنا
«صيانة العشر تلاف»

ضحكوا علينا لما قالولنا إن معرفة الناس كنوز.. واحنا كبرنا
واكتشفنا إن فيه علاقات «فيها سُم قاتل» بتهلكنا نفسياً وبتبعِدنا
عن سلامنا النفسي وال «Inner peace»

«سنة أولى جواز» ماطلعتش أحلى سنة.. ده إحنا خدنا سنين
عشان نوصل لـ «الكتالوج» بتاع الرجالة اللي كانوا مخيينه علينا
وماحدش قالنا إنهم من كوكب تاني أصلاً..

ضحكوا علينا لما قالولنا إن الحب من أول نظرة هو الحب
الحقيقي.. ومقالولناش انه شوية «دوبامين» زيادة ويروحوا الحالم..
وانك عشان تختاري «فتى أحلامك» صح وتتدبسي عند
«المأذون» لازم الأول تتخيلي حياتك «من ورا القدام» وشوفي
هيبقى جد حنين وأب قوي وزوج مثالي ولا لأ وبعدين وافقي
إنه يبقى خطيبك دلوقتي..

وضحكوا تاني لما قالولنا قناعاتهم اللي «ما أنزل الله بها من
سلطان» وفرضوا علينا فكرة إن «الرجالة كلهم زي بعض»
و«أقرب طريق لقلب الرجل معدته»

ضحكوا علينا لما قالولنا إن مفيش «الزرار» اللي هتدوسي
عليه عشان «تغيري العالم» وإننا لازم نرضى بقليلنا ونستسلم
ونبقى نموذج للست «قليلة الحيلة» وإن أحسن طريقة لـ «فن
الطلب» إنك ماتطلبيش حاجة أصلاً.. عشان ما يقولش عليك
«غيورة ولا مادية».

من «أيام ثانوي» وإحنا مستنيين «بكرة» نكبر لحد ما كبرنا

وهربنا كلنا من الواقع الأليم، وقررنا نعيش حياة موازية على الـ «فيس بوك» عشان يبقى لينا رأي وموقف وأصحاب وناس جديدة.. بقينا نجوم بجد بس جوة بروفايلاتنا.. بقى الواقع هو «الضيف» الثقيل اللي مستتينه يروّح عشان نرجع لعالمنا تاني.. عالم مافيهوش مايصحش تلبسي «الأحمر العنابي».. ومايصحش البنّت تبقى «ماهاش مزاج».. عالم مافيهوش «ماري منيب» اللي بتطلعنا كل شوية تقولنا هنفرح بيكي إمتى ومافيش حاجة جاية في السكة ولآ إيه..

عالم افتراضي fake.. بس بيدينا إحساس إنه كله «تحت السيطرة» وكله «في قبضة يدي».

بس مع الكتاب ده هتعرفي إن زي مادخلناه بمزاجنا نقدر نخرج منه ونعيش زي ما احنا عايزين في أي حنة.. وفي أي وقت.. وانتى ١٨ وانتى ٣٠ وانتى ٥٠ سنة تقدرى تبتدي من تاني.. وتعيشي من الأول..

نقدر نبعث عن «أكبر مصدر للطاقة السلبية».. ونهرب من كل الأفكار والمواريث اللي أفقدتنا معاني الأنوثة وحشرتنا في أدوار مش بتاعتنا.. توّهوا الحقايق وضاع مننا مفهوم الحقوق والواجبات.. جيل كامل اتربى بصور مشوهة.. و«طاعية عمياء» لمواريث جاهلة ومقتنع إن «هذا ما وجدنا عليه آبائنا» جيل فاهم إن الحياة الزوجية كلها قيود وابتلاءات والشاطرة اللي تصبر.. بس الواقع إن الحياة الزوجية ربنا خلقها لنا عشان نستمتع بيها.. لو انقلبت لنقمة يبقى تقصير منّا وعدم فهم

لدورنا ومسئولياتنا وحقوقنا.. وده كان سببه الإعلام والتربية
الخاطئة والرسائل المجتمعية الهادمة..

ده مش الأول ولا هيكون «النداء الأخير».. بس دي دعوة
على هيئة كتاب أنشوي من الدرجة الأولى اسمه «شفتشي»..
ممكّن تعبيره «تعويذة» لفك «الظلم» وشفرة الحياة الزوجية
والاجتماعية والمشاكل اللي بنقابلها في حياتنا.. واللي بين الأقواس
ده أسامي مقالات الكتاب اللي هتقروه دلوقتي.. الكتاب
باختصار عبارة عن دعوى نتعلم فيها حقوقنا وواجباتنا ونسترد
فيها أنوثتنا.. دعوة نتعلم فيها إزاي تبقى نفسك وإزاي تبقى
زوجة وأم أو إزاي تبقى «القوة الناعمة» اللي بتحرك المجتمع..
إزاي عن طريق أفكارك اللي في دماغك ومعتقداتك الصحيحة
ممكّن تغيري الكون وتوصلي لأحلى عيشة وأحلى حياة.

ندى توك

كل حاجة هتقريبها في الكتاب ده..
كل معلومة.. كل نصيحة.. كل فكرة
هي عبارة عن وجهات نظر.. توقعات.. أو خبرات
سابقة لناس مختلفة تتحمل الصواب أو الخطأ.. وده
ببساطة لأن مفيش حاجة اسمها «الحقيقة المطلقة»، ولا
«الصورة الكاملة»

الفصل الأول

الحياة.. بأعلى جودة

«بإمكانك أن تعيش الحياة.. أو أن تعيش الحياة ألف مرة»

«عمر طاهر»

هي الحياة حلوة فعلاً.. ولأ آهي عيشة والسلام؟

إحنا ممكن نعيش ألف مرة بجدزي ما قال عمر طاهر
كده.. ولأ الحياة صعبة والعيشة مُرة والدنيا مش مستاهلة
أصلاً؟

في الدنيا ناس عايشين أحلى عيشة.. وناس عايشة ومش
عايشة..

طيب ده حظ ولأ نصيب ولأ شطارة متنا..

الموضوع مالوش علاقة بالماديات.. ياما ناس على أد حالهم
وعايشين بجد أكثر من ناس تانية كثير..

عشان حياتك تبقى حلوة بجد ماتضيعيش وقتك ومجهودك
وتحاولي تظبطيها من بره بس..
في فرق بين الرفاهية والسعادة..

العربية والشقة والماركات مش بييجيوا سعادة..

العريس والفرح مش بييجيوا سعادة..

عشان توصلي لسعادة حقيقية ماتعتمدش على أي مؤثر خارجي،
ولا حتى زوجك وأولادك، لو استنيتي السعادة تجيلك من برّه مش
هيقى مصدر دائم هيقى مصدر مؤقت وهيتغير بتغير الظروف
اللي بتمري بيها، ببساطة مش هتقدري تسيطر على سلوكيات
زوجك وأولادك وأصحابك عشان تحافظي على مستوى السعادة
اللي يمنحوها لك.. ولا هتقدري تسيطر على ظروفك المادية
طول الوقت عشان تضمني منسوب الرفاهية اللي في حياتك..

الطريقة المثالية اللي تخليكي تعيشي أحلى عيشة هي إنك تدوري عليها جواكي .. تجيبيها من أعماق معتقداتك وأفكارك .. طول ما الأفكار اللي بتدور في دماغك إيجابية وطول ما عنيك شي شايقة الحاجات الحلوة .. مشاعرك هتبقى إيجابية وحياتك هتبقى حلوة ..

- طيب اللي عايز يعيش أوي ويستمتع أوي يعمل إيه؟
إزاي ممكن أغير حياتي للأحلى؟

- عشان نستمتع أوي بحياتنا عايزين نعيشها بشكل أعمق ..
نعيشها 3D مش أبيض وأسود والصورة مهزوزة ..
عايزين نعيشها بجودة أعلى ..

دي أول خطوة في طريق البحث عن جودة الحياة أو «quality of life»
كل ما زاد مستوى جودة حياتي كل ما زاد إحساسي بالسلام
النفسي والرضا والسعادة ..

كل ما زادت جودة حياتي كل ما زاد مستوى إشباع رغباتي ..
وعشان أقيس مستوى الجودة في حياتي لازم في الأول أقيّم
جوانب حياتي ..
علاقتي بنفسي:

علاقتي بنفسي شكلها إيه؟ بحبها؟ بدلعها؟ براعيها وألبي
احتياجاتها؟ ولا بقسو عليها وبتجاهل طلباتها واحتياجاتها؟
شايها قليلة ماتستحقش؟ بستخسر فيها؟ معيها في دايرة من

جلد الذات وتأنيب ضمير مستمر؟ ولا يرحمها وأتفهمها؟
حاسة بأنوثتي؟ فخورة بيها؟ ولأ أتمنى طول الوقت لو
كنت رجل؟ متصالحة معها ولا مكسوفة منها؟
جاوبى الأسئلة وظبطي علاقتك بنفسك صح.

علاقتي بأهلي:

أهلي سبب سعادتي؟ بشكر بابا وماما على كل حاجة حلوة في
حياتي؟ ولأ محملهم مسئولية فشلي في أي حاجة؟
بحس وسطهم بالأمان ويحب لهم وقعدتهم؟ ولأ بهرب
من تليفوناتهم ويتحجج بانشغالي عنهم؟
زوجي.. سَكَن ورحمة؟ بحبه؟ بيحبني؟ بيشجعني؟ بدعيه؟
في تواصل وتفاهم بيننا؟ ولأ سبب النكد اللي في حياتي؟
أولادي.. زينة حياتي زي مارينا قال؟ ولأ سبب شقايا وتعبي؟
ظبطي علاقتك بأهلك وبكل الناس اللي حواليك.. حلي
المشاكل اللي مضايكاكي.. استعيني بحد يساعدك حاولي تطلعي
بأعلى مكسب وأقل خسارة.

علاقتي بشغلي:

بحب شغلي؟ بلاقي نفسي فيه؟ بثبت ذاتي.. بنجح.. شايفة
فيه مستقبلي؟ بتقدّم؟ ولأ أحسن من مفيش وبدل قعدة البيت؟
راجعي أهدافك وارسمي طريقك.. وتوكلي على الله وانطلقني.

علاقتي بأصحابي:

بحكي وأفضفض معاهم.. بوصل معاهم للقرارات الصح
الي بتريجني وتفيدني؟ قعدتهم بتنسيني همومي ويبدوني طاقة
عشان أكمل؟ ولا بنعد لبعض مين آخر واحدة كلمت الثانية
ومين عزمتني ومين نسيت؟

لسه فيه فرصة ممكن نصفي فيها ونرجع أحسن من الأول.

هو اياتي:

عندي وقت فراغ بقضيه مع نفسي لو حندي بعمل حاجة
بحبها؟ في حاجة أنا شاطرة فيها بعملها بشكل مختلف وأصحابي
والي حواليا بيكلموني ياخدوا رأيي فيها ويستشيروني؟
بطبخ حلو؟ بفهم في الموضة؟ يرسم.. بقرأ.. بلعب رياضة؟
بطوّر من هوايتي دي؟ بتدرب عليها؟ بقرأ عنها؟ ياخذها
كورسات؟ بسمع لها فيديوهات؟
الحياة من غير passion بهتانة وماهاش طعم..

دوري على الهواية الي ترجعلك حماسك الطفولي وانتي
بتمارسيها.

الخير اللي في حياتي:

في خير بعمله في حياتي وفي إطار المجتمع بتاعي؟ ولا عايشة
لنفسني؟ بقدم خير لي حواليا؟ بساعدهم.. بنصحهم.. بتابعهم

لي مشاكلهم؟ بقضي وقت مع حد كبير في السن وأسيه يحكي
ويعيد ويزيد ويكرر كلامه؟ بزور أيتام؟ بفرحهم؟ بزور عماتي
وخالاتي وأولادهم بنفسني ولا بعرف أخبارهم من ماما ومن
السوشيال ميديا؟

أي خير هتعمليه في حياتك هيتردلك خير ليكي انتي أو يمنع
هنك شر.

علاقتي بربنا:

راضية عن علاقتي بربنا؟ ولأ حاسة إني مقصرة؟ طيب هو
سبحانه وتعالى راضي عني؟ بصلي وأدعيه وأفضفض معاه؟ ولأ
هشتكي للي رايح واللي جاي من حياتي عمال على بطال؟ شايفة
حكمته.. عندي يقين.. راضية بقضائه.. بحمده على نعمه؟
قمة التوازن النفسي وبداية النجاح هو علاقتي بربنا سبحانه
وتعالى.

فضي نفسك.. ركزي.. رتبي أفكارك.. اعلمي جدول..

قيمي نفسك في كل نقطة من السبع نقط دول من صفر
لعشرة.. اجمعي مجموع النقاط.. كل ما تقربي من رقم 70 ده
معناه إنك بتمتعي بجودة حياة عالية.. وكل ما بعدتي عن رقم
70 ده معناه إن حياتك محتاجة منك شغل ومجهود في البنود اللي
درجتها ضعيفة عشان توصلي لمرحلة الاستمتاع بالحياه.. أيوه
الاستمتاع بالحياة.

«عشان أرفع من كفاءة حياتي لازم أرفع من كفاءتي أنا
الأول، وعشان أرفع من كفاءتي بيقه لازم أطور من نفسي وأغير
منها للأحسن..»

وعشان أحدد التغيير المطلوب.. لازم أعرف نفسي الأول
كويس أوي..»

إزاي ممكن أعرف نفسي؟

إحنا بتعدّي علينا سنين كتير بنكتشف فيها حاجات ما كناش
نعرفها عن نفسنا..»

أنا ممكن ما أعرفش إني كنت أناية في علاقتي مع شخص
معين غير بعد ما أكون خسرت الشخص ده..»

وممكن أفضل عمري فاكرة نفسي شخصية منغلقة ومش
اجتماعية.. بس لما أغير شغلي اكتشف إني اجتماعية ومتكلمة..»

في واحدة بعد سنين كتير أوي اكتشفت إنها ممكن تعيش من
غيره عادي.. وإن حياتها بقت أحلى كمان.

ما حدّش بيتعلم الرقص من الكتب.. بتتعلمه بس واحنا
بتتفرج على حركات ايدينا ورجلينا قدام المرآة..»

عشان تفهمي نفسك لازم تتفرجي على نفسك وتراقبيها..»

راقبي انفعالاتك.. أفكارك.. مشاعرك.. سلوكياتك.. ساعتها
بس هتعرفي إيه هي احتياجاتك ورغباتك وأهدافك..»

كل ما هتعرفي نفسك أكثر كل ما هتعرفي تتعايشي مع الناس
والمجتمع والحياة اللي حواليك بشكل أفضل..»

لما هتعرفي نفسك وتكتشفيها.. لما تتصاحبوا وترجعوا
لبعض..

هتلاقي نفسك مش بتعملي حاجة إنتي مش مقتنعة بيها..
مش بتعملي حاجة غصب عنك..

مش بتعملي حاجة إنتي مش محتاجة تعملها عشان بس
تثبتي حاجة لحد أو عشان يقولوا عليك حاجة معينة.. أو عشان
مايقولوش حاجة.. أو عشان تردي موقف لحد عمله فيكي..
دوافعك الذاتية بس اللي هتحركك.. مش الناس والمجتمع..

هتبقى الفعل.. مش رد الفعل..

هتعرفي نفسك أكثر وأكثر لما تعرفي إيه اللي ببسطك وإيه
اللي بيضايقك.. وتقربي أكثر من اللي ببسطك وتبعدي بالتالي
من اللي بيضايقك.. ركزي مع نفسك هتعرفي دوافعك وتحدد
اتجاهاتك..

ساعتها بس هتعرفي عملي update لنفسك.. وتوصلي لنسخة
معدلة منك.. نسخة بتعرف تعيش وتستمتع بالحياة..

نسخة عرفت السر.. سر ال Quality of life.

عايش ومش عايش



عمرو دياب لما قال أنا عايش ومش عايش ماكانش بيهزر..
عشان في ناس كثير فعلاً.. عايشة ومش عايشة..
أصل الحياة مش أكل وشرب ونوم..
لا الحياة ليها معاني تانية كتير..
الحياة يعني.. الحب
يعني الضحك مع الصحاب من غير سبب..
يعني لحظات الرومانسية..
يعني المواقف اللي مابتتسيش..
الحياة يعني لمة العيلة..
يعني شغلي اللي بحبه..
روايتي اللي بنام وأنا بقراها..
يعني الملوخية من إيد ماما..
يعني نجاح المشروع اللي بحلم بيه..

يعني ال surprise party اللي بعملها لحد بحبه..
الحياة يعني الهدية اللي أختي كانت نفسها فيها..
يعني ال graduation party بتاعة ابني اللي في KG2..
يعني الأغنية اللي بتفكرني بأيام ثانوي..
الكشك اللي كنت بقابل عنده صحابي..
يعني ذكريات آخر رحلة طلعتها مع صحابي..
يعني الخير اللي بعمله من غير ما حد يشوفه..
يعني المجهود اللي ببذله عشان أسعد اللي حوالياً..
الحياه يعني المصيف مع العيلة..
يعني ذكريات بيت جدي، وحواديتة، وعبايتة اللي بتدني في
الشتا..

يعني رضايا عن نفسي..
ورضا اللي بحبهم عني..
الحياة هي الذكريات اللي إحنا بنعملها دلوقتسي عشان نعيش
عليها بعدين..

من الآخر الحياة.. فن....
عايزة فنان عشان يعرف يعيشها..
الفنان بس هو اللي يعرف يعيش الحياة بأعلى جودة



ال Touch بتاعنا



اعملوا دماغ..

واستمتعوا بحياتكموا..

حبوا الحاجة لحد ما تدمنوها..

عشان تعرفوا تستمتعوا أوي..

فيه ناس كده بنقابلهما.. تقولها تشرب إيه.. يقولك أي حاجة.. طب سُكَّرِكْ إيه.. يقول أي حاجة.. هو أصلاً ما حُبش الحاجة أوي فمش فارقة معاه..

وفي ناس تانية بتستمتع بكل حاجة.. فبتستمتع أوي..

كوباية الشاي باللبن مقدسة أول مايفتحوا عندهم..

البن مايفعش نشتره من أي حنة، لازم تحويجة معينة من واحد معين..

النسكافيه ليه ساعة محددة في اليوم..

الطعمية ليها واحد مخصوص..

في واحد ما يعرفش يتفرج على الماتش غير على القهوة..
وواحد بيستمع بالمذاكرة الفجر..

وفي واحد بيظبط غداه الساعة أربعة عشان كوياية الشاي
تتظبط الساعة خمسة مع أغنية الست..

في واحد عمره ما اشتكى من الزحمة.. طول ما كاسيت
عربيته شغال والسيدات مالية التابلوه..

في واحد ما ياكلش البسبوسة غير من محل معين في وسط
البلد..

وفي واحد ممكن يغير الطريق اللي بيمشي فيه كل يوم علشان
يشترى عقد الفل من الإشارة ويعلقه في العربية..

في واحدة ليها طقوس معينة في غسل المواعين.. راديو في
المطبخ.. ساعات في ودانها.. بخور جنبها..

الناس دي إحنا بنقابلها كثير في حياتنا.. وساعات بنتريق
عليها وبنقول عليهم محسوكين..

الناس دي هي اللي بتذوق الحياة..

ناس حطت التاتش بتاعها وخلت للحياة طعم..

طب ما تيجي نجرب إحنا نبقى زيهم ونستمع بالحاجات
البيسطة اللي في حياتنا..

ما تيجوا نبطل نقول أهي عيشة والسلام..

ما تيجوا نحط التاتش بتاعنا..

إحنا مش هنبقى أول ناس .. فيه ناس كتير عايشة على المتع دي ..
اللي بيملك الفرشة في إيد وبالته الألوان في الإيد الثانية ..
مع أول ضربة فرشة في اللوحة اللي قصاده .. بيدخل في حالة
متعة هو بس اللي يعرفها ..

اللي بيستنى البيت كله ينام ويمسك الرواية الجديدة لكتابه
المفضل .. من تالت صفحة بيدخل في حالة متعة هو بس اللي
يعرفها ..

اللي بيحط الساعات في ودانه وي على الصوت
وييدوس «بلاي» عشان يسمع شط إسكندرية يا شط الهوا وهو
نايم على الشيزلونج قدام البحر .. بيدخل في حالة متعة هو بس
اللي بيعس بيها ..

اللي بيقل عداد عريته الساعة ثلاثة الفجر على الدائري
بيدخل في حالة متعة هو بس اللي بيعس بيها ..

إحساس المتعة والحضان بينظ من فوق الحاجز ..

إحساس المتعة والجسم يخبط ويغوص تحت المية ويطلع
تاني .. إحساس الحضان بعد غياب سنة ..

إحساسك وانتي ماشية حافية وأول مرة رجلك تلمس الرمل
من آخر أجازة ..

إحساس نسمة الهوا اللي بتيجي تطير شعرك وتخليكي
تاخدي نفس عميق ..

أو ابتسامتك لما تشوفي بيبي أثور ويختارك انتي بالذات
عشان يضحكلك أو يديكي بهرونته ..

إحساسك لما تفتكري أول كلمة حب سمعتها..

إحساسك لما تلاقى الإيشارب اللي كان ضايح منك ولاقيته
بالصدفة..

إحساسك لما تيجي الأغنية اللي بتحبها في الراديو وانتي
بتقلبي..

إحساسك لما فنجان القهوة يطلع مطبوط..

وإحساسك لما الخاتم اللي عجبك ومفيس غيره يطلع
مقاسك..

وإحساسك لما تلاقى ٥٠ جنيه في الجاكت الشتوي..

إحساسك لما تشوفي حد صدفة كان نفسك تشوفيه من
زمان..

إحساسك لما تروحي مكان كان فيه ذكرى حلوة عدي عليها
سنين..

إحساسك لما يجيلك هدية من حد بتحبيه..

إحساسك لما تقري كتاب ويطلع حلو ويعجبك..

خلي أيامك كلها حلوة.. وما يعدش عليك يوم إلا وتحسي
حاجة حلوة زي اللي فوق دول..

أيام ثانوي



فاكرة أيام ثانوي؟!!!

طيب فاكرة درس الفيزيا ورخامته؟

طيب فاكرة قعدتك مع العيال صحابك يومها.. وشناقتك

مع أخوكي على الريموت؟!!!

عارفة عدى كام سنة من ساعتها؟

خمستاشر ولاً عشرين؟

ياااه إزاي عدوا بسرعة كده؟

كأننا نمنا وصحينا.. طيب عارفة بقى لو نمنا وصحينا كمان

مرة كده هتلاقي إيه؟

أو مش هتلاقي إيه؟

مش هتلاقي حد يشخبطلك على الحيطه (:)

ولا يلغوص نفسه بالشوكولاتة عند الناس..

ومش هتلاقي حد يخبط في رجلك وانتى نايمة طول الليل..

ولما تدخلني أوضتهم مش هتدوسي على اللعب الصغيرة اللي
بتوجع الرجل..

ولا هيعطوا عليكى وانتي خارجة بعد منيمتهم..
مش هيطلعوا عينك وانتي خارجة عشان مش هتنقلهم
لبسهم تانى..

ومش هيشبطوا في كل حاجة في السوبرماركت...
ده يمكن حتى مايرضوش يخرجوا معاكى عشان خارجين
مع أصحابهم..

حتى رغيم اللي كان بيعملك صداع مش هيبقى ليكي
هيبقى مع أصحابهم في التلفون..

مش هقولك لو نمتى وصحيتى تانى ممكن يحصل إيه
لو حظك حلو وماسافروش برّه يمكن تشوفهم مرة كل أسبوع.
بس اعلمي حسابك هيبقوا مستعجلين عشان تمارين الأولاد..
إلحقي استمتعي بيهم دلوقتى وماتفوتيش ضحكة ولا كلمة
طالعة ملخبطة..

ولا حتى صورة تلحقي تخطفيها قبل ما يجروا يكملوا لعب..
أصل الصور دي اللي هتفكرنا بالأيام الحلوة اللي إحنا فيها
قبل متعدي بسرعة..

كفاية تشتكى منهم.. وابدأى استمتعي بيهم.

ال Inner peace



كأ مرة قعدت تدوري على موبايك وبعدين اكتشفتي إنك
بتكلمي فيه؟

وكأ مرة دورتي على نضارتك وانتي لبساها؟
ومفاتحك وهي في إيدك؟

طيب كم مرة نسيتي مواعيد مهمة وكأ مرة خدتي الدوا
مرتين؟

غير المواعيد اللي بنساها والشغل اللي بيدخل في بعضه..
الرسائل اللي بنبعثها بالغلط لناس تانية..

كأ مرة قُلتي أنا إيه اللي جابني هنا وما افتكرتيش؟ وكأ مرة
خليتي اللي قُدَامك يعيد كلامه من الأول عشان سرحتي منه..
وينقعد نقول ده زهايمر.. لأ ده تركيز.. أصلي مش بنام
كويس..

المشكلة الحقيقية إننا بقينا عايشين في عالين..

عالم حقيقي.. وعالم موازي

عالم موازي جُوه دماغنا إحنا بس..

العالم الحقيقي اللي فيه الناس والأماكن والأحداث..

والعالم الموازي اللي فيه الذكريات والخطط والمستقبل

والتخوفات والأحلام..

إحنا بقى عندنا الصوت الموازي بقى أعلى كثير.. أعلى من

أي حاجة حوالينا.. أعلى حتى من نومنا ومن أحلامنا.. ده اسمه

«over thinking» فرط التفكير.

مشكلة ال over thinking دي إنها بتقتل الإبداع جوانا..

بتضيع علينا فرصة الاستمتاع بحياتنا.. وده لأنه مش بيخلينا

نعيش اللحظة..

والأخطر من كده.. إنه مش بيخلينا نسمع نفسنا.. يغلوش

على الصوت اللي بييجي من جوانا عشان يوجهنا للصحيح

والغلط.. ال inner voice بتاعنا اللي بيوجهنا ويعرفنا مشاكلنا إيه

وحلونها ازاي..

طول الوقت في حاجة بتغلوش على الصوت الجميل ده.. *

طيب تنكري إن أحسن قرارات في حياتك خدتها وانتى تحت

الشدش.. أو على البحر.. صوتك ساعتها كان عالي.. أعلى من

صوت الميَّة..

ماكانش فيه رنة الماسنجر.. ولا صوت رسائل الواتساب..

الموبايل ماكانش متشعلق في ودانك.. العيال كانوا silent

ساعتها هتجذب الناس الي زيك.. ناس صحيحة نفسياً..
شريك حياتك.. صديقتك.. أولادك.. كلهم هيقوا زيك..
متصالحين مع نفسهم.. أصحاب.. مستمتعين بحياتهم..

افصلي ما بين أصوات الدوشة الي حواليك وصدى صوتها
الي في دماغك.. واسمعي صوتك انتي..

حددي طريقك.. وهدفك.. أحلامك.. وانطلقى في الطريق
الي قلبك يقولك عليه..

ساعات كثير بنحس إن قلبنا مقبوض من شخص وبعده
شويتين بنفهم ان إحنا فعلاً كان معانا حق..

ساعات بندخل أماكن بتتخنى..

وساعات قرارات ما بنستريح لهاش..

ساعات آراء الناس بتلخبطنا وبتبعدنا عن الصبح.. بتغلوش
على صوت الحق الي جوانا..

ولما بنسكتهم ونسمع صوتنا إحنا بس من غير أي مؤثرات
بنكتشف إن إحنا صح..

ونفتكر قول سيدنا النبي عليه الصلاة والسلام «استفت
قلبك ولو أفتوك»

إدّي فرصة لقلبك إنه يتكلم.. واتعلمي تسمعيه.. وتفهمي
لغته..

إوعي تصدقي الي يقولك مش هتعرفي.. ربنا خلقنا كاملين..
مش ناقصنا حاجة عن أي حد..

مفيش حاجة صح في المطلق ومفيش حاجة غلط في المطلق..
دي عملية نسبية.. اختاري اللي يناسبك واللي تستريحيله..
معتقداتك بس هي اللي بتتحكم فيكي وفي سعادتك وفي
حياتك.. طورها عشان توصلي لى انتي عايزاه..
الوقت ده وهم وقيود.. إلغى كل تخوفاتك من المستقبل وكل
ذكرياتك السيئة في الماضي.. وعيشي اللحظة واستمتعي..
وساعحي عشان تتحرري من كل اللي موقفك مكانك..
وعشان توصلي لقمة السلام الداخلي ال inner peace .

الفصل الثاني

اكسر تابوه

«الذين لا يستطيعون تغيير نسيج أفكارهم لن يكونوا قادرين على تغيير الواقع، ولن يحرزوا أبداً أي تقدم»

محمد أنور السادات

أي update هتعمله لنفسك ولأفكارك ومعتقداتك وسلوكك..
مهاعد إنك تغيري الواقع اللي انتي فيه وتغيري حياتك
الأحلى.

لو سيطرتي على «نسيج أفكارك» من المعتقدات الغلط
والتابوهات المجتمعية اللي مأخرانا وجايبانا ورا وحطيتي بدالها
المعتقدات والسلوكيات اللي تخدم احتياجاتك الفعلية هتبقى
وصلتي للـ best version of you

وكل ما قدراتك ارتفعت كل ما هتعرفي توصلي لأقصى درجات
هودة الحياة Quality of life

إنك تتحرري من القيود الفكرية اللي المجتمع زرعها جوانا..
دهي من أعلى درجات الوعي.

من أول الفصل ده في مرحلة جديدة من الوعي إحنا هنوصلها
إن شاء الله..

أول ما بندرك إن سلوكياتنا هي اللي بيتحكم في حياتنا..

السعادة والرضا.. سلوك

العصبية والسخط.. سلوك

النجاح.. نتيجة السلوك الجيد

الفشل.. نتيجة سلوكيات خاطئة

طيب ومين اللي بيتحكم في سلوكياتنا أصلاً؟

معتقداتنا..

أيوه معتقداتنا اللي اترينا عليها واتزرعت فينا..

معتقداتنا اللي هي أصلاً عبارة عن تابوهات من المجتمع
ومعتقدات الناس اللي حوالياً اللي معتقدين فيها وبيتعاملوا
معها على إنها حقائق مطلقة..

معتقدات ومواريث شكّلت حياتنا وانطباعاتنا عن كل حاجة
في حياتنا.. فيها الصبح وفيها الغلظ..

فيها اللي يناسبني وفيها اللي خلى أطفال يطلعوا معتقدين
نفسياً بسبب تعدي والدهم على أمهم بالضرب.. اللي هي
أصلاً كانت معتقدة إن ده حق زوجها عليها..
وجيل يبسلّم جيل..

إيه الفرق بين واحدة سعيدة في حياتها وواحدة تانية لأ

إيه اللي يخلي سيدتين يمروا بنفس الظروف ونفس المحنة زي
وفاة الزوج مثلاً أو طلاق وواحدة حياتها تقف تماماً.. وواحدة
حياتها تبقى أفضل..

لو ثبتنا الظروف كلها زي المستوى المادي وارتباطهم
بأزواجهم وعدد الأطفال..

واحدة هتكتئب وتحسر حياتها ومستقبلها وتعيش على
مضادات الاكتئاب وتهمل أولادها..

وواحدة هتحزن شوية وتقوم تعافر وتكمل وتبتدي من أول
وتنجح..

الفرق بينهم هو الاستسلام والرضا..

الزوجة التي استسلمت للأمر الواقع أفكارها عن الموت
الكار سلبية كلها زي إنه خراب بيوت..

والزوجة التي رضيت بقضاء الله أفكارها عن الموت قضاء
الله.. وإن ربنا ما يبجيش حاجة وحشة..

فراحت تدور على الحلو التي هي جيلها بعد الحزن.. والخير
التي ربنا شايلها..

الأفكار جوانبا بتحول لمعتقدات.. والمعتقدات بتحول
لعادات وتقاليد.. يعني سلوكيات.

حقيقة الموت واحدة.. أفكارنا ومعتقداتنا بس هي التي بتحكم
لي إحساسنا بيه.. هي التي بتخلينا نشوفها إيجابية ولأ سلبية..

الفكرة في حد ذاتها مجردة..

مجردة من حكمنا ومن مشاعرنا تجاهها..

إحنا التي بنقرر نتعامل معاها إزاي.. نفرح ولأ نزعل..
نضايق ولأ عادي..

لما واحدة حماتها تقولها «أصل انتي مش ست بيت»

في واحدة هتتعامل مع الفكرة على إنها إهانة وتقليل من
شأنها.. فهتكد على جوزها وتخاصم حماتها.. أو ممكن تسبب
شغلها عشان تتفرغ وتثبت إنها ست بيت شاطرة.. وتفضل
تعزم في أهل زوجها عشان يشكروا فيها وفي أكلها..

واحدة تانية لو اتقالها انتي مش ست بيت، إدراكها لمفهوم
وفكرة ست البيت مختلف.. فمن الأول خالص ممكن تقولها

معاكي حق أنا فعلاً زوجي وأولادي واخدين كل وقتي وبفكر
أدور على واحدة تساعدني في شغل البيت..

هي هي نفس الجملة، بس مشاعرنا وأفكارنا هي اللي
بتحكم في سلوكياتنا وردود أفعالنا..

إدراكي للفكرة لو إدراك إيجابي يبقى فرصة لحياة أحسن ولو
إدراك سلبي يبقى نقمة وبداية مشاكل في حياتي..

مفيش حاجة حلوة في المطلق ومفيش حاجة وحشة في
المطلق.. أي فكرة مجردة واحنا اللي بتقرر نتعامل معاها إزاي..

حتى موت الولد حاجة ما يختلفش عليها اتنين.. في اعتقادنا
كلنا إن دي أسوأ حاجة ممكن تحصل لبني آدم.. بس حتى ده
مش مبدأ مطلق.. لا ممكن يبقى خير برضو.. وكلنا عارفين
قصة سيدنا خضر والغلام.

ربنا سبحانه وتعالى قال: «وأما الغلام فكان أبواه مؤمنين
فخشينا أن يرهقهما طغياناً وكفراً»

فرق كبير بين الرضا بقضاء الله اللي هي مشاعر إيجابية وبين
الاستسلام للحزن واليأس والأفكار اللي هي مشاعر سلبية..

المشاعر الإيجابية نجاح.. وبداية حياة حلوة.. والمشاعر
السلبية فشل وبداية حزن.

سبت الشغل.. خسرت ناس.. اتطلقت.. اتنصب علياً»

كلمات مجردة مجرد ما نتحكم في أفكارنا فيها بالشكل ده يبقى
نتحكم في مشاعرنا تجاه أي حاجة تحصلنا في حياتنا وأي مشكلة

هلابلنا هنعرف نخليها فرصة لنجاح أو حل مشكلة تانية
وبالتالي فرصة لحياة أحلى.

ده معناه إن أي سلوك غلط بعمله في حياتي سببه في الأساس
معتقد غلط.. والمعتقد سببه أفكار سلبية.

الزوج الشكاك

الزوجة الغيورة

الأب العنيف

الشك والغيرة والعنف سلوكيات سببها معتقدات اتكونت
نتيجة أفكار سلبية..

وأكبر مثال على الكلام ده هو الزواج.. «منظومة الزواج»
كلها مستهدفة بقناعات خاطئة..

«اللي ما اتجوزتش فاتما القطر واللي اتجوزت داسها القطر».. فكرة

«ربي يا خايبه للغايبه».. فكرة

«يا مأمنة للرجال.. يا مأمنة للمية في الغربال» فكرة

«الحما عما».. فكرة

«الجواز شر لا بُد منه».. فكرة

كل معتقد غلط جوانا هو جبل بيربطننا في واقع إحنا مش
هايزينه وطول الوقت بنشتكي منه ونفيسنا نهرب منه.. تحوّرنا
من قيود الأفكار الغلط هو اللي هيغير الواقع وحياتنا.. للأحلى.

ما أنزل الله بها من سلطان



«تابوه» دي كلمة بنسمعها اليومين دول كثير في برامج ال talk show وعلى ال social media ..

لو حاولنا نترجمها ممكن تبقى «مواريث» أو أفكار سلبية ويفرضها علينا المجتمع عن طريق زراعة الأفكار دي بكل الوسائل المتاحة..

في حقيقة بتقول: «الناس لا تستطيع التفرقة بين صحة المعلومة وشيوع المعلومة.»

فبالتالي لما كل الناس تقول إن الطفل الرضيع لما يجيله زغطة تبقى معدته بتكبر.. تبقى بسم الله ما شاء الله معدته بتكبر من غير نقاش..

ولما يضحك وهو نايم تبقى الملائكة بتلاعبه..

رجله وجعته.. يبطول معروفة.. واحلقوله بالموس وكخلوه يوم ما يتولد..

لما كل الناس تقول اكسر للبننت ضلّع يطلعلها ٢٤.. يبقى
مطلعلها.. بالرغم إن سيدنا النبي عليه الصلاة والسلام قال
«ولقيا بالقوارير» بس اكسر برضودي كل الناس بتقول كده.
لما كل الناس تقول إن الفلوس ما بتشترش سعادة وإن الأغنيا
بهاء في حياتهم بيتق أكيد اللي ساكن في الفيلا اللي هناك دي يا
إما عنده مرض يا إما مراته بتخونه يا إما ما بيخلفش.. يبقى
ما بيخلفش.. بس ده عنده ابن فعلاً.. لأ ماهي مراته بتخونه
انت نسيت ولآ إيه..

لما كل الناس تقول إوعى تخاظر بوظيفتك وخليك في
المهمون.. وفلوسك وفرها.. والقرش الأبيض ينفع في اليوم
الأسود.. ولازمته إيه ده كله.. والشغل اللي تعرفه أحسن من
الشغل اللي ماتعرفوش حتى لو مابتحبوش.. يبقى نمشي جنب
الحيط وما نعيش حياتنا وما نجربش أي حاجة لحسن تطلع حلوة
وتبسط..

وأكيد دلق القهوة خير.. خصوصاً لو على البوتاجاز اللي
لسه مراتك دعكاه.. والخير جاي أهو في السكة على هيئة
هفاريبت بتتنشط في وش المودام..

وكله كوم و«ادبعلها القطة» بقى دي كوم تاني.. حاجة كده
بتفوّر التيستوستيرون في الدم يخليه يزرعها كف وهما لسه في
شهر العسل عشان ما عزمتمش على أمه تبات عندهم أسبوعين
بقلب جامد..

وفيه معتقد «للذكر مثل حظ الأنثيين» فيجبي يدي الولد
مصروف ضعف البنت.. ولبس العيد طقمين للولد وطقم
للبنات.. تقوله يا حاج ده في الميراث فقط.. يقولك إنت هتكر
كلام ربنا..

وفيه «انتى ست إنتى اللي تستحملى» وانتى ست لازم
تضحى».. وانتى ست لازم ترضى بأسوأ الأوضاع عشان تبقي
بنت أصول.. إنما هو راجل.. إيه اللي يجبره؟ ويرجعوا يقولوا
أصلهم ناقصات عقل..

من الآخر كده كل حاجة مقتنعين بيها وينفذها من غير
تفكير.. لازم نعيد التفكير فيها تاني.. ونتحرر من كل تابوه
مبوظ حياتنا.. التابوهات دي والمعتقدات الخاطئة بتسبب مشاكل
كثير في بيوتنا.. إحنا في غنا عنها.. بيوت كثير فيها مشاكل أذ
كده وناس بيتفرقوا رغم جهم لبعض عشان فاضين على
نفسهم قيود.. ما حدش فرضها عليهم غيرهم.. قيود كده.. ما
أنزل الله بها من سلطان..

المسيطر اقتصاديًا



فيه مشاكل كثير أوي ممكن تتعرض لها الست مالهاش حل..
زي إن جوزها يتجوز عليها ويعيشها في مستوى أقل عشان
مرتبته يكفي يفتح بيتين..

وَزَي إن الست يكون جوزها بيعتدي عليها بالضرب
وماتقدرش تطلب منه الطلاق عشان مالهاش بيت تاني
تروحله..

أوزي إن الست تكون بتتحمل أذى مبالغ فيه من مرات
أبوها عشان مضطرة تعيش معاها بعد ما اتطلقت..

أوزي إنها تكون مضطرة تعيش مع زوج بخيل بيصرف
بالقطارة..

والي سابت حبيبها واتجوزت واحد جاهز عشان ظروف
أهلها المادية مش هتسمح غير بكده..

أو مضطرة تعيش في مستوى أقل من مستواها عشان الزوج
بيصرف على أمه واخواته..

وفيه اللي جوزها قالها إحنا أولى بفلوس الشغالة اللي عايزة
تجيبها وهي أصلاً معاها أربع أطفال بتذاكرهم وتطبخلهم
وتنصف وتكنس وتمسح ومفيش أي وقت ليها خالص..

واللي جوزها مسافر طول السنة ومابتشوفهوش غير شهر في
السنة ونفسها جوزها يبقى معاها.. وشايلة كل المسؤولية لوحدها
وأحلى سنين عمرها بتعدي وهو بعيد عنها..

واللي اضطرت تتجوز أول واحد يتقدملها عشان تريح أمها
وأخوها من مصارينها بعد وفاة باباها..

وغيرها وغيرها كثير.. بس لو قرينا الأمثلة دي تاني كويس
هنلاقي حاجة مشتركة بينهم كلهم..
الفلوس..

أيوه الفلوس هي سبب كل المشاكل دي.. عشان كده البنت
الي ليها مصدر دخل مستقل فرصتها في حياة كريمة أكبر
من الي مستتية حد يديها مصر وفها ويتحكم فيها وفي حياتها
وقراراتها.

لكل بنت لسه بتدرس.. ذاكري كويس واتدربي في الصيف
عشان تتخرجي تشتغلي على طول.. وخدي كل الكورسات
الي تأهلك تنجحي في مجالك وحياتك.. وخططي كويس أوي
لحياتك..

ولكل بنت لسه ما اتجوزتش.. اشتغلي قبل ما تتجوزي...
واعملي C.V جامد خلي الغريس يبجي يلاقي ليكي شغل وكيان

يُحترمه ويتقبله.. وبعدين إبقى سيبني الشغل لو عايزة.. بس
تبقى عارفة إنك في أي وقت ولما تحتاجي هتدوري على شغل
هتلاقي .

لكل واحدة ست اتجوزت.. وحتى لو عمرها ما اشتغلت
قبل كده.. لسه عندك فرصة يبقى ليكي مصدر دخل مستقل..
بُصي حوالكي ادخلي على جروبات البنات على الفيس بوك
هتلاقي بنات بيشتغلوا من بيوتهم ويبيعوا أي حاجة في كل
وقت.. وبينزّلوا أوبن دايز ومعارض وبيتعرفوا على ناس
وعايشين حياتهم على مزاجهم وما عندهم مش قيود من حد ومش
خايفين من حاجة ولا من حد طول ماليهم مصدر دخلهم..
خليكي فاكرة.. المسيطر اقتصادياً.. مسيطر سياسياً..

إوعي تهنيني نفسك وتقبلي بوضع انتي مش عايزاه بس
عشان تلاقي حد يصرف عليك وعلى عيالك..

الرزق على الله



جُوه الصندوق



عارفين يعني إيه نعيش جُوه صندوق مقفول علينا من ست
جهات ؟

يعني مانشوفش نور..

نفضل بخبراتنا السابقة وأحاسيسنا اللي جربناها قبل كده..

إحنا فعلاً عايشين جوه صندوق..

صندوق من أفكار عقيمة مسيطرة على حياتنا..

صندوق مش عارفين نستمتع بحياتنا بسببه ولا نشوف نور..

صندوق بيقول إني عشان أتجوز لازم أكتب قائمة ومؤخر
وشبكة وفرح وفتان وأوضة سُفرة ونيش وملايات وفوط
وبيجامات كتيسير وأربع أطقم حلل ومصور فوتوجرافي
مخصوص وشهر عسل وناس يجوا يهدوا حيلي في أجازة الجواز
عشان يتفرجوا.. قصدي يباركوا..

صندوق بيقول إني لازم أشتغل شغلانات صعبة وأنسى

للمسي وصحتي وأجي على ولادي ومزاجي ووقتي اللي بهتم فيه
بشكلي وأنوثتي وهوياي وأوفر حتي فلوس الشغالة اللي هتيجي
لساعدني في شغل البيت.. عشان أدخل ولادي المدارس اللي بكذا..
وأدفع قسط العربية اللي بكذا.. وأسافر كل شوية مصيف مش
أهل من كذا.. وأجيب اللانش بوكس والشنطة والكوتشي ماركة
كذا وكذا.. وأعمل عيد ميلاد بكذا.. وأجيب لبس الهالوين من
كذا.. والتابلت والموبايل ماركة كذا وكذا وكذا..

صندوق بيقول إني لازم أدرس حاجة مش بحبها عشان أدخل
كلية تانية مش بحبها وأشتغل شغلانة مش بحبها وأعيش حياة
مش بحبها.. عشان برستيحي قدام الناس اللي أصلاً مش
بحبها..

صندوق بيقول الواجب والمفروض والأصول.. وحيي
الي ماتعرفيهوش.. وزوري الي مايحبكيش.. وجاملي الي ما
بتطيقهوش.. وعلاقات مفروضة وواجبات ملزومة.. وكلها
اجتماعيات مالهاش علاقة بالدين..

صندوق بيقول إن الراجل يشتغل طول الأسبوع عدد
ساعات خرافي ويسوق في الزحمة ساعتين عشان يوفر الاقساط
والجمعيات والدروس والخروجات ويفضل حاطط نفسه تحت
ضغط نفسي وعصبي عشان يجهز عياله ويأمن مستقبلهم اللي همّا
لسه في ابتدائي.. وينسى يفسحهم ويخرّجهم ويبنى شخصياتهم..
وينسى إن فيه زوجه نفسها تسمع كلمتين حلوين.. أو حد يهزر
معها.. أو حتى يسمعها ومزاجه رايق..

وفيه صندوق «مايصحش»

مايصحش تبقي كده.. ومايصحش تضحكي هنا..
ومايصحش تروحي لوحدك.. ومايصحش تدرسي ده..
ومايصحش تتكلمي في ده.. ومايصحش تقولي من حقي..
ومايصحش تقولي محتاجة.. ومايصحش تعوزي.. ومايصحش
ماتنازليش.. ومايصحش تحبي..

وصندوق «مش هقدر».. وماعنديش وقت.. مش هقدر
أتعلم حاجة جديدة.. مش هقدر أوصل لحلمي.. مش هقدر
أعمل كل ده مع بعض.. مش هقدر أعيش غير كده.. مش
هقدر أغير حياتي.. مش هقدر عشان الولاد.. مش هقدر
أنساه..

ومش هقدر أسامح..

ومش هقدر أصحى بدري.. ومش هقدر أبطل أكل..
ومش هقدر أبقى حاجة كويسة..
ممكن نخرج بّره الصناديق دي كلها..

ممكن نعيش زي ما احنا محتاجين.. وزى ما احنا قادرين..

ممكن مانضغطش على نفسنا لا مادياً ولا معنوياً..

ممكن مانتجاهلش احتياجاتنا.. لا الجسدي ولا الفكري ولا
العاطفي..

ممكن نستمتع بحياتنا..

ممكن مانجيش على صحتنا وعلى وقتنا اللي بنقضيه مع
اهوازتنا أو أولادنا واحنا في أحلى سنين عمرنا حتى لو عشان
مستوى معيشة أعلى شوية.. أو عشان شوية مظاهر نأجل فرحنا
ولننازل عن سنة زيادة مع بعض..
ممكن ن shift حياتنا للأحلى؟

مش هتغيري العالم



هيقولوك يعني هو انتي اللي هتغيري العالم؟
. إوعي تفكري في كلامهم وتراجعى بسببهم..
لأنك فعلاً تقدرى تغيري العالم بشوية قرارات تاخديها بينك
وبين نفسك وتنفيذها..
ساعتها هتعرفى تغيري العالم.. العالم بتاعك انتي..
إنتي أصلاً مش محتاجة تغيري العالم بتاعهم.. ولا مسئوليتك..
إنتي بسهولة تغيري العالم بتاعك بإنك تغيري شوية معتقدات
وقناعات جواكي..
بإنك مثلاً تشوفي أي مشكلة تمرى بيها عبارة عن فرصة
جديدة في حياتك..
حتى لو اللي بتمرى بيه ده نقمة مش مجرد مشكلة..

السبب اللي بتفقد الزوج سواء بالطلاق أو الوفاة أو الزواج
بأخرى.. ممكن تنهار نفسياً ويحيلها اكتئاب وتعيش على

المهدئات وتعتزل العالم والناس وتفضل نائمة طول الوقت..
وتكتشف بعد سنين طويلة إنها نسيت أولادها في محتها دي
ونسيت نفسها أصلاً..

في حين إن في واحدة غيرها مرت بنفس ظروفها بس قدرت
تغير العالم بتاعها.. بدل ما تستسلم قوت نفسها بشغل
وبصحاب وأهل.. خافت على ولادها لما يتربوا من غير أب..
بدأت تقرأ كتب وتدرس عن التربية الفردية single parenting لحد
ما بقت أستاذة في المجال ده وبدأ الناس يجوها مخصوص يطلبوا
استشاراتها.. غيرت العالم بتاعها.

وفيه اللي شركته قفلت وصفت شغلها فقعد يستلف ويتداين
ويبيع العربية وبعدين الشقة ومستواه فضل ينزل لحد ما بقاش
عارف يدفع الإيجار..

في حين إن زميله اللي في نفس الشركة استغل تخصصه وعمل
صفحة على مواقع التواصل الاجتماعي يقدم فيها نصائح وأفكار
جديدة متطورة في مجاله.. الناس عرفته واتعرض عليه فرصة
عمل في شركة أفضل من شركته القديمة.. غير العالم بتاعه.

إحنا بس اللي بنقرر إن الظروف اللي إحنا فيها دي نقمة لما
بنستسلم لها..

واحنا برضو اللي بنقرر نتحكم في مشاعرنا ونعرف نرضي
بقضاء ربنا ومانستسلمش للوضع المؤلم..

الاستسلام مشاعر سلبية.. بتسيطر علينا وتجربنا لعالم سلبي
كله فشل..

إنها الرضا مشاعر إيجابية بتخلينا متأكدين إن رينا لازم هيرضينا
بعديها.. فبنسيطر على كل المشاعر السلبية اللي في حياتنا.. ونوجه
تفكيرنا وطاقتنا كلها للنجاح..

فينعرف بسهولة جداً.. نغير العالم..

دماغنا هو العالم اللي بنعيش فيه.. أفكار.. قرارات.. حقائق..

لو عرفتي تشوفي الأمر أو الحدث مجرد من حكم الناس
عليه.. ساعته هتقدري توظفي الفكرة أو الحدث لصالحك..
وهتحرري من فكرة إن في حاجة وحشة حصلت وهتقدري
توظفيها كبداية نجاح وتغيير لصالحك..

ديكارت بيقول «مش كفاية يكون عندنا عقل جيد.. الأهم
إن إحنا نعرف نستخدمه استخدام جيد..»

بس إحنا اتوجدنا في مجتمع بيخاف من التغيير.. أول ما
بنقول محتاجين نغير حياتنا.. نلاقي مواجهة من كل الأشخاص
اللي حوالينا.. قريب متنا أو بعيد عننا..

كلمة التغيير بتشير جواهرهم حقد وخوف.. وقلق إن هُما كان
حياتهم تتأثر بالتغيير اللي هنعمله في حياتنا..

أول ما تقولي بس أنا هعمل أو هدرس حاجة جديدة..
تلاقيهم بذلوا مجهود وطاقسة كبيرة جداً عشان يبرروا عدم
صلاحية أفكارك الجديدة.. مش عايزين يسمعوا ولا يشوفوا
غير أنفسهم.. عايزين تجاربههم في الحياة تُعمّم وتُدّرّس.. من
غير أي update.. خايفين لا التغيير اللي هتعميه يبين تقصيرهم أو
سليبتهم أو تأخرهم..

مدارس ولادهم أحلى مدارس.. نوع عربيتهم أنسب حاجة ليكي.. طريقة تربيتهم لأولادهم دي أفضل حاجة.. تشتغلي ليه ما أهى ما اشتغلنش ومبسوطة.. تشتري دي ليه ما هُما عايشين من غيرها.. إشمعنى انتي مابتضريش ولادك.. كده يبقى مش هيتربوا.. إنتي هتلبسي من المحل الغالي ده ليه.. ماكلنا بنجيب من الحتة الفلانية.. سفر إيه ويتاع إيه تشتري ليه وتصرفي ليه.. عاملين حظرم على تفكيرهم.. خايفين يخرجوا بَرّه خط السير اللي المجتمع رسمه وفرضه عليهم..

طيب تعرفوا إن مش المجتمع بس اللي بيخاف من التغيير؟ ده مُخنا نفسه بيخاف من التغيير.. فيه جزء معين في المخ اسمه اللوزة الدماغية أو Amygdala ده وظيفته بس إنه يخاف من التغيير.. عشان كده أي قرار بالتغيير في حياتنا تلاقينا نقعد نأجله.. ونأجله ونتحجج قبله كثير.. وندرسه وتنقده.. ونشوف مين عمله قبلنا وحصله إيه.. ونتوتر ونخاف.. وفيه اللي بيعرف ياخذ قرار التغيير وفيه اللي يبلغه أسهل من دماغه.. لدرجة إن فيه ناس عندها استعداد تتحمل وضع مؤلم في حياتها أخف من ألم التغيير..

ده نفسياً اسمه «الآمان المشوّه في الألم المعتاد»

يعني اللي نعرفه أحسن من اللي مانعرفوش..

بُكْرَة



«بكرة».. دي الخدعة اللي كلنا اترينا عليها.. الخدعة اللي سرقت منا حاجات كتير قبل مانستمتع بيها..

ياما هدوم اتشالت في الدولاب لحد موضتها ما راحت وأستكها ساح من الحر.. عشان أشيلها لبكرة..

ياما فلوس كتير اتشالت وحرمنا نفسنا من متع النهارده عشان «بكرة»

ياما وقت كتير اشتغلناه زياده من صحتنا ومن وقت استمتعنا عشان نأمن «بكرة»

ناس كتير رحلوا عن ديانا قبل ما نفضى ونروح نشوفهم بكرة..

حاجات كتير كان نفسنا نتعلمها ونجربها.. بس أجلناها لبكرة.. خروجات وصحاب وأماكن جديدة.. بس خليناها لبكرة..

عشان نوصل لجودة حياة أعلى من اللي إحنا عايشينها..
محتاجين بس اننا نعيشها.. ومانا جلش حاجة لبكرة..

الحاجة لما بتأخر ما يبقاش ليها طعم..

الشاي لما يبرد ما يتشربش..

والآيس كريم لما يبسيح.. برضو ما يتاكلش..

ابتدي من دلوقتي واعملي كل اللي انتي عايزاه.. ماتفتكريش
إن هو ده انتي وبس.. لأ انتي فيكي مهارات كثيرة جداً جواكي
وطاقات مخزونة ما استخدمتمش.. إنتي ماتعرفيهاش أصلاً.. لازم
تجربي وبقى عندك وقت عشان تطلع عليها.. وتعيشيها..

إنتي مش محتاجة تكوني مبدعة عشان تعيشي حياة حلوة..
إنتي بس محتاجة توقي المقاومة اللي جواكي إنك ما اتعيشيش
النهارده وتأجلي كل حاجة حلوة لبكرة..

إحنا مش هنعرف نرجع إمبراح.. ولا نعرف نروح بكرة..

إحنا ما عندناش غير دلوقتي.. دي الحاجة الوحيدة اللي
بنملكها.. امسكي فيها كويس وعيشي اللحظة بكل حاجة
حلوة فيها أو وحشة.. عيشيها أوي وحسيها أوي عشان هتروح
ومش هترجع تاني..

ابدأي من دلوقتي عيشي حياتك.. وغيرها للأحلى.. إوعي
تستني لحد بكرة.

الفصل الثالث

داسها القطر

«قصص الهوى قد أفسدتك.. فكلها غيبوبة وخرافة وفيال
الحب ليس رواية شرقية.. مختاصها يتزوج الأبطال»

نزار قباني

من أكبر مصادر المعتقدات الغلط في حياتنا هي السوشيال
مديا.. وبرامج التوك شو.. والcomics والمسلسلات..

وكلهم ماورا همش حاجة غير المشاكل الزوجية..

قنوات كاملة على اليوتيوب هدفها بس إنها تتريق على
منظومة الجواز..

لحد ماكل المتجوزين آمنوا إن مفيش أمل.. وإن هي دي الحياة
الزوجية.. وشر لا بُد منه وخلص...

استسلام تام لكل النكد والمشاكل تحت مبرر إنها منظومة
فاشلة من الأول وإن مفيش فايده..

مش بس كده لأ ده إحنا كمان عيْنَا نفسنا خُبرا ومستشارين
لكل اتنين عايزين يتجوزوا.. وبقينا نتطوع ونرسم خط سير
حياتهم والقرف اللي هيمروا بيه.. وانتوا لسه شوفتوا حاجة..
واحنا حذرناكم.. وكمية نصايح بنديها لأي اتنين single عشان
مايغلطوش غلطتنا..

ولو قعدنا مع أي اتنين متجوزين هنسمع منهم نفس
الكلام..

مالها العزوية

مفيش أحلى من بيت أبويا

كلهم نكدين

بيتحكم فيا

مايقاش بيهتم

أهم حاجة عندها العيال

مايشوفوش

مايسمعنيش

مايتطلش طلبات

دي فعلاً اسمها معاناة مش حياة زوجية..

معاناة يعني ألم مستمر..

يعني إحنا عندنا مشكلة كبيرة..

والمعاناة الأكبر إني ما أعرفش أصلاً أن عندي مشكلة..

وإني أبقي مقتنعة إن هي دي الحياة الطبيعية وإن ده العادي وكل

المتجوزين كده ودي سنة الحياة.. والجواز أصلاً يعني نكد.

مشكلة الزواج بقى مشكلة مجتمع.. مش فئة ولا قلة..

نسب الطلاق أصبحت مرعبة..

الخيانة..

الزواج الثاني..

الحلج..

نسبة اعراض الشباب والبنات عن الزواج في تزايد..

انتشار المشكلة وتوغلها في المجتمع بالدرجة دي معناه وجود

خلل في المعتقدات الخاصة بمنظومة الزواج.

ربنا سبحانه وتعالى لما خلق سيدما آدم عليه السلام خلقه

في الجنة ونعيمها.. مع الأنهار والفاكهة ولحم الطير.. وحوور
العين..

ورغم المتع دي كلها، آدم استوحش.. يعني حس بالوحشة
والغربة.. فسبحانه وتعالى خلق له أمنا حواء..

لم يخلق له ابن يورثه مثلاً..

ولا صديق يسليه ويحكي معه..

خلق له «حواء»

زوجة..

ده معناه إن الزواج متعة.. وأكبر متعة ربنا خلقها للإنسان..

كل متع الجنة ماكفتش سيدنا آدم.. استكفى فقط بزوجته..

وده أصل الزواج في الإسلام.. الفقهاء يقولوا إن أصل الزواج

المتعة.. السكن.. الراحة..

مش النكد ولا العيال ولا المسئوليات..

مش الطبخ والغسيل وشغل البيت..

الأصل أني أستمتع بزوجي وزوجي يستمتع بيا..

بس كل المعاني الجميلة دي مش بنلحق نعرفها.. ولا حد

بيخلينا نستشعر قيمة الجواز من المنظور ده..

الناس بتعامل مع الجواز على إنه مرحلة لازم نعدي بيها..

ولما نوصلها ساعتها نبقي نكتشفها ونفهمها على مهلنا..

وفجأة بتلاقي نفسنا في جُوه المنظومة من غير أي معلومات..

الجواز بقي عامل زي الامتحان اللي دخلناه من غير ما
نذاكر.. أو الصدمة اللي ماحدث أهلنا نفسياً ليها..

بنكتشف بعض لأول مرة..

بتقول إنه شخص تاني خالص غير اللي حبيته..

وهو بيقول إنه مابقاش عارف يرضيها إزاي..

عشان نرد الشيء لأصله.. ويرجع تاني الزواج متعة ربنا
خلقها لنا عشان نستمتع بيها.. تعالوا نغير معتقداتنا الغلط عن

منظومة الزواج.. تعالوا نتعلم ازاي نغير حياتنا للأحلى

الجواز حلو مفيش كلام.. إنك تلاقي نُصك التاني ده رزق

من عند ربنا..

فكرة إنك تلاقي حد ياخذ باله منك ومن احتياجاتك..

الحضن والطبقة..

مسكة الأيد..

خوفنا على بعض..

السنين الكثير اللي بتعدي علينا واحنا سوا..

الذكريات اللي بنعملها سوا..

المشاعر المشتركة..

إحساس أول طفل..

وأول يوم ليه في المدرسة..

لحظات الجنان.. والغيرة.. والشوق

القلق.. والاحتواء..

حاجات كثيرة الحروف عمرها ماhtوصفها..

«الجواز نعمة من عند ربنا.. لو بيدينا حولناها لنقمة..

يبقى هو ده الحرمان الحقيقي»

أول الجواز يبقى عايز يبتلها إنه راجل .. وهيشيل مسؤوليتها ..
وانه ظهرها اللي هتسند عليه .. ومع أول دورة بلاي استيشن
بتنهار كل الوعود .. وبيجيلها وش الصبح .

أول الجواز والبنت مش عارفة الفرق بين البليدج والجلانس
وتبقى واقفة بفوطه التلميع اللي عمرها ما عرفت مكانها في
بيتهم .. بتبقى محتاجة كتالوج .. عشان تعرف تستخدمهم إزاي؟؟
قبل الجواز يبقى شايف نفسه اوي .. ويوعدها كل ويك
إند هنسافر في حنة يا حبيبتى .. بعد الجواز بترسى على ده دور
مامتك ولآ مامتى .

بعد الجواز بإسبوع بتصحى تكتشف إن كل الهدوم مش
نظيفة .. وطبعاً عشان يعاد استخدامها محتاجة دورة تصنيع ..
غسل ونشر وتطبيق وكوي .. وبتيجي عند أول مرحلة .. بتحتاج
خبير أجنبي عشان يشغلها الغسالة .. وبترسى على إن مفيش
خروج لحد مامتها متيجي تشغلها .

أول الجواز يبقوا الاتنين فاكرين إنهم هياخدوا أجازة
يستمتعوا فيها على رواقه .. بيتفاجأوا بالضيوف اللي بيعجوا
يزورهم بكميات غريبة .. عشان بس يتفرجوا على الشقة
ويعدلوا فيها ويرموا كلمتين ويقوموا يروحو .. بعد ما يكونوا
اتاكدوا إنهم هلكوا العريس والعروسة على الآخر وهيناموا
مقتولين لحد الصبح .

خلاص هزرنا وضحكنا..

اللي لازم نعرفه بجد إنها أصعب سنة في الجواز.. لو عدت
على خير نعرف نكمل حياتنا في سعادة وراحة..
وعشان تعدي على خير لازم نعرف إيه المشاكل اللي ممكن
تقابلنا..

البنات بتبقى متوترة وخايفة وهي بعيد عن حضن مامتها
وباباها.. فبتفضل مستنياله على غلطة.. وهو بيبقى مركز عشان
أول ما تقلب وشها يشتلها إنها نكدية..

والأهل بيبقوا مركزين معاهم عشان مع أول خنافة يثبتوا
إنهم ماكانوش نافعين لبعض من الأول..

العروسة بتبقى صحباتها اللي اتجوزوا قبلها ماسكين ودانها
ومدينها شوية نصايح تودي في داهية..

والعريس بيبقى مشحون من كلام الناس وعايذ يثبت إن مش
مراته اللي هتمشيه أو تاخده من أهله..

والحقيقة إن العريس بيبقى مصدوم من المسئولية اللي فوق
كتافه.. وخايف من بكرة جداً..

والعروسة اللي كانت متدلعة في بيت باباها بقت حاسة إن
الدلح ده بقى ذكرى مش هتلاقيها تاني..

دي حياة جديدة هتتاقلوا شوية عن حاجات كانت
بتبسطكوا وانتوا سناجل.. بس الشطارة إنكو تلاقوا حاجات
مشتركة تبسطكوا وانتوا مع بعض.

قَدِّروا مسؤولياتكموا إنتوا الاتنين كويس..
إنتوا الاتنين مصدومين..
إنتوا الاتنين شايلين مسئولية..
إنتوا الاتنين لسه بتجربوا..
إنتوا الاتنين بتكتشفوا بعض..
إنتوا الاتنين مالكوش دعوة بكلام الناس..
إنتوا الاتنين دُوروا على أرض تتقبلوه فيها.. وحاجات مشتركة
إنتوا الاتنين.. ربنا يوفقوا.. ويسعدكوا

الدوبامين



الحبيب Vs الزوج

مشكلة كلنا بنقع فيها..

أنا حبيت واحد ولما اتجوزته ماطلعش هو..

أصله اتغير..

أصلها بقت مملة..

أنا ماكتتش فاكر إن هو ده الجواز..

هي دي اللي أنا اتجوزتها؟

أنا مش عارفة كان فين نخي لما وافقت عليه..

إيه بقى؟! هو فيه إيه؟ ليه كل الناس يقولوا كده وسمعة

الجواز بقت في النازل للدرجة دي؟

الموضوع باختصار إن الطرف التاني ما اتغيرش ولا حاجة..

إحنا اللي كان فيه حاجة مسيطرة على دماغنا.. عفريت وعاملنا

غشاوة على عينينا في أول العلاقة..

العفريت اللي كان مسيطر علينا اسمه الدوبامين Dopamine
علمياً ده هرمون اللذة .

بيعمل إيه المجرم ده؟

المخ ييفرز كميات كبيرة من الدوبامين في أول علاقة الحب..
بهدينا إحساس اللذة.. والنشوة.. والجنون.. بيخلينا نعمل أي
 حاجة لإرضاء المحبوب.. تتحدى أهلها.. وتسبب شغلها..
وهو يتجنن ويميلها تحت البلكونة.. ويسهر يكلمها طول الليل
ويروح الشغل مطبّق..

الهرمون ده بيعمل غشاوة على عينينا، بيخلينا مانشوفش
هيوب الطرف الثاني..

فهي تفتكر صحابها غير انين منها لما يقولوها يا بنتي ده
شكله ملخبط ولأ بتاع بنات ولا شكاك وهيخلي عيشتك هباب..
تقولهم هيتغير عشاني.

وهو يفتكر مامته ست قديمة ونفسها تجوزه بنت خالته
عشان كده بتقولّه دي مش حلوة ولأ مش زينا ولا هتفتح بيت
إزاي دي.. وهو يقولها دي مثالية ومافيهاش غلطة.

دي المرحلة اللي إحنا بنقول عليها « الحب »، اللي كل المسلسلات
والأفلام لما بتحب تجيب قصة حب مابتجيبهاش غير في مرحلة
الدوبامين واللذة والجنون.. وما بيكملوش باقي المراحل.. عشان
كده إحنا اتبرمجنا إن لو ما فيش جنون يبقى مفيش حب..

واللي بيحصل إنه للأسف الهرمون ده مش بيستمر المخ في إفرازه كثير.. ده هرمون مرحلة الإعجاب بس.. ماينفعش المخ يفضل يفرزه على طول.. لازم هيقف إفراز الهرمون ده.. عشان الدنيا تمشي والناس تشتغل وتنتج ويبقى في استقرار ومسئولية، وساعتها بندخل في المرحلة اللي بعدها..

«اكتشاف العيوب»

وبتبقى الصدمة الكبرى.. بنشوف عيوب الشخص لأول مرة مع إننا بقالنا كثير أوي معاه.. فبنفتكر إن هو اللي اتغير.. بس الحقيقة العفريت هو اللي انصرف.

لو حصل التفاهم والنضج وتقبُّل الآخر.. ولو حصل إننا اتكيفنا على العيوب واتعايشنا معاه.. بتنتقل لمرحلة ثانية خالص..

الأوكسيتوسون.. Oxytocin ده بقى هرمون الحب الطويل.. العلماء اكتشفوا إن الهرمون ده بيكون موجود بنسب كبيرة جداً عند الأزواج السعداء والمتفاهمين.. بيزيد نسبة إفرازه جداً بالعناق والتدليل والاهتمام المتبادل.. ومع إفرازه بنحس إننا عايشين في قصة حب طويلة.. ناضجة.. أساسها التفاهم والمودة والرحمة.. وهو ده الحب اللي يجذ.. اللي مش بيخلص عشان ما فيهوش غشاوة.. كل واحد فينا عارف عيوب الثاني.. ومتقبلها.. ويحبه رغم عيوبه.. وعارف يتعايش معاه ويطلع أحلى ما فيه.

تعليم السواقة



كلنا قبل ما نتعلم السواقة بنشوف اللي بيعرف يسوق ده
بيعمل عمل خارق وهو معدي من جنب التريلا وبيتكلم في
الموبايل..

ولما نيجي نتعلم السواقة.. بنحس إنه صعب جدًا إني أوزن
بين رجلي اليمين والشمال عشان العربية بس تقف وتمشي..

ولما بنكتشف إن لسه فيه فتيس نمسكه بإيد ودر كسيون بالإيد
الثانية.. ونستخدم إيدينا الاتنين مع رجلينا.. بيبقى تحدي..
مش بس كده لأ وعيننا لازم تكون شايقة أربع اتجاهات مرآيتين
يمين وشمال ومرآية في النص واحنا في نفس الوقت باصين
قُدَامنا عادي.. بنحس ساعتها إن إحنا عندنا قدرات فظيعة..

بنفضل أول فترة أعصابنا مشدودة مش عايزين اللي جنبنا
يتكلم.. والموبايل silent ما ينفعش يرن.. وكل العربيات اللي
حوالينا ما عندهاش دم ومش مقدرة ظروفنا.. وبنسوق بتركيز
وبكامل حواسنا..

نيجي بقى بعد كام شهر كده.. نلاقينا إحنا وبنفس العربية بس بنسوق بهدوء والراديو شغال.. وبنكلم اللي جانينا عادي وبنبعت مسج من الموبايل.. وبعد شويتين وكام شهر كان هتعملي كل ده وتلقني تسلكي خناقة العيال اللي ورا.. ولو نازلة مستعجلة شوية هتكملي ال make up بتاعك في مراية العربية اللي في النص والساندوتش بإيدك الثانية وبرضو بتكلمي في الموبايل وانتي طالعة على الدائري وعينك يمين عشان ماتكريش على حد.. وشمال عشان التريلا اللي جاية بسرعة.. «الي وراكي بيستم طول الوقت ده طبيعي»
ده مثال على حياتنا العملية..

البيت قبل ماتتجوز بتبقى متدلعة في بيت أهلها.. وإذا اشتغلت بترجع تنام وماهش دعوة بأي حاجة.. طيب لما بتتجوز.. بتفضل توزن بين الشغل ومسؤوليات البيت يمين وشمال لحد الدنيا ماتمشي..

وبعدين تبدأ تكتشف إن فيه حياة اجتماعية وزيارات أسرية وواجبات لازم تقوم بيها وعينها تبقى عليها.. ويبقى تحدي.. وأول ما تاخذ على الحياة.. بعد كام شهر تلاقى بقى فيه أطفال.. وتبدأ تعيش وهي مستخدمة كل حواسها.. بيت.. شغل.. زيارات.. أطفال.. في الفترة الأولانية بتبقى أعصابنا مشدودة وكل الناس مش مقدرة ظروفا وماحدث حاسس بينا..
وكان فترة تبدأ تكتشف قدرات أكبر بتعملها جنب البيت

والشغل والواجبات والالتزمات .. لأكمان بتربي عيالها في سن
المراهقة وواحدة بالها من نفسها ومن جوزها واحتياجاته ..
وبقى ليها مشروع خاص بيها أو هوايات وحياة ..

طيب عشان نفضل سايقين ومهاراتنا تزيد من غير ما
« نخيش » أو نعطل أو نلبس في حاجة .. لازم يبقى عندنا هدف
هايزين نوصله .. ماينفعش نفضل سايقين وخلص ..
لازم بقى محددين الطريق اللي هنمشي فيه عشان مانتوهش ..
لو فضلنا سايقين وماشين كده من غير هدف البنزين هيخلص
ومش هنوصل لأي حنة ..

وعشان نختصر الطريق .. اكتبني أهدافك في ورقة .. اعرفني
إيه أقصر طريق توصلني منه .. اتعلمي المهارات اللي توصلك
بسهولة .. اعرفني إن أي حاجة صعبة في الأول وبعدين بتبقى
أسهل من أي حاجة تانية بالصبر والتعلم والتدريب والممارسة ..
استمتعي في طريق حياتك لحد ما توصلي بالسلامة.

ماري منيب



البنـت: ماما مامااااا أنا جايلي عريس ..

الأم: ألف نهاااار أبيض .. احكي لي بقى إيه إمكانياته .. غني؟

البنـت: لأ ..

الأم: يبقى شغال في الخليج.

البنـت: برضو لأ.

الأم: طيب عنده شقة؟ معاه عربية؟

البنـت: لأ خالص ولا أي حاجة من الحاجات دي - ابتسامة

عريضة

الأم: أومال عايزة تتجوزيه على إيه يا موكوسة؟

البنـت: أصل مامته ميتة ومالوش اخوات بنات هع هع هع

- ضحكات متقطعة شريرة -

للأسف الحديث ده بقى منتشر جداً.. وفيه فعلاً بنات بتعتبر

إن العريس الي مامته متوفية أو مسافر بعيد عن أهله يبقى
عريس لقطه..

بس هو إيه الي خلاها تعتقد كده أصلاً..؟

ما هي شايفة جدتها منكدة على مامتها بقالها عشرين سنة..
وأختها كل ما تروح تزور حماتها ترجع معيطة.. طيب هو في إيه
بقي؟.. هاه في إيه؟

في شوية حاجات كده.. هقولك عليها عشان لما تبقي حما..
ماتبقيش شبه ماري منيب ومرات ابنك تجبك وتدعي ربنا
يطول في عمرك كده وابنك يفضل يحب يزورك ومايشيلش هم
النكد والشكوى الي بتيجي من ورا زيارتك..

- المفروض إنك بتفضلي تربى في ابنك وتزرعي فيه كل الي
انتي عايزاه لحد ما بييجي اليوم وتسيبيه يواجه المجتمع لوحده..
ساعتها سُلطتك عليه بتبقى استشاريه بس.. ودورك في تربيته
بيبقى انتهى.. ماينفعلش تفضلي تديله في أوامر وتنصحي فيه بعد
ما يتجوز.. لأن ده هيعتبر تقصير منك.. ومرات ابنك هتعتبرك
مالحقتيش تربيته..

خدي بالك انتي قدامك عشرين سنة هتربي فيهم ابنك..
وتعرفيه الصبح من الغلط.. وإزاي يبقى ناصح وهو يشتري أي
حاجة.. مش لازم تستني وهو يمضي القايمة ويشترى العفش
عشان تبتدي تنصحيه..

- العشرين ثلاثين سنة الي ابنك قاعدهم معاكي هُما دول

اللي هيتعلم فيهم إزاي يعامل مراته.. يعني لو انتي ربتيه إنه يشيل مسئولية أخته ويعاملها باحترام ورقى.. وكبر شاف باباه بيعاملك برضو بأخلاق ورُقِيّ.. هيعامل مراته كده بالظبط.. وساعتها مهما قُلتيله ونصحتيه.. هيفضل يعاملها زي ما اتعلم وشاف باباه.. مش محتاجة أقولك إن مرات ابنك هتعرف جوزك كان بيعاملك إزاي لو حدها من غير ما حد يحكيلها..

- اختيار ابنك لزوجته إنتي السبب فيه.. يعني لو انتي ربتيه على إن أهم حاجة المظاهر.. وشكلنا قُدَّام الناس.. هيتخار عروسته على الأساس ده.. ولو انتي ربتيه على إنه يختار صحابه على أساس أخلاقهم ودينهم.. تلقائي هيتخار عروسته بنفس الطريقة.. ولو فهَمْتيه إن أهم حاجة تبقى بيضا وملونة.. مش هيهمه فيها أي حاجة تانية.. لا أخلاق بقى ولا هتعامل أمه ازاي.. ولا أي حاجة.. فها ترجعيش تزعلي..

- دلوقتي انتي كبرتي وعندك خبرة كفاية وما بقتيش صغيرة.. وسنك بقى كبير.. وبتفهمي كويس في الناس.. يعني لما توافقني على عروسة ابنك وتبدأي تعزميها وتجييلها هدايا.. يعني انتي عرفتي إنها كويسة وبنيت ناس ومحترمة وتستاهل تاخذ ابنك.. وأي تغيير في رأيك بعد كده بعد الجواز هيبقى انتي السبب فيه.. يعني من الآخر هي كانت كويسة وزى الفل لحد ما انتي قلبتي عليها وما بقتيش طايقاها.. فطلَّعتني الوحش اللي جواها.. وهي هتبقى فاهمة إنك بدأتي تغيري منها.

هي في الأول وفي الآخر عيلة صغيرة.. مالهش خبرة في تعامل الناس.. وماتعرفش المفروض تتعامل معاكي إزاي.. وعمرك ضعف عمرها.. يبقى انتي المسئولة إنك تبني علاقة كويسة بينك وبينها.. هي بتبقى قلقانة من اللي شافته وسمعتة.. وبتبقى مرعوبة من حاجة اسمها «حما».. فاحتويها انتي وطمينها.. وربها إنك مختلفة.. وانك تحبي تشوفي ابنك سعيد في بيته مع مراته..

- فاكرة أول ما التجوزتي.. وانتي لسه فرحانة بنفسك وانتي لسه عروسة.. وفرحانة بدلع اللي حواليك ليكي ليكي.. عروسة ابنك هتبقى زيك بالطبط.. مستنياكي تدلعيها.. يعني ما تستنيهاش تجيلك عشان تشطبك المطبخ ولأ تقف تطبخ معاكي من أول اليوم.. هي ضيفة على فكرة.. مش مطلوب منها أي حاجة.. طالما بتيجي تزورك وتروح يبقى تعاملها معاملة الضيوف.. وزيادة شوية عشان دي هتبقى أم أحفادك.. قرة عينك..

- مش انتي بتكرهي جارتك الحشرية.. وبتهربي منها؟ ابنك ومراته دلوقتي بقى ليهم بيت.. وخصوصيات.. ومش المفروض إن أي حد يتدخل في حياتهم.. ومش كل ما اشتروا حاجة تقوليلهم ولازمتة إيه.. هي مصاريف وخلص.. هُمَّا أدري باحتياجاتهم.. ولا تنصحي إلا لما يطلبوا منك النصيحة.. عشان المفروض إنهم كبروا خلاص وبيتصرفوا لوحدهم.. ما حدش ليه حق يسألهم هتخلفوا إمتى.. ولا هتسموا إيه.. ولأ أكَلوا ولا دكوا عشان شكلهم هفتان..

ماتدخليش في طريقة تربيتهم لولادهم.. هُمَّا أكيد بيحبوهم
وعارفين مصلحتهم..

- بلاش تنقدي في مرات ابنك قُدَّامه.. بالعكس داري
أخطاءها.. وانصحيها بينك وبينها..

حسسيها إنها مهمة عندك زي بتك بالظبط.. عشان تكسبي
ثقتها وتلاقيها بتلجالك في كل مشاكلها..

- بلاش تغيري من مرات ابنك لما تلاقيه مدلعها ومغليها
سعيدة في بيته.. عشان أذ ما كانت هي مرتاحة وسعيدة.. أذ ما
هدلع ابنك وتسعده..

وأذ ما انتي بتحبي ابنك.. أذ ما المفروض تتميله إنه يبقى
سعيد في بيته مع مراته..

إنتي أكثر واحدة عارفة البنت بتفرق أذ إيه في حياة مامتها..
فخُديها بنتك..

معلش.. كبرتك بدري.. بدري.. بس يلا.. الحقي اشبعي
منه دلوقتي.. وربيه التربية اللي تريحك لما تكبري
واختاريله انتي مراته بطريقة تربيتك ليه.

فتى أحلامي



كل واحدة ست مألوفة لجوزها كتيب تشغيل خاص بيه
لو حده.. راسمة له صورة معينة في دماغها من وهي صغيرة..
من ساعة ما كانوا يبسألوها إيه مواصفات فتى أحلامك
وكانت تقعد تعدلهم أول حاجة.. وتاني حاجة.. وتالت حاجة..
وأي حاجة بتحصل بعد كده تخالف توقعاتها بتسبب لها
إحباط وحنقة.

لو ما عبّش عن حبه بالطريقة اللي هي عايزاها بالظبط
يبقى ما يبجهاش..

لو ما اهتمش بيها بالطريقة اللي في خيالها بالظبط.. يبقى
مقصر..

مألوفة كتيب للشروط والمواصفات للسلوكيات المطلوبة منها
عشان ترضي مشاعرها..

توقعاتها هي قواعد اللعبة.. لو ماتبعاش يبقى فشل..

والقاعدة الأولى: لو تصرفاته لم تتطابق على توقعاتي هعيط..
وهكتيب وأشتكي لكل الناس.

كل واحدة حاطة جوه دماغها قواعد للزوج المثالي تتوافق
مع قناعاتها وخبراتها واحتياجاتها.. لو خرج عن النص يبقى
شخص غير مسئول.

بس انتي نسيتي قاعدة مهمة جدًا.. «جوزك حُر»
حُر في الطريقة اللي يعبرلك بيها عن حبه..
حُر يعبر إمتى وفين وازاي.. حُر حتى إنه مايعبرش..
حُر يحكي أو ما يحكيش..
حُر زيك بالضبط..

والدليل على حرته إننا مش بنعرف نجبرهم على حاجة هُما
رافضينها.. وده بيدينا إحنا إحساس بالعجز والقهر..
ينفع تجربيه ياكل جاتوه وهو لسه ما اتغداش؟ هو ده بالضبط
إحساسه لما تقوليله قولي «بيحبك».. ويقولك «مش وقته» ده
مش معناه إنه مش بيحبك.. هو بس.. مش وقته.
في الحالة دي الست بتقرع أجراس الإنذار إيذانا ببدء الحرب..
حرب الأفكار السلبية..

اللي بتتحول بعد كده لمحكمة لإصدار الأحكام ليتم تداولها
في أستوديوهات التحليل التليفوني مع الأصدقاء.. والمتهم بريء.
طيب أنا كزوجة عندي احتياجات ومشاعر عايزة أشبعها..

هايزة أحس بالاحتواء والاهتمام.. عايضة أحس إنه بيحبنى..
هايزة أسمع كلام حلو.. عايضة حد يعمل مفاجأة.. يجييلي
هدية.. ورد.. خاتم.. تقدرني تطلبني منه اللي انتي عايضاه.. بس
من غير ما تعلقني مشاعرك على سلوكياته.. يعني أنا عايضة كذا
بس مش هكتشب لو ما حصلش..

تخيلي لو قُلتلك: خدي بالك انتي المسئولة مسؤولة كاملة
هن احتياجات زوجك العاطفية.. وتوقعاته اللي رسمها لك في
لهاله.. ومسئولة عن كل المشاعر السلبية اللي هيحس بيها لو
التي قصرتي أو مافهمتيهوش أو ما أشبعتيش رغباته..

تخيلي حياتك هتبقى عاملة إزاي؟

ده انتي مش هتخرجي من البيت وهتبقى عاملة زي النحلة..

سعادته صحي..

سعادته خرج من الحمام..

سعادته نام..

سعادته جعان..

سعادته زهقان..

كارثة بكل المقاييس إنك تكوني مسؤولة عن مشاعر بني
آدم، مسؤولة عظيمة ما حدش في الدنيا يقدر يتحملها أكثر من
ساعتين..

وكارثة إنك تعلقني مشاعرك على حد غيرك.. إنك تسلمي
مفتاح سعادتك أو حزنك لحد غيرك يتحكم فيها كيفما شاء..

لو ما عملش كذا هتضايق.. ولو عمل كذا هفرح.. عمري
ما هستريح غير لما يعمل كذا..
مستحيل تقدرني تتحكمي في سلوكياته بالشكل اللي يرضيك
طول الوقت..
عشان كده لازم تحرري مشاعرك من سُلطة أي حد حتى لو
أقرب الناس ليكي..
خليكي مسئولة مسئولية كاملة عن مشاعرك..
خليكي قوية ومستقلة.. خليكي «سترونج إنديبندينت
وومان..»

في قبضة يدي

«بصوت عفروتو أو هنيدي»



- تفتكري إيه اللي ممكن جوزك يعمله عشان تبقي أسعد
واحدة في الدنيا؟

- عايزاه يهتم بيّ أكثر ويجكيلي مشاكله وياخذ رأيي.

- ليه؟

- عشان ده هيسطني أكثر ويجسني إنه بيحترمني.

- طيب لو ماعملش كده إيه اللي هيجصل؟

- همس إنه بيقلل مني ومايحترمنيش وإني ماليش لازمة في

حياته.

- إنتي لسه بتعلقني مشاعرك على سلوكياته؟ المقال اللي فات

ده مآثرش فيكي خالص؟

مين قالك إنه لو ماخذش رأيك يبق مايحترمكيش؟

دماغك وتفكيرك هو اللي أوحى ليكي بكده..

لو عرفتسي إنه مش بيحكيلك مشاكله عشان مش عايز
بضايقك ولا يقلقك.. أو خايف ثقتك فيه تهز لو حسيتي إنه
محتاس ومش عارف يحل مشكلته لوحدك..

لسه متحسبي إنه يقلل منك؟ ولأ لما الأفكار اللي في دماغك
اتغيرت مشاعرك كمان اتغيرت لحب أكثر وتقدير واحترام أكثر؟
نفسك جوزك يعبرلك عن حبه إزاي؟

- نفسي يبقى رومانسي ونفسي يجيبي هدايا ويعملي مفاجآت كثير.

- طيب لو ماعملش كده متحسبي إنه بيحبك ولا لا؟

لو إجابتك لأ يبقى من فضلك ارجعي اقري المقال اللي
فات تاني..

إنما لو إجابتك.. «أه عادي أنا كده كده عارفة إنه بيحبني»

ببقى انتي تمام ومفيس حد بيتحكم في مشاعرك.. يبقى انتي قوية
وأفكارك بس هي اللي بتحدد مشاعرك مش سلوكيات الآخرين..

دلوقتي انتي مش محتاجة تغيري سلوك حد عشان تبقي
أحسن.. إنتي بس محتاجة تنقي أفكارك.

وتقدري تظمني طول ما تفكيرك إيجابي.. متحسبي بالسعادة
والرضا وراحة البال..

التعويذة الأولى



- الست بتحب الراجل لسبيين.. إما إنه حسسها بانوثتها..
أو حسسها بذكائها.

- لو حبتيه هتحمريمه.. بس لو ما احترمته هوش مستحيل
تحييه.

- كوني له أنشى يكن لك رجلاً.. كوني له أمّا يكن لك
ابنًا.. وغير مسؤل كمان.

- خُلِقَ الزواج للاستمتاع.. مش لتعلم الصبر على البلاء.

- الحب بين أي اثنين متجوزين عامل زي المضاد الحيوي..
من غيره ممكن العلاقة بينا تموت من أي جرح صغير.

- ماتستنيش من أي حد يساعدك.. أو حتى يشجعك..
اوصلي لو حدك.

- الكلمة الحلوة مش بتطلب.. لما تعوزي تسمعيها قوليهاله
انتبي.

- ماتستخريش في نفسك حاجة.. حتى لو غالية.. مفيش حاجة تغلى عليكى..

- كفي جوزك وخليه شبعان.. في الأكل والكلمة الحلوة وكل حاجة تانية .

- ماتخليش حد يتدخل في حياتك.. خلي عندك خصوصية حتى لأقرب الناس ليكي.

- الخلق المدور الكبير.. والكعب العالي.. والزوج.. حاجات مهمة لازم جوزك يشوفك بيها..

نجاحك مسؤوليتك انتي بس.. مش مسؤولية أهلك أو جوزك أو صحابك.

الفصل الرابع

مارلين مونرو

اعطأ أي فتاة الحذاء الصحيح. وسوف تغزو العالم

مارلين مونرو

ربنا سبحانه وتعالى لما جبه يوصف علاقة الزوج بزوجه
قال: "هن لباس لكم وأنتم لباس لهن"

المقصود باللباس هو اللبس اللي بنلبسه.. طيب ده إيه علاقته
بالزواج؟

يمكن المقصود إنهم بيداروا عيوب بعض زي اللبس؟

يمكن عشان بيحموا بعض من الفاحشة؟

أو المقصود إنهم بيجمّلوا بعض ويظهروا بشكل جميل؟

ولا المقصود الدفا والاحتواء وسد النقص والاحتياج؟

كل الكلام ده بيدل على التوازن.. وإن الرجل والست يكملوا

بعض ..

وإن لو كل واحد قام بدوره مطبوط الحياة هتستقيم..

التوازن الصحيح منبعه من الداخل..

أكبر متعة عند الست إنها تتشاف حلوة.. وتسمع إنها حلوة

بنفسها ..

فعشان تتشاف حلوة بتدفع فلوس كتير في اللبس والمكياج

والكريمات والصبغات.. ودكاترة الدايت والجيم.. أو تسروح

تتعلم وتنجح وتميز.. حب الظهور وحب الثناء فطرة جوة كل

أنشى من. وهي عندها 3 سنين ولا بسنة شنطة مامتها وجزمتها

اللي بكعب.. حب الطفلة دي للمانيكير والقصة أكبر دليل على

فطرتها الأنثوية..

لما بتكبر البنات الفطرة دي بتزيد وبتبقى شهوة.. شهوة الشوبنج.. شهوة المكياج.. شهوة الكلام الحلو اللي نفسها تسمعه ولو جوزها ما قالوش هتبقى نكد علينا كلنا.. شهوة حب الظهور وحب التزين..

جايز ربنا أمرنا بالحجاب عشان يختبر طاعتنا ليه في الدنيا.. أمرنا بكبح شهواتنا.. فقال: "لا تبدين زينتهن إلا لبعولتهن" بس من رحمته بينا إنه ماكانش أمر مطلق.. هو قننه بس للزوج.. وإلا كانت الشهوة بقت مرض..

الرجل كمان ربنا لما جه يختبره في الدنيا أمره بكبح شهواته.. أكبر شهوة عند الرجال هي الستات.. بيحب يشوفهم.. فأمرهم بغض البصر..

وبرضو من رحمته بيهم إنه مش أمر مطلق.. لأ هو أمره بغض البصر بَرَّه بيته ويأطلاق بصره في بيته وزوجته..

دي الفطرة اللي ربنا خلقنا عليها.. ودي الحدود اللي حطها لنا.. لو خرجنا براها ميزان الحياة بيختل.. والزوج يشتكي من إهمال زوجته لنفسها والزوجة تشتكي من الخيانة..

فعشان أحقق التوازن ده في حياتي لازم أظبط طاقتي الأنثوية وأعززها..

مهم إنى أحب نفسي وأقبلها واستشعر القوة الناعمة اللي جوايا..

واعرف مداها وممكن توصلني لحد فين..

مارلين مونرو قالت في مرة "أعطي أي فتاة الحذاء الصحيح
وسوف تغزو العالم"

مارلين مونرو.. أنثى مكتملة الأنوثة.. معتزة جدًا بنفسها
وبكونها أنثى.. عرفت القوة من وراء أنوثتها واستخدمتها
بالطريقة التي تخدم طموحها..

بس البسي الحذاء اللي يناسبك.. اعرفي قدراتك.. واستغليها..
أطلقني عواطفك وعبري عنها..

ابعدي عن الصوت العالي والصفات الذكورية وأساليبهم في
التعبير..

اسمعي صوتك الداخلي..

اهتمي بنفسك.. ارتدي الملابس الأنثوية..

اقتني العطور والزهور..

اهتمي بلبسك.. ضو افرك.. رموشك.. شعرك..

مفيش حاجة اسمها كان زمان ولأ راحت عليًا ولا ما
اتعودتش.. هي دي الفطرة اللي ربنا فطرنا عليها "حب التزين"

على فكرة كل ما زادت أنوثتك كل ما زادت ثقتك بنفسك..

كل ما كتتي قوية..

خلي ثقتك تنبع من داخلك.. استخدمتي قوتك.. الأنوثة
قوة فتاكة.. طاقة مهولة ممكن توصلك لكل أحلامك..

في علوم الطاقة حاجة اسمها "طاقة ذكورية" و"طاقة أنثوية"

كل ما زادت الطاقة الذكورية في جسم الرجل ييصنف رجل
بجد.. مش ذكر في البطاقة.

وكل ما زادت الطاقة الأنثوية في جسم الست كانت أنثى
بجد.

المسئول عن الطاقة الذكورية في الجسم هو هرمون الذكورة
التستوستيرون..

والمسئول عن الطاقة الأنثوية في الجسم هو هرمون الأنوثة
الإستروجين..

جسم الإنسان ذَكر أو أنثى يجمع بين الهرمونين دول
(التستوستيرون والاسْتروجين) بس بِنَسَب مختلفة..

في الرجل كل ما زاد مستوى هرمون التستوستيرون هيقبل
مستوى الإستروجين..

وبالتالي هتزيد صفاته الذكورية زي تحمُّله للمسئولية..
التحدي.. القيادة.. المنافسة.. السيطرة.. المغامرة والإصرار..
الحماية..

ولو حصل أي خلل في نسبة هرمون الذكورة هترتفع نسبة
هرمون الأنوثة وسلوكياته هتختل وتميل ناحية السلوكيات
الأنثوية..

والعكس لو تبنى السلوكيات الأنثوية.. أو زاد احتكاكه
بالنساء.. زادت ليونته وزادت هرموناته الأنثوية..

وده بيظهر جدًّا في حالات المراهقة مثلاً لما بيكون الولد عنده

الحوات بنات كثير أو القائم على تربيته أمه فقط في حالة غياب الأب..

بنشوف الحالة دي في الرجل اللي قاعد في البيت ومستني زوجته تصرف عليه..

وبنشوفها كمان في الرجل اللي بيثه عمله معتمدة أساساً على النساء فبنلاحظ تأثره باهتماماتهم وبطريقة كلامهم..

عكس لما بيكون الرجل كل تعاملاته مع ذكور في بيته عمله.. وكل ما قل احتكاكه بالنساء زاد جأشه وفضاظته..

طيب بالنسبة للستات..

هي كمان جسمها بيحمل هرمونات الأنوثة والذكورة سوا.. وكل ما زادت صفاتها الأنثوية زي الحنان.. العواطف.. الليونة.. التعبير عن الحب.. الاحتواء.. التواصل.. المشاعر.. كل ما زادت نسبة الأستروجين في جسمها وقلّت نسبة التستوستيرون أو هرمونات الذكورة.. وبالتالي هتزيد طاقتها الأنثوية جداً..

والعكس كمان.. كل ما بعدت عن صفاتها الأنثوية.. وأصبحت مشاعرها جافة.. وزادت نسبة تحملها للمسئولية.. وكل ما زاد الإصرار والتحدي والعند وكل ما زاد احتكاكها بالذكور هتكتسب أكثر من صفاتهم وهتقل طاقتها الأنثوية وتزيد هرموناتها الذكورية..

وده كثير بنشوفه في ستات وبينعكس على طريقة كلامها وطريقة لبسها.. في خوشنة صوتها ومشيتها.. بنشوفه في

استنكارها لأنوثتها ويُعدها عنها ويذُل مجهود كبير في إنها تثبت
إنها زي الرجال وأحسن منهم..

هنا بقى ومن المنطلق ده وبنلاقى ناس كثير رفعت رايات إن
الست مالهش غير بيتها.. وإنها ماينفعلش تشتغل أصلاً.. وتقعده
بقى في البيت عشان تبقى ست الستات وجوزها مايبصش بره..
برضه الكلام ده مش مطبوط..

السيدة خديجة أم المؤمنين رضي الله عنها كانت تاجرة يعني
سيدة أعمال.. ومن أغنياء قريش ومع ذلك سيدنا النبي عليه
أفضل الصلاة والسلام كان يحبها جداً وقدرها عنده كبير.
الست مش بضعفها.. ولا بقعدتها في البيت..

وخضوع المرأة لزوجها مش معناه إنها تلغي شخصيتها
وطموحها وتضحى بمستقبلها..

الطاقة الأنثوية مش هتجلى لما تبقى مغلوبة على أمرك..
الأنوثة قوة محتاجين نتعلم ونتدرب إزاي نستخدمها..
ربنا سبحانه وتعالى خلقنا الكون متوازن..

خلق النهار والليل..

خلق الحركة والسكون..

خلق الشمس والقمر..

كمان خلق الذكر والأنثى..

علشان أحافظ على التوازن في حياتي لازم أحافظ على طاقتي

الأنثوية وأعزها وأقويها..

الطاقة الأنثوية العالية بتجذب طاقة ذكورية عالية.. زي
المفناطيس..

يعني كل ما هتكون صفاتك الأنثوية عالية هتجذب رجل ذا
صفات رجولية عالية بروضو.

ده كمان معناه إن الست اللي بتشتكي إن زوجها مش بيثيل
المسئولية عنده خلل في طاقته الذكورية وهي كمان عندها خلل
لي طاقتها الأنثوية..

والزوج اللي بيشتكي إن زوجته مش حنينة أو مقصرة في
حقوقه أو حاسس إنها واحد صاحبه ده منك انت.. راجع
طاقتك الذكورية..

إعرف إزاي تطلع الأنثى اللي جواها وطاقة الحنان المدفونة
جُوّه.. إعرف إزاي توصل للكنز.

القوة الناعمة



أحيانًا بنشوف في دايرة العيلة.. أو الجيران أو الصحاب.. رجل.. زوج.. من النوع النادر جدًا.. تلاقيه كده دايمًا مدلع مراته.. وجتل معاها ومع كل صاحباتها.. بيخاف عليها من الهوا الطاير.. مايبخليهاش تشيل حاجة أو تشتري حاجة.. واخذ باله جدًا منها.. وعلى طول تلاقيه حاطط إيدته على كتفها ويطبطب عليها قدام الناس عادي.. على طول بيتكلم عليها وييشكر فيها من كتر حنانه عليها تحسيها بنته.

بيلفت نظرنا جدًا علاقتهم ببعض.. أد إيه راقية وازاي هر ما بيرفضلهاش طلب.. بيخاف على زعلها.. ويحب يرضيها لو دورنا بقى ورا الست.. بنلاقيها ست شيك أوي.. رقيقة كده وواخده بالها من كل تفصيلة فيها.. صوتها واطي ولسانها بينقط سُكَّر كده وعلى طول شقتها مرتبة.. وحياتها منظمة واخدة بالها من الناس اللي حوالها حنينة عندها مشاعر جياشة.. ذوق أوي.. تخافي تجرحيها بكلمة..

نموذج قليل أوي بس لسة بنشوفه ..
هو فعلاً الرقي .. بيجيب معاملة راقية .. والمعاملة الراقية
بيجيب حياة راقية ..
بس الأصل في كل حاجة هي الست ..
هي اللي بترسم كونتور العلاقة اللي بينها وبين أي حد
بتعامل معاه ..
"ما فيش راجل بيهتم بواحدة .. هي أصلاً مش مهتمة
بنفسها"
الملفت جداً في الموضوع ده إننا بنلاقي كل الناس اللي حواليتها
بيعاملوها بنفس المعاملة ..
وكانها هي ماتستحس غير كده ..
تلاقيهم عاملين حسابها أوي وبيخافوا على زعلها وبيعاملوها
نفس المعاملة الشيك أوي دي .. زي ما يكون في هالة حواليتها
ما ينفعش حد يخرقها .. ولا ينفع حد يرفضها طلب ..
ده ممكن يكون أحسن مثال عن "القوة الناعمة"
الست دي اهتمت بنفسها كأنثى .. فطاقتها الأنثوية بقت
هالية جداً .. والطاقة العالية دي انحولت ل power ..
قوة .. قوة ناعمة
بصي من الآخر كده ..
أحلى حاجة في الدنيا انك تكوني "انثي" بجدة

أحلى حاجة في الدنيا.. إنك تكوني زوجة بجد
أحلى حاجة في الدنيا.. إنك تأسري قلب جوزك..
إنتي التجوزي أصلاً عشان تعيشي سعيدة.. إوعي جوازك ده
يتحول للمأساة..

مفيش سبت غبية. بس في ست كسولة

الضيف



في الغالب متوسط الفترة الي يقضيها أي زوج في بيته
"صاحي" هي أربع ساعات..

أربع ساعات بس.. والعشرين الباقية هو مش موجود
أساساً..

يعني هو ضيف..

طيب لو جالك ضيف هينفع تفتحيله الباب وشعرك
منكوش وانتي لابسة هدوم البيت؟

طيب لو عرفتي إن فيه ضيف جايلك مش هتروقي
الريسبشن والحمام على الأقل؟

طيب هو ينفع والضيف موجود تقعدني تزعقي في عيالك
وصوتك يجيب تاتي شارع.. ولا هتكتفي بتريقة ولما يمشي تبقي
تعلقهم؟

ولو صحباتك هُما اللي جاين.. مش هتعملي باديكير قبلها
وتعملي شعرك بيبي ليس.. ولأ هتقابلهم بالكعوب المشققة
والبيجاما؟

طيب ولو الضيف ده بيحب الست المتدلعة هتاكلي قدامه
إزاي وتمشي ازاي وتضحكي ازاي؟

هو ينفع لما يجيلك ضيف تفضلي قاعدة على الكنبه
مقدميلوش حاجة وتقوليله مش قادرة للعينال مطلعين روعي
قوم انت اعمل الشاي واعملي معاك..

أنا عارفة إن كل الستات تعبانة بجد وشايلة مسؤوليات كبيرة
أوي.. وبتبذل مجهود جبار.

بس أنا بتكلم في أ - ب أنوثة.. أنوثتك دي ما ينفعش تضحكي
بيها عشان أي حاجة في الدنيا..
دي أغلى حاجة عندك..

ماينفعش تضيع منك بالأخص قُدام زوجك، ولا حتى بينك
وبين نفسك..

إوعي زوجك ما يحسش إنه متجوز "ست الستات"..
لازم تتدلعي وتتايمي وتبقي أجدع من سعاد حسني..
لو زوجك حس إنه متجوز أنشي بجد هيبقي هو راجل
بجد..

ساعتها هيتكسف يرمي عليك كل المسؤوليات..

ما هو مينفعش بسكوتة زيك كده تصلح الكوع اللي
اتكسر.. ولأ تغير اللبنة اللي اتحرقت.. ولأ تشيل كل الأكياس
دي وهي طالعة..

دلعي نفسك.. جوزك هيدلحك..

أنا عارفة إن في ناس كتير بيدور في دماغها كلام كتير زي "هو
مش ضيف.. هو عليه مسؤوليات أكثر مني"
"ولما أنا أدلعه هو بقى هيعمل إيه؟ ده المفروض هو اللي
يدلعني"

كلام جميل وأنا موافقة عليه جداً.. وبدعي كل ست إنها
ماتشيلش مسئولية كل حاجة في الدنيا وإنها تطالب بحقوقها
ومتبقاش سلبية..

بس قبل أي حاجة.. عارفة إيه هي حقوقك؟

الأول لازم تعرفي إيه هي حقوق الزوجة عشان تعرفي تطالبي
بيها ومايقاش كلام وخلاص..

- خدمة الزوجة لزوجها فضل منها مش واجب عليها..
ولو الزوج قادر.. لازم يجييلها اللي يساعدها في شغل البيت
"وفيه فتاوي كتير أوي طلعت الفترة اللي فاتت بتأكد المعني ده..
مش هأفور وأقول يجيب مرضعة.. بس لازم انتي تبقي عارفة إن
وقتك ويومك اللي بيضيع في المسح والكنس والطبخ والغسيل ده
مش واجب عليك.. ده فضل منك.. يعني لما تقصري فيه مش
من حق حد يجي يهينك ويزعقلك ويقولك الحمام مش يببرق

ليه ولأ الأكل اتحرق ليه.. ولأ إيه التراب اللي فوق التلاجة ده يا هانم.. من غير ما يعمل أي حساب لفرق الطول اللي بينكوا.. أو إنك أصلاً عمرك ما سُفتي اللي "فوق التلاجة ده".

وكلنا عارفين إن سيدنا النبي عليه الصلاة والسلام كان بيخيط ثوبه ويساعد أهل بيته..

وطبعًا لو هو غير قادر مادياً لازم تتحمليه عشان الزواج أصله المودة والرحمة مش هات وخذ.

- من حق الزوجة على زوجها إنه يصرف عليها وعلى أولادهم.. لو انتي اخترتي إنك تشتغلي عشان ترفعي من مستوى المعيشة.. لو سمحتي ماتسحلش نفسك برّه البيت وجوّه البيت.. هاتيلك شغالة من فلوسك تساعدك.. عشان في الآخر هتلاقي عمرك راح ما بين الشغل والبيت والولاد ومفيش أي متعة شخصية ليكي ولا حتى تملكلي رفاهية إنك تصحي من النوم براحتك .

- مش مطلوب منك إنك تضحكي أو تتنازلي عن حقوقك.. يعني ماينفعش ماتكمليش تعليمك عشان اتجوزتي.. وماينفعش تسيبي شغلك وتلغي شخصيتك وطموحك عشان خلّفتي.. ماينفعش تقطعي مع بنت خالتك أصله مايبحبش جوزها.. مش المفروض إنك تخدمي في بيت أهله.. أو تعزمي حد وانتي ما عندكيش اللي يساعدك.. مش المفروض إن انتي اللي توصلّي الولاد كل يوم المدارس والدروس والتمارين.. دي مسئولية مشتركة..

كل دول مش واجب شرعي عليكى .. لو عملتيهم يبقى كتر
الف خيرك وتاخدي حسنات عليهم .. وبرضو الجواز مش
هايت وخذ، ده مودة ورحمة وكل الكلام اللي فوق ده لو عملتيه
بنفسك متتهى الحب والمودة والرحمة .. بس الواجب الشرعي
بقى النقطة اللي جاية دي ..

حق الزوج على زوجته إنها تتزين ليه .. ويستمتع بيها وتسره
إذا نظر إليها .. ده كمان في الدين ..

إنتو بنفسكوا شايفين أدّيه نسبة الزواج التاني مرتفعة ..

والخيانة الزوجية ..

والخيانة الإلكترونية ..

والأفلام الإباحية ..

مابقاش فيه بيت إلا وشاف حاجة من المشاكل دي ..

ربنا يحفظلنا أزواجنا وبيوتنا ..

بس ده كله عشان الست أهملت نفسها وجت على حقوقها ..
وسابت الدلع والاهتمام بنفسها وجوزها .. وجريت وراتمارين العيال
والدروس والتنظيف والطبخ والمسئوليات اللي مابتخلصش ..

سابت الفرض اللي عليها وراحت للفضل .. فاختل الميزان
وأصبح مبرر الرجل للخيانة أو للزواج التاني أو حتي هروبه
للقهوة .. إنه مش لاقى زوجة .. يقول هي أم رائعة وماقدرش
أسيبها ولا أستغنى عنها .. بس أنا محتاج زوجة أنشى تلبى
احتياجاتي كرجل .

الأحمر العنابي



لما تلاقني إن علاقتك مع جوزك بقت مضطربة ومليانة
مشاكل..

أو إنك حاسة إنه بيععد وإنك مابقتيش من أولوياته..

وقبل ماتجري على الكوافير تقصي شعرك وتضريه الأحمر
العنابي التهام.. زي ما صاحبك نصحتك..

أو تروحي الجيم وتمشي على الدايت اللي ينزل خماسر كيلو
في الأسبوع..

"طبعا دول مشوارين مهمين ما أقدرش أعترض"

بس في حاجة أهم لازم نعرفها كلنا..

على فكرة مش لازم يبقى سبب نفور الزوج إن الزوجة
مقصرة في حقه.. لا بالعكس

ساعات تضحية الزوجة المفرطة واستمواتها إنها تضربه بيقوا
السبب..

ساعات الزوج يطفش لما يحس إن مراته ما عندهاش حاجة
غيره في حياتها.. مفيش اهتمامات عندها غير هياكل إيه وهيلبس
إيه وهيقعد معايا أد إيه..

ساعتها بس بيحس إنها مملّة.. فاضية.. مافيهاش جديد..
مواضيعها مكررة..

ساعتها بس بيبدأ يدوّر على حاجة جديدة.. مثيرة.. عندها
جديد تحكيه..

أنا ما قلتش إنه هيدوّر على واحدة تشاركه اهتماماته.. لا هو
هيدور على واحدة يشاركها اهتماماتها.. وتوريله دنيا جديدة..

طيب انتي عارفة إن كل أخصائين الاستشارات الزوجية
بيدينوا تضحية الزوجة عشان عارفين إن معظم الرجاله بيعتبروا
تضحية الست.. غباء وضعف..

إنتي عارفة إن دينك ما قالش إنك تضحى بحقوقك.. أيا
كانت عشان أي حد.. لا زوج ولا أولاد..

عارفة إن الرجل بيحب الست المستقلة مادياً وفكرياً واللي
عارفة حقوقها وبتحافظ عليها حتى لو بيّن العكس..

عايزة منه اهتمام.. اهتمي أنتي بنفسك..

عايزاه يحبك.. حبي أنتي نفسك..

عايزاه يحترمك.. احترمي أنتي حقوقك وأنوئك

واحتياجاتك..

الست قليلة الحيلة



نوع من الستات مُتفشي في مجتمعنا..
ده النوع اللي بيضغط على أعصاب كل اللي حواليه..
بس المشكلة بقى إن النوع ده من الستات مش ببيان غير بعد
الجواز..
دي الست اللي مابتعرفش تاخذ ثقتها بنفسها من تلقاء نفسها..
لازم حد يقولها إنتي حلوة.. إنتي جميلة.. أصلها قليلة الحيلة.
قليلة الحيلة اللي بتفقد أعصابها تمامًا وبتفقد سيطرتها على
أولادها.. النوع اللي بيصرخ فقط مش بيربي..
قليلة الحيلة اللي مقتنعة إنها لولا جوزها كان زمانها وزيرة..
بس هو اللي حطم مستقبلها..
قليلة الحيلة اللي بطلت تهتم بنفسها وبأنوثتها أصل جوزها
مش بيقدّر لها ولا يفرق معاه..

قليلة الخيلة اللي بتقول "أصل جوزي.. حماي.. أبويا.. ولادي
منكدين علياً عيشتي"

قليلة الخيلة اللي بتأخذ كل حاجة على نفسها.. بصتلي
وحش.. أصلها بتكرهني.. دي بتغير مني.. ماأخدش باله من
قصة شعري.. بطل يجيني..

ماعزمتنيش على فرحها.. ما قالتليش مبروك..

قليلة الخيلة ألي شايفة إن جوزها وأبوها وحماها والناس
والمجتمع جاين على حقها..

قليلة الخيلة اللي بترضى بالذل والإهانة وبأي ظروف تحت
مسمى.. "نصيبي كده"

قليلة الخيلة اللي ممكن تنكد على نفسها أسبوع لو لبست
واتشيكت وجوزها ماتحلهاش وقالها.. إيه الحلاوة دي.. أو
نسي عيد ميلادها أو جوازهم..

قليلة الخيلة اللي كل كلامها.. منهم الله.. وحسبي الله.. وأعمل
إيه.. وما باليد حيلة.. ودمّر حياتي.. وضيع مستقبلتي.. ولولاه
كان زمني.. وضحك علياً.. وعمره ما قالي.. وعمره ما عمل..
مئيل بختي..

ده نوع من الستات عنده سبب وشاعة لكل فشل..

ده نوع مُنفّر جداً.. يهرب منه مش بس الزوج.. لأ الولاد
كمان.. وصحابها وقرابيها..

ده نوع بيشرح طاقة إحباط وعجز وقهر..
نوع ييموت طاقة الأنوثة اللي جواه ويبدلها بطاقة عجز
وكسل واتكالية..
نوع كده.. قليل الحيلة

الفصل الخامس

فك شفرة الرجال

لم تستطعي بعد أن تتفهني.. أن الرجال جميعهم أطفال
فإذا وقفت أمام مسنك صامتاً.. فالصمت في مرم الجبال جمال

نزار قباني

"لا يستطيع العقل البشري التوقف عن التفكير"

عدد كبير من الخناقات بين المتجوزين بتبتيدي بالجملة دي..

لأول وهلة كده تحس إنها حقيقة علمية؛ بس الحقيقة إنها مقولة خزعبلية.. اتربينا عليها واحنا صغيرين.. ولما كبرنا بقت الـ pass word بتاع أي خناقة..

"بتفكر في إيه؟"

"ماهو مش طبعي أبداً حد يقعد متنح كده من غير ما يفكر في حاجة"

الأبحاث العلمية اكتشفت مؤخراً إن "الرجل" ممكن دماغه تقف عن التفكير ويفضل يتنفس وعاش عادي..

أكبر مشكلة ممكن تقابل المتزوجين عموماً.. هي الاختلافات اللي بين الذكر والأنثى..
اختلافات طريقة التفكير..

الاختلافات السلوكية والسيكولوجية والفسولوجية..

ساعات الست بتقيّم الرجل بمعايير في دماغها هي بس.. زي إنها تحطه في مقارنة مع صديقتها المقربة..

فلاقيها بتقول "هي بتسمعي أكثر منه.. بتفهمني من غير ما أشتكى.. بتديني الرأي اللي أنا عايزاه بالظبط"

طبعًا دي مقارنة ظالمة جدًا.. وده لأن mechanism التفكير عند الرجل مختلف تمامًا عن الستات.. صديقتك بس اللي ممكن تسمعك وتفهم انتي قصدك إيه وانتي بتتكلمي في موضوعين مختلفين وبتحكيها المسلسل اللي شغال قدامك في نفس الوقت.. إنها الرجل هيتوه منك.. وبعد ما هتخلصي كلامك هيقولك أيعني انتي عايزة إيه دلوقتي؟"

صديقتك بس اللي هتفهم رسايلك الخفية وجمل التورية والمعاني المستخفية.. إنها الرجل عايز جملة واحدة صريحة مباشرة. في حاجة في دماغ الرجل اسمها ال empty box.. أو الصندوق الفارغ..

لما مايردش عليكى أو تلاقيه متنح وشكله غريب.. كده هو دخل الصندوق الفارغ بتاعه..

هو بيبقى عايز يشحن.. أو يفقّي دماغه من التفاصيل بتاعة اليوم..

عقل الرجل كله صناديق..

صندوق الشغل.. وصندوق للبيت.. وواحد للصحاب وواحد للأولاد.. عريته قاعده في صندوق لوحدها..

عشان كده مايبعرفش يفكر في كذا حاجة مع بعض.. لازم يخرج من صندوق ويقفل التاني..

وعشان كده برضو مايبعرفش يجاوب على أسئلتك الفجائية..

لازم ياخذ شوية وقت يقفل الصندوق اللي قاعد فيه

ويفتحلك الخاص بسؤالك.. أو باقتراحك.. بس ستات كثير
ممکن تفتكر إنه كده بيكدب عليها طالما خد وقت في إجابة
السؤال..

فلما تطلبني طلب فجأة ماتصريش إنه يرد عليك في نفس
الوقت عشان غالبًا هيكون رده "لأعشان أنا ما بحبش الأمر
الواقع"

فالأفضل إنك تطلبني طلبك وقوليله فكر براحتك ورد عليًا.
ال software بتاع دماغ الرجل مختلف جدًا عن الستات..
إحنا كستات بتخيل إن أي جهاز كمبيوتر في الدنيا هنتحبه
هيفتحلنا windows عادي..

بس لما بتجوز بتفاجع إن فيه Softwares تانية.. وإن كمبيوتر
ال Mac مايفتحش زي ما إحنا حافظين..

مع الوقت والممارسة.. ومع التركيز والخبرة.. هتعر في عملي
update للـ software وتنزلي برامج و applications جديدة وتمسحي
القديم.

بس عشان توصلي للمرحلة دي من الاحترافية لازم تعدي
بالمرحلة الأولى.. إنك تقري ال manual بتاع الرجل الأول أو
الكتالوج..

الكتالوج

فيه شوية حقايق لازم تعرفيها عن الرجالة بالذات لو
متجوزة جديد..

أولاً: في ارتباط وثيق بين الرجل والكنبة اللي قدام التلفزيون
لما تحاوليش تزحزحها من مكانها.. كده هتبعد عن الفيشة ومش
هيعرف يشحن موبايله.. بلاش مشاكل"

فيه ارتباط وثيق بين إيد الرجل والريموت.. أو إيده ودراع
البلاي ستيشن.. ماتحاوليش تدخل ما بينهم..

ماتحاوليش تقويله هات أي حاجة من التلاجة.. ولا حتى
قميصك الأزرق من رف الدولاب اللي في النص.. إنسي مش
هيشوفهم.. باب التلاجة أو الدولاب بالنسبة له فتحة على
العدم والظلام..

عادي جداً يبقى في أكلة بيعبها وييجي يوم ما تعملها له
يقولك إيه ده أنا ما بحبش الأكلة دي أصلاً.. ماتتخضيش هو
كويس.. هو بس مالوش مزاج ليها أو زهقان منها.. بطلي
تعملها فترة كده وهو هيسألك عليها بنفسه..

مش معنى إنه قالك بلاش ننزل النهارده عشان مش قادر..
يبقى مش هينزل لما صاحبه يكلمه يقوله على بولة الاستيمشن
الي على القهوة.. هو مش قادر على الفرهدة بتاعت اللف على
المحلات والشوبنج بتاعنا.. بس قاعدة القهوة بالنسبة له مريحة
زي قاعدة الكنبة اللي قدام التلفزيون بالظبط..

مهما تكوني متضايقه أو زعلانه.. لو سألك مالك وانتي
قتيله "مفيش حاجة" هيصدقك.. فماتفتكر يش إنه واخذ باله
ومطنش.. هو فعلاً مصدقك..

لما تكونوا في مكان زحمة وفيه ناس كثير لو لاحظتني إن في واحدة واخدة بالها منه شوية.. أو مركزة معاه.. إوعي تتخانقي أو تعملي مشكلة.... هو أصلاً مش شايفها.. التفاصيل الصغيرة دي انتي وهي بس اللي بتشوفوها.. الرجالة لأ.. بس إحنا دايمًا اللي بنلفت نظرهم ونفتح عندهم..

هو مش زهقان منك ولا مش عايز يتكلم معاك.. هو بس مش بيعرف يركب في كذا حاجة مع بعض.. استني لما الماتش يخلص أو الفيلم أو حتى لما يربط رباط الجزمة وقويله اللي انتي عايزاه.. كده هيركز أكثر..

وعلى فكرة.. لما يجي يقولك "إنتي أول مرة تقولي لي الكلام ده" هو مش بيكذب.. هو فعلاً ماسمعوش.. عشان كان بيعمل حاجة تانية أو كان بيتفرج على الماتش وقت ما قُلتيهوله.

الكلام ده مش هزار.. ده كلام علمي.. ولازم انتي كزوجة تعرفي إيه الاختلافات الفسيولوجية والنفسية والسلوكية اللي بين الرجل والمرأة فبالتالي تدركي سبب اختلافكم عن بعض واختلاف طريقة تفكيركوا وردود أفعالكم واحتياجاتكم.

إدراكنا للاختلافات يقلل الخلافات.

من وراء القدام



الطريقة التي بنكلم بيها بعض كستات ماتفعلش خالص
نستخدسها مع الرجالة..

يعني لما أختك تسألك على فستان بتاعك.. عادي إنك
تقوليلها.. أسكتي مش حصل كذا وكذا وانارايحة فين.. ووقع
عليه إيه.. فهي تقولك يا نهاررري وبعدين.. فوديته بقي
للدراي كلين ولحقوه الحمد لله.. هي هتبقى متفاعلة معاكي
عادي..

بس جوزك لو سألك عن القميص الأزرق.. ماينفعلش
تحكيه الحكاية بنفس الطريقة.. عشان هو مش هيسمع غير أول
جملة بس وهيرد على أساس المصيبة التي حصلت في القميص..
مش هيسنتي الحل.

اتعودي تكلمي جوزك "فلاش باك" يعني من وراء القدام..
القميص في الدراي كلين لحقوه بمعجزة.. أصل حصل
وحصل.. ولو حكيتله الحكاية بطريقتنا أنا غير مسؤولة..

طيب لما تيجي تطلبني منه طلب.. ٧٠٪ من موافقته على طلبك متوقفة على طريقتك في الطلب.. يعني ماتسأل يهوش وراك إيه يوم الجمعة.. عشان لو قالك خارج مع صحابي.. هتقوليله إنك كل حاجة صحابك وأنا مش موجودة في حياتك وإيه أهميتي عندك.. "إنتي كده وجهتيله التركيز في خروجه هو بس.. فهيفهم المعنى القريب بالنسبة له إنك مش طايقة صحابه.. مش إنك عندك مشوار مهم"

إنما لو قلتيله بشكل مباشر محتاجك في مشوار يوم الجمعة الساعة كذا في المكان كذا.. هيركز في طلبك وهيحاول يساعذك ويركز بس في إزاي هتروحي مشوارك..

لو قرّيتي النقطة اللي فوق كويس هتقدر تفهمي إن الراجل بيحب الأسلوب المباشر في الكلام.. مايفهمش غيره.. يعني لما تحبيه يهتم بيكي.. قوليله اهتم بيّا.. إنما لو قعدتي تقوليله "آه ضهري.. آه رجلي" مش هيعمل أي حاجة أكثر من إنه يقولك "طب ماتاخدي بانادول"

ساعتها هتحسي بالظلم وعدم التقدير وتنكدي عليه عيشته.. وهتبقى انتي اللي نكدي بالنسبة له..

ولما تعوزي منه حاجة أرجوكي ماتتوقعيهاش.. مش عشان انتي لمحتيله قبل عيد ميلادك بشهر إنك محتاجة شنته فحلقي.. فتوقعي إنه هيجيبها لك في علبة بشرطة حمراء.. ولو ما عملش كده وكرمشك متين جنيه في إيدك هتقهرني برضو وتنكدي عليه..

قوليله بشكل صريح أنا عايضة كذا وتخرجني كذا يوم عيد ميلادي الي هو موافق يوم كذا.. عيشي اللحظة واستمتعي باليوم.. وجهيه ورتبيله انتي اليوم.. عشان مايقلبش نكد بسبب توقعاتك وخيالاتك الي هو مايعرفش عنها حاجة..

الست بتفكر بطريقة متوازية.. يعني بتعرف تعمل أكثر من حاجة في نفس الوقت..

بتحضر الغدا.. وهي متابعة المسلسل والتليفون على ودنها وعينها مع ابنها وهو يعمل الواجب.. ويمكن يكون في ماسك طين مغربي على وشها.

الراجل بقى أحادي التفكير، ويفكر بطريقة متالية، بمعنى إنه يخلص حاجة يعمل الي بعدها، وهو في السوبر ماركت ماتكلميهوش غير لو عايضة حاجة زيادة عشان ماينساش الأولانية، وهو في الشغل مش يفكر غير في الشغل.. إنسي، مش هيعرف يحب فيكي.. ولا يقولك كلمة حلوة.. ولا أصلاً هيفتكر الطلبات الي انتي طلبتها.. ولو مع صحابه.. مش هيعرف يتكلم في الشغل.. ولو معاكي مش هيعرف يرد على صحابه.

لو عجبك حاجة عملها وعايضاه يكررها.. امدحها جداً.. وبينيله أذيه اتبسطني وعجبك.. الشكر بيزيد النعمة..

والراجل بيحب يحس إنه الهيرو بتاع مراته، وإن أفعاله كلها جامدة فهيككرر لك الفعل عشان يسمع مدحك الي بيحبه

ويديله الدفعة.. فيعيش نفس الإحساس ده تاني وحتى لو
مدحتي فعل هو مايعملوش كثير هيتبني الفعل ده وهيكرره.
تعرفي إن الرجل بيحب روح المغامرة، والتحدي، بيحب دايمًا
يخس إن فيه هدف عايز يوصله.. وأول ما يوصل للهدف ده..
خلاص بيزهق منه..

ماتبقيش انتي بقي الهدف اللي وصله خلاص..

دايمًا حسسيه إنه لسه ماوصلش.. وانك عندك تاني.. ولسه
فيه جديد.

أنا مش كتاب مفتوح.. ردود فعلي مش محفوظة.. مش
مملة.. دايمًا متجددة.. ومش متاحة طول الوقت.. أنا مش
مستتية إشارة.. أنا موجودة ومش موجودة.. مش كل ما هتدور
هتلاقيني.. طيب دور حبة كمان كده.. أنا الحاجة وعكسها.. أنا
الاهتمام وعدمه.. أنا كل.. حاجة.

أقرب طريق لقلب الراجل معدته



هيفضلوا يقولولك أقرب طريق لقلب الراجل معدته..
وانتي مش هتصدقني.. وهتفضلي تقوليلهم عمري ما هتجوز
واحد كده..

وبعد سنين كتير من الجواز.. هتكتشفي فعلاً إنه أقرب طريق
للراجل معدته.. وإنك عشان تطلبي منه طلب صعب حبتين..
هتقومي الأول بتعمليله الحاجة اللي يقولك عليها تسلم إيدك..

وهتشوفي لمعة عينيه والابتسامة اللي من هنا هنا.. - حتى لو
كان جاي من بره قرشان - أول ما يعرف إنك عاملة الأكلة اللي
بيحبها.. ده مش عشان هو بيحب الأكل اد عينيه.. ولا عشان
يفكر بمعدته.. ولا عشان أكلك واو ومفيش زيه..

بس هي سيكولوجية الراجل بتقول إن الحب بالنسبة له يعني
خدمة.. مهما قُلتني كلام حلو.. مش كفاية لإثبات حبك ليه..

عايز خدمة.. عشان يفهم إنك بتحبينه.. فلما بتعمليله أكل

جلو يبقى بتحبيه.. بتكويله هدومه.. تبقي بتحبيه.. بتزوري
مامته وتروحي معاها للدكتور.. تبقي بتحبيه.. بتحطسي كل
فردتين شراب زي بعض جُوه بعض.. تبقي بتحبيه..

وعشان كده مفيش راجل بيقتد يسأل مراته كل يوم "أنتي
بتحبيني؟" "طيب أدإيه؟"

شوية الحاجات اللي فوق دول أكبر دليل مادي على حبك
ليه.. ويوم ماهتقصر في حاجة فيهم هيتوتر ويفتكرك بطاتي
تحبيه.. وشغلك بقى أهم منه..

وعشان كده برضو ماتستغريش لما تلاقيه داخل عليك يوم
عيد ميلادك بالسباك في إيديه عشان يصلحك سبابة المطبخ
اللي ضربت.. دي بالنسبة له أغلى هدية.. يعني حوض المطبخ
يتسلك ولا يجيلك بوكيه ورد وبالونتين هيليوم؟

وماتستغريش برضو لما تقعد تسأليه كل شوية "إنت
بتحبيني؟" "طيب إيه الدليل؟" فيقولك ما أنا باخد كل يوم كيس
الزبالة في إيدي وأنا نازل عايضة إيه تاتي دليل أكبر من كده..
هو مش بيهزر.. دي أكثر إجابة مقنعة.. وأكبر دليل على
حبه ليكي بالنسبة له..

وممكن يفتكرك مجنونة أو عندك مشكلة عقلية لما تشتكي
وتقوليله إنت ماقتش تحبني زي الأول ولا مهتم بيأ.. إنت
الشغل بقى واخذ كل وقتك..

عشان بالنسبة له مجرد إنه بيروح الشغل كل يوم ده أكبر دليل
مادي على حبه ليكي.. مفيش خدمة ممكن يعملها لك أكبر من

إنه يروح الشغل ويقبض ويصرف عليكى.. هو ده أكبر ترجمة
للحب عنده..

الرجل فعلاً مابيقاش مستوعب احتياج الست للكلمة
الحلوة.. يعني كلمة بحبك وبموت فيكى هتخليها تصدق إني
بحبها وال ٨ ساعات شغل كل يوم والمرمطة مش دليل؟

أكيد الست من حقها تسمع كلام حلو عشان هي مفتاحها
ودانها.. بتحب بودانها.. بس من هنا لحد ما نقنعهم بالموضوع
ده.. خليكى عارفة.. إن أي خدمة جوزك بيعملها لك بيبقى
قصده بيها إنه يقولك "بحبك"

خدت كيس الزبالة... بحبك .

غيرت اللبنة.. بحبك

صلحت الخلاط.. بحبك

وصلتك واستنيتك تحت.. بحبك

وديتلك عربيتك للميكانيكى.. بحبك

غسلتلك فلتر المكيف.. بحبك

غيرتلك شريحة الموبايل ووقفت في الطابور بدالك.. بحبك .

ماتنسيش انتي كمان تبادلبيه مشاعر الحب الجميلة دي كلها
وتعبريله عن حبك ليه بحلة ورق عنب وذكربط.. أو تخيطيله
زرار القميص المقطوع..

الرجالة كلهم زي بعض



"الرجالة كلهم زي بعض" الجملة الي دمرت عقول بنات كثير.. خلّت كل بنت تعامل جوزها زي مامتها ما كانت بتعامل باباها بالظبط..

خلّت أي بنت عشان تجيب هدية لجوزها تنقي الحاجة الي أخوها بيحبها بالظبط..

ولما يحصل بينهم مشكلة.. تقول أنا عملتله كل حاجة في الدنيا وحاولت في كل الطرق بس مفيش فايده.. الحقيقة هي بتبقى عملت كل حاجة فعلاً ما عدا الي هو محتاجها ومستنيها.. عشان تعرفي احتياجات شريك حياتك.. لازم تعرفي نمط شخصيته الأول.. كل رجل بيختلف عن الثاني على حسب نمط الشخصية..

في راجل بيحب بعينه.. ورجل مفتاحه ودانه..

في راجل دقيق ومنظم وياخذ باله من أدق التفاصيل.. وفي

راجل لو غيرتي الصالون مش هياخذ باله..

في رجل قراراته عاطفية وحساس.. وفي راجل عملي ومث
قادر يفهم إزاي كائن الست يفكر بمشاعره..

في رجل بيعبرلك عن حبه بإنه يشتريك طلبات السوبر
ماركت.. وفي راجل بيعبرلك عن حبه بإنه ياخذك معاه كل
مشاويره..

وفي اللي بيحب الست الجريئة المنفتحة.. وفيه بيحبها قطة
مغمضة..

مش كلهم بيحبوها رقيقة.. ولا كلهم بيحبوها مليانة.. في
رجل مفتاحه معدته بجد.. والأكل يفرق جداً في موده.. وفي
اللي ممكن يسبب حلة المحشي عشان جنبنة ببطيخ..

اللي تقرر تعامل الرجالة كلها بنفس الطريقة يبقى عندها
قصور شديد في الذكاء العاطفي ومهارات التواصل..

والحالة دي بنشوفها كثير لما الزوجة تفضل تشتكي من زوجها
سنين كثير إنه مش رومانسي وإنه عمره ماجابلها هدية ولا عمره
قالها كلمة حلوة قدام حد.. وفجأة لما عرفت إنه اتجوز غيرها
اكشفت علاقتهم الرومانسية ورسايل حب وهدايا..

الزوجة الثانية كانت عارفة مفاتيح شخصيته.. تقول إنه
وامتى وإزاي عشان توصل لإيه..

عرفت الأسلوب اللي بيده تاخذ عينيه وقلبه وتفكيره وكل
حاجة حلوة.. عرفت بس إن مش كل الرجالة زي بعض..

قَدِّمي طلب



"- أنا كل ما بطلب منك حاجة تقولي لأ.. بتعاملني زي العيال الصغيرة.. ماليش حقوق ما ينفعش أختار.. أنا زهقت هو انت اشترتني"

عشان ما يقاش ده رد فعلك كل ما تطلبي من جوزك طلب.. وعشان ما يتقال كيش لأ.. لازم تعرفي تطلبي الطلب صح..
٨٠٪ من أسباب رفض الرجل طلب مراته بيبقى التوقيت والأسلوب.. مش مضمون الطلب نفسه..

والدليل على كده إنك ممكن تطلبي منه حاجة مش أول مرة تعملها ويقولك "لأ" .. بتحسبه ساعتها إنه بيضطهدك أو بيتحكّم فيكي وخلاص.. بس الحقيقة ان طريقتك في الطلب كانت غلط فنورت عنده لبة إنذار في دماغه..

وساعات كمان تتفاجئي بجوزك يقولك

"إنتي ما بتعمليش كذا ليه.. أو ما بتروحيش هناك ليه؟"

والـ "كذا وهناك" دول أصلاً إنتي اتحايلتي عليه قبل كده
وماوقفش.. تفتكري ساعتها لأنه اتعرض لعملية مسح ذاكرة
مؤقتة.. بس السبب برضو يبقى طريقة الطلب والتوقيت..
طيب التوقيت ومعروفة.. هختار وقت مزاجه رايق..
الطريقة بقي..

أولاً: لازم انتي كمان يبقى مزاجك رايق

ثانياً: هتعملي حاجة اسمها "إقرار مشاعر"

يعني: "أنا عارفة إنك بتغير علياً وخايف علياً من الناس
ومش عايزني أشتغل.. بس أنا فعلاً محتاجة الشغل ده وهيفرق
معايا كثير.. وانت لازم تعلمني أتعامل إزاي مع الناس وتبقى
جنبني عشان أقدر أعتمد على نفسي وتبقي متظمن علياً.. مش
عايزة ردك دلوقتي فكر كويس وادرس الفرصة اللي معروضة
علياً، وأي حاجة هتقولها أنا موافقة عليها.. القرار قرارك بس لو
وافقت هتبقى أحلى حاجة عملتها عشانى ومش هنسهالك أبداً"

- إنتي هنا عملتي إقرار لمشاعره إنه "بيغير"

- وإقرار لمشاعرك انتي إنك "محتاجة" الشغل

- وشيلتيه "مسئولية" إنه يعلمك ويبقى جنبك

-خلتيه يقبل إن فيه اختارين آه أو لأ لما قتلته "فكر" بعد ما

كان رده تلقائياً لأ بدون تفكير.

- "ادرس الفرصة" زرعت جواه نواة للفكرة اللي كانت

مرفوضة كلياً قبل كده.. مع الوقت ومع تكرار الطلب بأشكال مختلفة هتوصلي لى انتي عايزاة.

- "القرار قرارك" إقرار بخضوعك كأنثى لقراره كرجل.. وده بيرسخ جواه إن شغلك مش هيقوم بانتزاع سُلطته كرجل.

- "لو وافقت هكون مبسوطة" انتي كده بتنسييله كل الفضل لو وافق على شغلك.. وده هيرضي غروره ويحمسه للفكرة.

ثالثاً: لو قالك "لا" أقبلي بدون اي اعتراض أو كلام سلبي.. ده هيحسسه بالذنب أكثر تجاهك.. وهيرضي غروره كرجل يفرض سيطرته على مراته وهي بتخضع.

رابعاً: كرري محاولاتك بنفس الطريقة السابقة بالظبط عدد لا نهائي من المرات.. إنتي برمجتيه وزرعتي الفكرة في دماغه بإنه الرجل والمسيطر وانك محتاجة مساعدته وإن الشغل مش بيهدد سُلطته ولا خضوعك كأنثى.. مع تكرار الطلب انتي بتتروي الفكرة اللي زرعتها جواه إنك تشتغلي.. وأي بذرة بتتروي لازم تنمو وتكبر وتسيطر..

خامساً: كرري دايمًا عليه "أنا عارفة إنك أكيد في يوم من الأيام هتوافق عشان بتحبني ومابتحبش تزعلني"
دي برجة لغوية عصيبة وأحدث أساليب زرع الفكرة؛)
ضحكات مقطعة شريرة..

الفصل السادس

فك شفرة الستات

المرأة كالشعلة إذا عرف الرجل كيف يمسكها أضاءت له طريقه، وإذا أخطأ في مسكها أحرقت يده

أنيس منصور

في عالم البيزنس عشان تعمل startup لمشروع محتاج خطوات
كثيرة..

من أول إنك تعمل brainstorming عشان تحدد فكرة المشروع..
وبعدين تشتغل على ال business plan وتدرس المشروع أكثر وتحدد
أهدافه وهيفيدك ازاي.. لو فيه معلومات ناقصاك هتروح تاخذ
ها كورس ولأ اتنين..

تدرس أكثر وتحدد ال vision وال mission تبدأ تدرس الجزء
المالي.. قيمة رأس المال المطلوبة وطريقة التمويل..

دور على شريك.. قدمله الشبكة.. قصدي الفكرة

وبعدين شوف الأوراق الحكومية المطلوبة منك..

دور على مقر..

اجتمع بفريق العمل..

اعمل إعلان..

عرف الناس..

احتفلوا سوا بال launching

أسماء الله الحسنى.. طلي بالأبيض.. خالص ال honey moon

وركز معايا..

في عالم البيزنس الحقيقي الخطوة اللي بعد كده اسمها Grow

up your business يعني تكبره.. يعني ترعاه وتأخذ بالك منه..

نديله وقت أكثر.. حتى لو عندك وظيفة ثانية ماينفعش تهمل

مشروعك الصغير.. لازم تديله من وقتك وتفكيرك ومجهودك
علشان ينجح ويكبر..

أي إهمال لمشروعك خسارة مادية وخسارة معنوية.. يعني
فشل.

مشروع زي الجواز انت مش معاك Team كبير تقدر تعتمد
عليه وتوزع عليهم المهام..

«أنت وزوجتك بس.. وانت هنا ال Leader يعني هتبقى
One man show والمسئولية الأكبر عليك.. عشان كده لازم تبقى
أدارجي كويس وسيلزجي شاطر..

الجواز مشروع بجد.. محتاج تخطيط وتنسيق.. ماينفعش دورك
يقتصر على إنك تعمل Appraisal أو تقييم طول الوقت لأداء
شريكتك ومايعجبكش فتنقدها لازم تعملها support و Motivation في
علاقتكم سوا عشان ماتحسersh أداءها وشغفها بالعمل معاك..
سيدنا النبي عليه الصلاة والسلام قال «إنما النساء شقائق
الرجال»

و«الشق» يعني النصف الآخر..

أي بذرة في الحياة بتكون من ذكر وأنثي.. دي البداية.. بداية
القصة، عشان حياتك تبقى متوازنة هتدور على النص اللي باقي
والي بيكملك.. ده مش مصطلح مجازي بنقوله على أي اتنين
بيحبوا بعض وخلص.. لأده علمياً اختلاف المرأة بيكمل اللي
ناقص عند الرجل..

لوانت العقل.. هي الإحساس
إنت بتشوف الصورة الكاملة.. هي بتعشق التفاصيل
إنت المنطق.. هي الإبداع
إنت الأرقام.. وهي الألوان والأشكال
إنت بتستنح.. هي بتتخيل

العلماء أثبتوا إن سبب الاختلاف بين الرجل والمرأة إن المرأة
بتستخدم الفص الأيمن من المخ أكثر من الفص الأيسر..
والرجل العكس.. فهمك للاختلافات اللي بينكوا هيخليك
تقبلها وتحتويها ودي هتبقى بداية النجاح.. نجاح الشركة اللي
بينكوا.. ونجاحك انت شخصياً.. كزوج وأب.. ورجل..

المرأة عندها قدرات عالية جداً ومهارات كثيرة لو اكتشفتها
هتبقى سبب للسعادة في حياتك.. ولو تجاهلت إمكاناتها
وقدّرتها هتبقى عامل زي اللي معاه X3 وماشي بيها على سرعة
60 كم/ ساعة.

الست إكسبير الحياة وسر السعادة لو عرفت تفك الشفرة
بتاعتها هتعرف يعني إيه حياة.

مالهاش مزاج



إنت عارف إن مراتك ممكن تروح الكوافير كل إسبوع تعمل شعرها.. وشوية ماسكات وباديكير ومانيكير.. بس هي مالهاش مزاج.

طيب عارف إنها ممكن تحس وزنها الزيادة في شهرين تلاثة وتروح جيم مرتين في الإسبوع وتعمل reshaping لجسمها.. بس هي مالهاش مزاج..

وعارف كمان إنك ممكن ترجع كل يوم من الشغل تلاقى البيت رايق وكل حاجة مكانها وهدومك كلها مكوية وجاهزة.. بس هي برضو مالهاش مزاج..

طيب عارف إنها ممكن كل يومين تعملك أكلة جديدة من اللي على فتافيت وتقعد تفتكس وتخترع وتعملك كمان حاجة حلوة بعد الغدا؟.. بس للأسف مالهاش مزاج..

تعرف إنها ممكن تعملك كل week end مفاجأة و-pro gram جديد.. سواء برّه البيت مع أصحابكو أو جُوه البيت لوحديكو.. بس برضو مالهاش مزاج..

عارف إنها ممكن كل يوم الصبح وهي بتصحيك تبقى مبتسمة ومبسوطة وبتضحك.. أو تقابلك على باب بيتكو أول ما تيجي بعد شغلك بحضن وشوق ورومانسية.. بس مالهاش مزاج.. معلش

طيب عارف إنها ممكن تسميك على موبايلها my baby وممكن كل ماتكلمك تقولك يا حبيبي ويا قلبي ويا بيبي.. بس مالهاش نفس.. ولا مزاج؟

دي ممكن كمان تجبك بجنون.. وكل طلباتك تبقى على قلبها أحلى من العسل.. ممكن تغير من أسلوبها اللي بيضايقك.. وتتنازل عشانك عن حاجات مهمة بالنسبائها.. بس هي حاسة ان مابقتش فيه حاجة مستاهلة..

طيب انت عارف هي مالهاش مزاج ليه؟

عارف ليه مالهاش نفس وبقت محبطة وحاسة إن مفيش حاجة مستاهلة..

أصل سقف طموحاتها وقع على دماغها..

و عمل طر ||||| الخ.. أيوه كده بالظبط

من الآخر كده.. أسلوبك لوحده هو اللي بيتحكم فيها..
أسلوبك لوحده ممكن يخليها عصفورة طيارة في السما..
وممكن يجيلها اكتئاب واحدة خارجة على المعاش..
أسلوبك لوحده ممكن يخليها مزة.. عاشقة.. بتحبك وتموت
فيك..

وممكن يخليها... مالهش مزاج.

الفيس بوك



بترجع كل يوم من الشغل تلاقي الأكل لسه ماخلصش.. ولا
اتحرق ويريجته طالعة؟

كل ما تقولها على حاجة.. تقولك معلش نسيت..

لما بتنده عليها بترد من تالت أو رابع مرة..

العيال مستواهم بدأ يقل شوية في الدراسة.. ومش عارف

ليه..

بدأت تنترفز وتندم على الموبايل اللي من ساعة ماجبتها

وهو مش بيفارق إيدها وعينها مش بتتشال من عليه..

طيب تيجي نعمل فلاش باك ونشوف كنا عايشين إزاي قبل

الفيس بوك والتويتر والواتس آب..

كام مرة قُلتها like على لبسها وانتوا خارجين سوا؟

طيب كام مرة اديتها comment على قصّة شعرها اللي دفعت

فيها دم قلبها عند الكوافير وانت ماخدتش بالك أصلاً؟

كأ مرة سببها أخرج مع ال friends بتوعها من غير ماتضايقها
وتصعبها عليها؟

طيب عمرك نسيت عيد ميلادها من يوم ما عملت هي -«
count بتاعها على الفيس بوك؟

إمتى عجبك رأيها.. فقررت تعملها follow لباقي آرائها؟

طيب حاولت تعمل share لأي فكرة حلوة بينكوا قالتلك
عليها قبل كده؟

طيب عملتها poke كده على لماشي وانت معدي عشان
تفرفشها بعد تعب اليوم؟

كأ مرة اهتميت ب event عيد جوازكوا ونظمتله يوم من
أوله؟

كأ مرة جهزت نفسها لسهرة حلوة رومانسية.. ولقيتك
عملت offline ونمت بدري..

وكأ مرة عملتها block ومنعتها تتكلم وتدافع عن نفسها أو
تقول رأيها؟

كأ مرة عملت delete للحاجة في حياتها هي كانت بتحبها
ومنعتها تعملها؟

مراتك ست عاقلة وكَمَل....

لما فقدت الاهتمام والصحبة والإعجاب والرغي والكلام
والكلمة الحلوة..

ماهدتش البيت ولا ثارت..

هي بس حاولت تعوض احتياجها للمشاعر الحلوة دي مع
صحابها «اللي مابقتش تشوفهم أصلاً» فعوضت الأحاسيس
دي معاها online... رجعت تضحك معاها وتتريق زي زمان..
ورجعت تعرف أخبار بنت خالتها وتحكي معاها.. وأخيراً بعنت
صور بتكوا لعمتها اللي ماشافتهاش من يوم فرحكوا.. سييها
تحس إنها عايشة في مجتمع فيه ناس وتتفاعل معاها..
ولو عايزها ترجعلك زي الأول.. خليك إنت ال support اللي
في حياتها.. واسحبها واحدة واحدة من العالم الافتراضي ده..
بينها إعجابك وحبك ورجعها تشوف ناس وتخرج وتشوف
الدنيا عاملة ازاي..

صيانة العشر تلاف



كل عربية جديدة عشان نحافظ عليها.. بنفضل نوديهها صيانة
كل كام ألف كيلو..

صيانة الألف كيلو.. الخمس تلاف.. العشر تلاف.. الأربعين
ألف..

ونقعد نغيرها الزيت والتيل والبوجيهات والسيور ونربط
عفشة كل مانروح..

وده طبعي.. أي عربية جديدة بنجيبها.. بنقى خايفين عليها
من الخدش.. بنحطها فرش جلد عشان يحميها.. ومعطر كل
شوية.. ورايحين نغسلها في البنزينة وراجعين من البنزينة..

وفيه ناس بترتبط بعربياتها أوي.. تتكد نكد فظيع لو
اتخدشت ولا عربية كحتت فيها وعلمت لون.. ولا المراية
لو اتكسرت.. ومن رابع المستحيلات إنهم يخلوا حد يسوق
عربياتهم.. ويبقوا عندهم معتقد إن العربية دي بالذات هتعتل

لو حد غيرهم ساقها عشان مابتحبش غير صاحبها..
طيب دي العربية.. اللي هي أصلاً حديد في حديد..
طيب علاقتنا ببعض أخبارها إيه.. علاقتك بمراتك.. مش
محتاجة صيانة وتربيط عفشه؟
إمتى آخر مرة جبتلها هدية..؟
إمتى آخر مرة عملتلها مفاجأة وظبطلها خروجة جامدة؟
إمتى آخر مرة سافرتوا سوا وعملتوا هَوَني مون من تاني؟
إمتى قعدت تسمعها وهي بتحككي؟
إمتى سألتها إيه اللي تاعبك أو مضايقتك؟
أنا مش هغششكوا وأقولكوا افكار..
كل واحد يشوف شريكته محتاجة صيانة في إيه.. وفين..
وبكام عشان علاقتكوا ببعض ترجع تفوق من تاني.

غيرة ولا مادية



الست الغيرة مشكلة كبيرة أوي بالنسبة للرجل..
قنبلة موقوتة..

في أي وقت بتقلب حياته نكد وجحيم.. مايبقاش عارف
الضربة هتيجي منين.. عشان ضحك مع زميلته لما كلمته تسأله
على حاجة في التلفون..؟ ولأ عشان هزرمع بنت خالته وقعد
يضحك على صورهم القديمة؟

ولأ عشان خرج مع صحابه وسهر لحد الفجر؟ ولأ عشان
جاب هدية لامته وعزم أخته على الغدا؟

طيب تفتكر لو هو مفرقها كلام حلو ومحسها إنها ست
الستات وأحلى حاجة في حياته كان هيفرق معاها زميلته اللي في
الشغل؟

لو مشبعها خروج كانت اتضايقت من اليوم اللي هيسهر
فيه مع صحابه..؟

لو مشبعها هدايا كانت هتضايق لما يجيب لامته هدية وهي
لا؟

طيب لو بيضحك ويهزر معاها طول الوقت كانت
استغربت من ضحكه مع بنت خالته؟

مش الغيرة بس اللي عندها احتياج عاطفي.. المادية كمان..
اللي طلبتها كثير وما بتخلصش.. اللي بتدخل قسط في الثاني..
وكل شوية عايضة تغير وتجيب جديد وتبيع دي وتجيب دي..
دي بالذات بتبقي عاملة زي الطفل اللي يسرق عشان أهله
مش مهتمين بيه وعنده احتياج عاطفي ونقص حنان.. بتعبّر
عن الاحتياج ده بالماديات.. فمهما جوزها جابلها طلبتها مش
هتخلص..

عاملة زي الجعان اللي كل ما يعوز ياكل يشربوه مية.. فعمره
ماهيشبع من المية بس..

الست الغيرة أو الست المادية مش بيبقوا مدركين إنهم
محتاجين طبخة أو كلمة حلوة.. هما بيتصرفوا كده غصب عنهم
بالعقل الباطن.. مش قصدها تقوله إديني حقي ناشف طالما
مش هتشبعني عاطفياً.. ولا قصدها تقوله هنكد عليك عيشتك
طالما مش بتحتويني..

الاحتياج العاطفي هو اللي قبله موقوتة.. أشبعها عاطفياً
هتفجر أنوثتها معاك.. أشبعها عاطفياً ثقتها في نفسها وفيك
هتزيد.. وهتبتل تغير.

أشبعها عاطفياً هتديك مساحتك وحريرتك ومش هتبقى
طول الوقت مراقبناك..

أشبعها عاطفياً هتطور من نفسها ومن علاقتكوا ومن
حياتكوا..

يمكن تكون أكبر كذبة قالتها أصالة في حياتها.. «أصل أنا
لما بكون متشافة.. بتوتر.. أصل أنا خوافة»
وده عشان الست أصلاً بتحب تتشاف.. بتحب يتقالها تسلم
إيدك وإيه الحلاوة دي..

ولو أصالة تقصد إنها ما بتحبش تتشاف من ناس كثير..
فالأكيد إنها بتقول لحبيبها.. ما عدا انت.. عايزاك انت اللي
تشوفني.. بدليل إنها بتقوله في رسالة غير صريحة خد بالك مني
وخليني في حضنك أصل أنا خوافة..

هي استخدمت معاه حيلة الضعف عشان يشوفها..

أي خد بالك مني.. معناها شوفني..

لما بنلاقي راجل يشتكي من زوجته إنها اتغيرت وما بقشش
تهتم بيه زي الأول.. أو إنها فجأة بقى ليها اهتمامات جديدة
مديالها كل وقتها على حساب زوجها..

لما نلاقي الزوجة بقت مشاغبة على غير عادتها.. اعرف إن
انت السبب..

إنت اللي ماشفتهاش وهي حلوة.. فاضطرت توريك نفسها
وهي مشاغبة..

اهتمامها بيك وبكل تفاصيلك ما لفتش انتباهك.. فقرررت
تلف انتباهك بإهمالها ليك.. أو بغيرتها.. أو بطلباتها.. أو بجاهلها
ليك..

المأذون



فاكر يوم كتب كتابك لما غطيت إيدك بالمنديل وقلت لباباها
قُدَّام المأذون والناس كلها.. زوجني ابتك وموكلتك على كتاب
الله و على سُنَّة نبيه و على الصداق المسمى بيننا؟

في الغالب ما حدّش بياخذ باله ولا بيركز في المعنى.. الأم
بتزغرد والحالة بتحضن والصحاب بيهيصوا والعروسة مكسوفة
ووشها في الأرض.. والمأذون عايز يخلص عشان وراه فرح تاني..

تاني بقى كده.. بتركيز المرة دي..

زوجني ابتك: ١- على كتاب الله

٢- وسنة نبيه عليه الصلاة والسلام

٣- وعلى الصداق المسمى بيننا

ده العهد اللي انت خدته على نفسك قُدَّام كل الناس وقُدَّام
رينا قبلهم..

إنك تعاملها زي كتاب رينا ما قال.. وزى رسولك ما كان
بيعامل زوجاته..

وعلى الصداق المسمى بيننا.. يعني على الاتفاقات المادية اللي اتفقتوا عليها قبل الجواز..

إحنا كلنا هيجيلنا يوم ربنا هيحاسبنا فيه على الصغيرة قبل الكبيرة.. هنقف بين إيديه ويسألنا على موقف موقف وكلمة كلمة..

تعالوا نحاسب نفسنا قبل مانتحاسب..

إنده على مراتك واسألها انت قصرت معاها في إيه.. جيت عليها في إيه.. زعلتها في إيه.. نكدت عليها ليه.. هي عايضة منك إيه.. وبُص على المشكلة من نظرة حقانيه..

قيّم الموضوع وقيّم المشاكل اللي بينكوا.. وخلي شرع الله هو الحكم بينكوا..

مش هنتكلم عن اللي بيقول لمراته طالما بتشتغلي اصرفي على نفسك.. ولا هنجيب سيرة اللي بيشوفها تعبانة يتريق ويقولها انتي على طول ضهرك ورجلك وركبك.. ولا هنحكسي عن اللي مايعرفش حاجة عن بيته ولا شايل مسئوليته.. ولا اللي بيزعق وضارب بوز على طول.. ولا اللي بيهين ولا اللي بيشتتم..

كلنا عارفين يوم ما هنتحاسب هنبقى مقصرين في إيه..

كلنا عارفين الكتاب والسنة بيقولوا إيه..

كلنا عارفين إن النجاح والسعادة بيدأوا من البيت الأول..

الفصل السابع

الشنون الداخلية للبلاد

الركب أم ريسين بتغرف
فقل شعبي

المركب أم ريسين بتغرق ..
دي حقيقة لا تقبل الشك ..
بس فيه حالات استثنائية ..
لو كانوا الريسين دول .. يبجوا بعض ..
متفاهمين ويحترموا بعض ..
بتجمعهم علاقة راقية ويبجوا أولادهم .. وعازيزين السفينة
توصل بيهم لبر الأمان ..
طيب لو اللي سابق السفينة دي الريسين ومعاهم أم الريس
الأولاني وصاحبة الريس التاني .. أو خالتهما؟
آه طبعًا هتغرق وعمرهم ما هيتفقوا على قرار صح ..
اتخاذ القرار لما بيبقى بين الزوجين بس ومفيش حد بينهم ..
يرضوا .. حتى لو طرف جه على طرف .. بيبقى عارف إنه
هيعوضه في الموقف اللي بعده ..
لكن لما بنسمح لأطراف خارجية يتدخلوا في حياتنا ..
تدخلاتهم بتبقى قنبلة موقوتة ..
أم الزوج لما بتدخل بتبقى عايزة ابنها يسيطر على كل حاجة
وينشف شوية عليها ويبقى سي السيد وكفاية إنها جوزتهوها
أصلًا .. وانتشلتها من بحر العنوسة .. وبتبقى رافضة «بعقلها
الباطن» إن مرات ابنها تعيش عيشة أحسن من اللي عاشتها
هي ..

فتبتدي تنصح.. غسالة الأطباق لازمتها إليه.. الأكل من برّه
ده مصاريف زيادة.. ومالها الست اللي بتقعد في البيت عشان تربي
ولادها.. تيجيب شغالةليه.. ده إحنا ماكناش ستات بقى..

الراجل بقى لو اتأثر بكلام مامته يبقى سمح بدخول ريس
تالت للمركب.. وفي الحالة دي مصير المركب معروف..

تدخلات أم الزوجة كمان بتبقى مؤذية؛ لأنها عايزة بنتها
تعيش عيشة أحسن منها.. وعايزاها تتلافي كل الأخطاء اللي
وقعت فيها مع جوزها.. وفي الغالب بتبقى شايفة نفسها
ضحكت كثير ومش عايزة بنتها تقع في نفس الظروف.. أو نفس
التجربة..

فتبتدي تقولها إوعي تعملي كذا.. وخدي بالك من كذا..
لازم تعوديه على كذا وكذا وكذا.. إوعي تتنازلي واوعي تفرطي
في حقتك.. وبتشتغل شحن فيها وفي الآخر البنت بتشق في مامتها
وبتبتدي تنفذ.. وتدخل الريس الرابع للسفينة..

في ناس بيختلط عليهم الأمر.. ويقولوا طيب وفين طاعة
الوالدين.. وفين البر اللي ربنا أمرنا بيه..

بر الوالدين يقف عند حقوق الزوج والزوجة..

تاني؟

بر الوالدين يقف عند حقوق الزوج والزوجة..

يعني ماتجيش على حق حد عشان حد تاني.. وإلا هيكون
ظلم لمراتك أو جوزك وولادكوا..

يعني ماينفعش عشان أمك عايزاكي في مشوار تهملي زوجك
وأولادك اليوم ده وتقولي أصلي بَيرِ أمي..

وماينفعش حضرتك تنكد على مراتك وتيجي على حقها
وتقومها تطبخ وتمسح في بيت حماتها وتقول بَيرِ أمي.. لأده ظلم
بين لزوجتك..

ولا ينفع حد فيكوا يحرم ولاده من خروجة عشان تروحي
تزوري أختك.. أو عشان أخوك ماعهوش يخرج ولاده زيك..
اتقوا الله في أزواجكم وأولادكم وما تسمحوش لحد إنه يتدخل
بينكوا ويدمر حياتكم.. حتى لو بطريقة غير مقصودة.. وحتى
لو نيتهم خير.. ومش قاصدين.. مجرد التدخل كفيل بفرق
السفينة..

الطاعة العمياء



يا إما تتجوز بنت، خالتك يا إما قلبي وربي غضبانين عليك..
طلّقت مراتك أنا مش راضية عنها..
نَدِرِ عليا لو دخلتني الكلية اللي في دماغك دي لا انتي بنتي
ولا أنا أعرفك..
البت صاحبتك المايصة دي ماتعرفيهاش تاني..
لوجت بنت لازمًا تسميها على اسم أمك.. ولو واد يبقى
على اسمي.. اسم ابوك عشان يطلع راجل..
إيه المدارس دي.. ولادك مش أقل من ولاد اختك.. ولو
جوزك ماعهوش قوليله ماما مصرة تكملنا وانت عارف زعلها
وحش..
شبكة إيه الألباظ اللي انت عايز تجيبهاها دي.. ما اختك أهي
جتلهها شبكة عادية وماجرهاهاش حاجة يعني.. يا يجيلها زي اختك
يا احنا من سكة وهي من سكة.. تبقى مش توبنا.. والله الغني..

انتوا لازم تباتوا عندي كل يوم جمعة.. أنا ما بلحقش أشبع
من العيال.. افرشوا بقي وناموا في الصالة لحسن أختك عندها
مذاكرة ومش هتسيب أوضتها..

كل اللي فات ده اسمه ابتزاز عاطفي بإسم طاعة الوالدين..
مع إن رينا ما أمرناش بطاعة الوالدين طاعة مطلقة كده من
غير مانفكر.. هو بس أمرنا بيرهم.. ده الفرض إنما الطاعة
المطلقة دي مش واجبة أصلاً..

ما هو رينا لما يكرم الإنسان ويخلقه مخير في معظم جوانب
حياته.. ما ينفعش الإنسان ده يهين نفسه ويرضى على نفسه إن
حد يخليه مُسيّر غصب عنه في قرارات تخصه لوحده.. دراستك..
شريك حياتك.. شغلك.. مدارس أولادك وأساميهم.. شقتك..
انت اللي هتحاسب لما تكسر قلب البنت اللي بتحبك عشان
مامتك حالفة تجوزك واحدة بيضا وطويلة وانتي اللي هتحاسبي
لما تسيبه وتتجوزي غيره وانتي لسه بتفكري فيه..

بر الأم نهايته عند حقوق الزوجة.. ما ينفعش تاخذ من حق
مراتك عشان ترضي أمك.. ده ظلم وعقوق للزوجة.. طاعة
زوجك واجبة عن طاعة أمك.. ما ينفعش لوي الدراع باما
زعلها وحش.

الخصوصية في بيت الزوجية.. بإدياته وقراراته.. وخططه
ورفاهياته أمر واجب على الزوجين.. بالذات المصيف استمتعوا
بحياتكوا وخذوا قراراتكوا بنفسكوا.. حتى لو هتغلطوا..

وربوا اولادكوا على كده.. إنهم مسئولين عن قراراتهم
وانكوا مش هتجبروهم على حاجة هُما مش عايزينها وانكم
مش هتبتزوهم عاطفياً باسم الطاعة..

إنك تحملي نفسك مسئولية قرارات ابنك أو بتك ده حمل
أصلاً مش المفروض إنك تشيليه.. إنتي بس مسئوليتك إنك
تربيهما وهما بعد كده من حقهم يختاروا يعيشوا حياتهم إزاي..

هذا ما وجدنا عليه آباءنا



تخيلي لو اشتريتي شقة جديدة.. عشان تنقلي فيها وتستقري
وتعيشي هناك..

أول يوم بعد ما اشتريتها يادوبك ركنتي عربيتك لقيتي
ست معدية من جنبك وبتقولك هو انتي اللي جاية تسكني
تحت الست أم محمود؟ تقوليلها آه.. تقوم قايلالك يا عيني معلى
ربنا يصبرك يابنتي..

تمشي خطوتين في اتجاه البيت تلاقى الرجل بتاع السوبر
ماركت يقولك إنتي الساكنة الجديدة؟ تقوليله آه.. يقولك الله
يكون في عونك يابنتي..

دخلتي العمارة.. بفتححي باب شقتك فتحت جارتكوا اللي
في وشك.. وقالتلك أهلاً وسهلاً.. بصي يابنتي إنتي عشان زي
بنتي هقولك كلمتين.. الست أم محمود دي ست كبيرة وزى
والدتك.. لازم تستحملكها وتعملي بأصلك.. وانتي شكلك بنت
ناس وباين عليكى..

هتعملي إيه؟ فكري ممكن يكون ازاي رد فعلك.. يا إما أول ماتشوفي أم محمود هتفضلني تفسري كل أفعالها ضدك.. وإني بني آدمة غريبة جداً ومش طبيعية.. يا إما هتقفلي بابك عليكي أصلاً ومش هتعاملي معاها خالص وتقصري الشر من أولها.. بس الأكيد إنك مش ممكن تنزلي تشتري دسطة جاتوه وتطلعي تقوليلها أنا جاية أتعرف عليكي..

ليه بقى؟ لأن الجيران زرعوها جواكي فكرة إن الست دي شريرة وهتثديكي.. ولما اتكررت الرسالة بالفكرة دي الفكرة بقت معتقد جواكي.. والمعتقد بقى سلوك.. (المعتقد إنها شريرة والسلوك إنك هتعامليها وحش أو بتحفظ)

ده بالظبط اللي الإعلام بيعمله جوانا من الخمسينات..

بيزرع فكرة معينة ويفضل يكررها لحد ماتبقى معتقد.. الحموات الفاتنات.. حماي قبيلة ذرية.. حماي ملاك.. على حبة أمثلة شعبية زي الحما عمى.. وانكوي بالنار ولا حماي تقعد في الدار..

كلها أفكار اتزرعت فينا من واحنا أطفال.. نتفرج على الأفلام دي في التلفزيون.. ونسمع ماما وهي بتشتكي لخالتو من تيته.. وأختي الكبيرة كل ماتروح لحماها ترجع معيطة.. والبنت تتخطب من هنا أول سؤال مامته عاملة إزاي..

بتكلم كثير تبقى مسيطرة وممشياه.. ساكتة تبقى عقربة وغبية.. جيل كامل مر بالظروف دي.. اقتنع بالفكرة وآمن

بيها واتبناها واتصرف على أساسها.. ده فكرة واحدة من ضمن ملايين الأفكار اللي اتزرعت جوانا وبقت تابو مجتمعي وموروث شعبي.. واعتقاد راسخ في المجتمع.. مع إن الموضوع كان ممكن يتحل «بدسته الجاتوه» و «انا جاية أتعرف عليكى».

ماتسييش دماغك لحد.. وأحسني الظن دايمًا مع أم زوجك مرة واتنين وعشرة.. ماينفعش نفسر كل فعل مختلف على إنها مابتحبكيش أو غيرانة منك.. علشان ممكن يكون السبب بس إنها مختلفة عنك.. في السن، في الخبرة، في المعتقدات.. كل دي أسباب تحلينا نختلف مع الشخص اللي قُدَّامنا.. بس الرقي إنك تتقبلي اختلافها.

الشخص مهما كان وحش وطباعه صعبة دايمًا يبقى له شخص قريب من قلبه مايبجش يزعله.. فحتى لو انتي دخلتي عيلة جديدة لقيتهم كلهم بيشتكوا من حماك خليكى انتي الشخص المدلل ليها.. بالذكاء والرقي.

الزُّرَّار



كل واحد فينا جواه الحلو وجواه الوِجِش..

ومهما بيكون الشخص سيء الطباع والناس كلها ما
بتحبوش.. بيجي حد يقولك عليه ده جدع وأنا ماشُفِتِش منه
حاجة وحشة..

والعكس صحيح.. بتبقى بتخب الناس كلها وكويس
معاهم كلهم.. وتيجي عند شخص ما مش عارف تحبه أو
تعامله كويس..

بتلاقي زوجين الناس كلها اتدخلت علشان تحل مشاكلهم
وماعرفوش.. ولما انفصلوا وكل واحد اتجوز تاني كانوا متفاهمين
وسعداء في جوازهم التاني..

في إيه بقى؟

فيه إن كل واحد جواه الحلو وجواه الوِجِش..

الصفات الحلوة قد الصفات الوحشة ..

بس الجدع اللي يعرف يطلع الحلو من اللي قدامه .. ويتجنب
الوحش .

الشاطر اللي يلاقي الزرار اللي لما يدوس عليه يطلع الحلو
كله ويلغي الوحش .

الموضوع بسيط والزرار كلنا عارفين مكانه ..

أسلوبك هو اللي بيحدد اللي قدامك هيجبك ولا لا ..

زي ما الأم ممكن تحب مرات ابنها دي وتكره دي، طيب ليه؟
لأ مش عشان ده الصغير ولا حاجة .. كل الحكاية إن البنت دي
عاملتها بحب وبما يرضي الله من أول يوم .. بس الزوجة الثانية
كانت مستنية لها على غلطة .. وحاطاها في دماغها ..

أسلوبك في معاملة أطفالك من الأول هو اللي هيحدد
هيعاملوكي إزاي لما يكبروا .. كتتي حنينة ولما هم حواليك
بحب .. ولا بيسمعوا كلامك عشان ما يتضربوش ..

إنتي اللي هتقرري مرات أخوكي دي صاحبتك ولا ضرتك ..
هتحكليك انتي مشاكلها مع أخوكي ومامتك ولا هتدور على
حدبرة ..

جوزك .. هيرتاح معاكسي وهيحكيلك همومه .. ولا هيجي
يلاقيكي منكوشة ويتجري ورا العيال وكل ما يكلمك تقعد
تشتكيه وتطلعي همك فيه ..

طيب صاحباتك.. واقفة جنبهم في مشاكلهم وبتتمسيلهم
الأعذار ولا لما ما بتردلكيش المكالمة مرتين ورا بعض بتشتكي
منها لصاحبتكوا الثانية..

مُدْرسة ولادك.. كل ما بتغلط بتروحي تشتكي مديرتها.. ولا
بتحتويها ومصاحباها وبتنهيها للغلط بطريقة لطيفة..

مديرتك في الشغل.. إسلوبك معاها بيخليكي كل ما تطلبي
منها أجازة بتديالك وبتعتذرلك لو ضغطت عليك في الشغل..
ولأ مستنيالك على غلطة عشان تنزل خصم..

طب مرات البواب بتجري عليك أول ما تشوفك عشان
بتقدرها لو تعبانة وبتدلعيها وهي عندك.. ولا بتستخبي منك
عشان ما بتبطلش شخط ونظر..

صاحبات بتك.. ييجروا ياخدوا رأيك في مشاكلهم عشان
انتي مصاحباهم ومحتواهم.. ولأ ييختاروا يتجمعوا في بيت تاني
عشان بيتك مش مريح بالنسبة لهم..

مرات ابنك بتجري عليك تشتكيلك منه عشان بتجيلها
حقها منه.. ولأ بتستعيز بالله وهي داخله بيتك عشان ما بتبطلش
تنقدي فيها وتعدي على اللي بتعمله؟

الكلام ده مش صح بنسبة 100% مش بينطبق على كل
الناس.. في ناس بتبقى اتعرضت في حياتها للحاجات كتير خلت
الي جواها كله وحش.. خلتهم يلغوا الزرار الحلو من زمان..
بس دول نسبتهم قليلة أوي.. بلاش نتحجج بيهم.. فقبل ما

نتهم الناس الي حوالينا إنهم وحشين وبيتدخلوا في حياتنا..
خلينا ندور على الزراير الحلوة الي حوالينا..

خلينا نلاقيها قبل ما نخسر ناس عشان ما عرفناش نتعامل
معاهم صح.. وناس تانية الي تكسبهم عشان عرفت تتعامل
ازاي المعاملة الصح.. أو عرفت تلاقي الزرار..

النداء الأخير



نداء لكل الأزواج اللي شايفين الحلو اللي في حياتهم مش
أكثر من الوحش..

نداء لكل الأزواج اللي شايفين نفسهم مش مبسوطين في
حياتهم بسبب أزواجهم..

اجمع هنا..

إنتوا فإيتكوا كثير..

فإيتكوا ممتع ربنا إداهالكوا وانتوا مش عايزين تستمتعوا
بيها..

وكل واحد فيكم قرر يغوص في حياة موازية ليه في شغله
وأصحابه وسقط الطرف الثاني من حساباته..

ماتفتكروا إنكوا كده ايجايين.. لما تعيشوا لنفسكوا
وتتسبطوا لنفسكوا.. لأ.. خالص مش هي دي الإيجابية.. دي

قمة السلبية إنك ترضى بوضع سيء في حياتك ومن غير ما
تغيره..

لأمين قال إن الوقت فات؟ لسه بدري..

هو مش لسة جوزك بيرجع ينام جنبك كل يوم..

ولا بيبات مع صحابه.. ولا سابلك البيت ومشي؟؟

هو مش انتي لسه اسمنك مراته؟ يبقى مهما كان فيه مشاكل

بينكوا هو لسه فيته حنة جواه عايزاكي..

لسه مستنيكي.. بس مش عارفين إيه الظروف اللي مخلصاه

مش عايز بيبدأ معاكي وتعيشوا من أول وجديد حياة كلها حب

وسعادة..

وبعدين مش انتي برضو من جواكي كده بتبقي غيرانة من

صاحبك اللي جوزها بيدلعه طول الوقت ويبجبلها هدايا

ويفسحها.. ماتعمليش نفسك مش واخدة بالك..

إنتي مش ناقصك حاجة عنها.. إنتي «أنثى» وفيكي كل

مقومات الأنوثة..

إزاي قابلة على نفسك علاقتك بجوزك تبقى بالشكل ده؟ ليه

مش عايزة ترضي غرورك كأنثي وتخلي جوزك يشوفك عشيقته

مش مراته.. مستنية إيه؟ لما تيجي واحدة غيرك بتعرف تتدلع

وتتياص وتعيشه يومين شهر يار ملك زمانه.. يقوم يحس إنه

متجوز الشاويش عطية؟

إنتي ممكن تبقي جنته على الأرض بس انتي كل الحكاية إنك
واحدة منه موقف عشان كام حاجة حصلت بينكو ازمان على
كام معاملة سيئة وعدم تقدير..

بس انتي لسة قدامك سنين كثير هتعيشيها معاه.. وفي إيدك
انتي الاختيار.. يا تبقي سنين نكد وقرف وتبقي متجوزة
بالإسم..

يا تبقي حبيبة وعشيقة عايشة مع حبيها في مكان واحد
بالحلال..

متيألي طالما انتي بتقري الكتاب ده.. ومكمله للآخر تبقي
شخصية إيجابية كفاية وبتختاري الاختيار الثاني.. ألف مبروك..
وانت؟

مش لسة مراتك بترجع كل يوم تلاقىها غاسلة لك هدمك
ومحضرة لك الأكل.. وواحدة بالها من ولادك..

مش لسه مابتعملش حاجة من غير إذنك وعلمك؟ مش
ساعات بتحس منها إنها لبت ده عشانك؟
وانها طبختلك اللي بتجبه..

حتى لو مكشرة وعاملة نفسها مش طابقاك وانك مابقتش
فارق معاها.. هي لسه من جواها عايزاك..

هي بس اتعرضت لضغوط منك كثير ومواقف كثير عدت
عليها جرحتها..

خلت البداية مش سهلة زي زمان..

محتاجة منك مجهود المرة دي عشان تغفرلك اللي حصل
زمان.. محتاجة بجد تحس إنها أميرتك.. وانك مش هتيجي
عليها وعلى حقوقها تاني..

محتاجة تقديرك.. وفخرك بيها.. محتاجة تحسسها إنها إنسانة
ناجحة..

ونجحت في شغلها.. ونجحت في تربيتها لولادك.. والحاجة
الوحيدة اللي فشلت فيها علاقتها بيك.. وده كان بأسباب
مشتركة بينكوا..

ممكن تعيد تقييم الموضوع مع نفسك.. هتلاقي إن خناقاتك
معها مش مهمة للدرجة إنك تكسر نفس أنثى وصاك عليها
ربك ونيك..

آه شوية الكراكيب اللي في البيت واللخبطة وعدم النظام
وحتى إهمالها في نفسها أو شغلها اللي بتحارب عشان تثبت فيه
لنفسها وللناس إنها نجحت في أي حاجة في حياتها مايسنوش
النكد والتوتر والرعب اللي انت معيشها فيه..

مش عارفين تبتدوا منين سوا.. نفسكوا انتوا الاتنين
ومكسوفين..؟

في ناس موجودين في حياتنا اسمهم life coach.. وفيه ناس
إسمهم استشاريين أسريين.. دول ناس اختاروا يشتغلوا إنهم
يدرّبوا الناس على الحياة من غير مشاكل.. اختار يعلموا الناس
إزاي يعيشوا سُعدا.. دول مش دكاترة نفسيين ومش بيدّوا

أدوية.. دول يعلوا وعينا وإدراكنا عشان حياتنا تبقى أحلى..
ويفتحوا لنا شباك نبص منه على الحياة الحلوة.. واحنا
بنختار نعدي منه ولأفضل عايشين في الضلمة..

مفيش حاجة في الدنيا ممكن تعوضكوا السنين اللي ضاعت
من عمركوا في النكد والحزن..

إلحقوا اللي باقي منكوا واستمتعوا بيه.. إنتوا مش أقل من
أي اتنين متجوزين وسُعدا في حياتهم.. إنتوا تقدرُوا تبقوا مكانهم
وزيهم وأحسن كمان..

حلوا مشاكلكوا من غير تدخلات الأهل.. خرجوهم برّه
الصورة تمامًا وقيمووا علاقتكوا سوا.. ساعات انتي بتكوني
قادرة تسامحي بس خايفة من منظرِك قُدَام مرات أخوكي..
وساعات إنت بتكون نفسك بتبدي معاها وترضيها بس
خايف من كلمة «هي ضحكت عليك تاني؟»

استغنوا عن الدنيا ببعض.. انحرروا من كل التدخلات السلبية
اللي بتحصل من الأهل والصحاب.. وابتدوا حياتكم من تاني.

التعويذة الثانية



- لو سألك مالِك احكي بسرعة.. لو قُلتِي مفيش..
هيصدقك..
- زي ما الراجل مرتبه رايح على ناس غيره.. فالست
صحتها رايحة على نفس الناس.
- امدحي فيه in public .. مشاكل كثيرة هتتحل
- ماينفعش تبقي طول الوقت «قايدة له صوابك العشرة
شمع» ماحدش هيتلسوع غيرك..
- نجاحك مسؤوليتك انتي بس.. مش مسئولية أهلك أو
جوزك أو صحابك..
- بطلي شكاوي.. مش لازم يشوفك ضعيفة.. دَوْرِي على
حلول لمشاكلك ونفذي..
- ماتخليش حد يعرف نقطة ضعفك.. أي حد.. ماتخليش
أصلاً عندك نقطة ضعف..

- استمتعي بكل حاجة بتعملها.. قاعدة في البيت استمتعي..
بتشتغلي استمتعي بشغلك.. ما عندكيش عيال.. استمتعي
بحُرَّتِك.. عندك عيال كثير استمتعي بدوشتهم وبلمَّتْهم
حواليكي..

- كل فترة.. رفهي عن نفسك.. دلعي نفسك.. يا بخروجة
حلوة مع صحباتك.. أو شوبنج ولبس جديد.. أو كوافير وspa..
- الرجل بيحب الست غامضة.. عندها أسرار..

- الرجل ما يحبش الست التعيسة.. ولا الضعيفة.. ممكن
يتعاطف معاها.. لكن مش هي عجب بيها.. فبالتالي مش هتملا
عينه..

- امدحيه.. حسسيه إنه حاجة كبيرة أوي في عينيكي.. وزى
النقد ما بيزعلك.. الرجل كمان ما يحبش حد ينقده.
- إوعي تجري ورا العيال بالشبشب قُدَّامه.. حتى لو عندهم
تطبيق بكرة..

الفصل الثامن

السجن . . والسجان

النساء أيضا كالشعوب.. إذا هن أردن الحياة فلا بد أن
يستجيب القدر

أحلام مستغاني

ربنا سبحانه وتعالى خلقنا مخيرين مش مسيرين..

وفرق كبير بين الاثنين.. لو إحنا مسيرين في الدنيا.. مش هتحاسب على أفعالنا..

بس عشان إحنا مخيرين.. وعندنا مطلق الحرية في جميع أفعالنا واختياراتنا.. ربنا هيحاسبنا على كل حاجة.. ومش هينفع يبقى لنا أي حجج أو أعذار يوم الحساب..

مفيش حاجة اسمها أصل حد أجبرني أو ماكانش قدامي حل ثاني..

كل أنثى مسلمة ربنا كرمها في الإسلام ووضع لها في القرآن قانون أحوال شخصية خاص بيها هي.. شروط لجوازها وضوابط زي المهر والإشهار عشان يحفظ حقوقها..

وشروط وهي متجوزة ازاي جوزها يعاملها وازاي يصرف عليها وازاي يعاشرها بالمعروف.. يعني حتى وهي مراته ماينف عش يعمل فيها اللي هو عايزه.. لأ فيه قوانين يمشي عليها.. وحتى إذا وفي كل حقوقها لو في يوم حست إنها مش بتحبه ليها كامل الحرية إنها تنفصل عنه.. وبرضو ماسابهاش كده.. لا حفظلها حقوقها بعد الطلاق.. من مصاريف وسكن وحقها في أولادها.. ومش بس كده.. ده كمان إداها كامل الحرية إنها تختار من ثاني زوج ثاني وتبتدي معاه من الأول..

الإسلام كمان حفظ للمرأة حقوقها في الميراث.. عشان يضمن لها حقها من أبوها وأخوها وابنها وأقرب الناس ليها..

الإسلام إدانا كل الأدوات الي إحنا محتاجينها عشان ماحدث
يجي على حقنا.. ونعيش سُعدا.. ونعيش بمزاجنا.. ده عشان
إحنا مخيرين.. ماسابش فرصة لحد إنه يتحكم في قراراتنا..

طيب ركزي معايا السطرين الجاين دول..

لو أنا أجبرت بنتي تسبب شخص بتجبه وتتجوز واحد
مستواه أحسن.. لو دارت بيها السنين وماكاتتش سعيدة مع
زوجها.. لو قابلت حبيبها ورجعت تكلمه.. مين هيتحاسب
على خيانتها دي.. أنا ولأهي؟

طيب لو أنا مدرّسة.. وزوجي أجبرني أسبب الشغل..
وسمعت كلامه.. عشر سنين زواج قاعدة في البيت.. عشر سنين
فراغ.. ممكن يحصل فيهم إيه.. كمية الذنوب الي هسيلها وانا
فاضية.. النم الي بيحصل كل يوم في مكالمات التليفون مع
صاحباتي.. مين هيتحاسب عليها.. أنا ولأزوجي؟

طيب ما أنا كان اختياري في الأول إني أشتغل.. ولو كنت
اشتغلت كنت هاخذ ثواب على كل طفل بعلمه حرف.. وكل
كورس خدته وكل كتاب بقراه عشان أطور من نفسي.. طيب
الحسنات الي كنت هاخذها لو اشتغلت.. هتروح لمين؟

طيب الضغط النفسي من الفراغ الي جالي وانا قاعدة في
البيت والي خلاني غصب عني طول الوقت ناقمة وبحقد على
صحابي الي نجحوا ومخيليني غصب عني في خناقات وعصيبة
مع زوجي وأولادي بيتفرجوا علينا بس..

ثقتهم بنفسهم اللي اتهمزت بسبب خناقاتنا.. بنتي اللي راحت
تشبع احتياجاتها العاطفية مع ناس ما أعرفهمش بَرّه للبيت..
ابني اللي شرب سجاير وبيقعد على القهوة أكثر مايقعد في
البيت..

مين هيتحاسب عليهم؟

البيت الكئيب المنفر لكل اللي فيه مين السبب فيه؟

كل واحد هيتحاسب على كل صغيرة وكبيرة.. ربنا خلقني
مسيرة.. وسهّل ليّا كل سبل الاختيار..
ربنا عايزنا نعيش أحرار.. ماחדش يتحكم فينا ويعيشنا
تعساء في حياتنا..

إوعي تستهوني في حق نفسك.. إوعي ربنا يخلقك حُرّة
وانتي تقوليله شكراً مش عايزة.. أنا هعيش عبد ذليل..

«يريدُ الله بِكُمْ اليُسْر ولا يريدُ بِكُمْ العُسْر»

«يريد الله أن يخفف عنكم»

حافظي على نفسك من أي عدوان خارجي.. ماتسييش حد
يئذيكي نفسياً.. يا إما تحطيلهم حدوديا تخزجهم بَرّه دايرة حياتك..
بس إوعي تسيبي نفسك وتعيشي في دور الضحية وتستسهلي
الشكاوي والحياة السلبية..

دور الضحية يتحول لإدمان بالوقت.. وهتلاقي نفسك بدل
ما كان شخص واحد بس اللي بيئذيكي نفسياً.. هتحولي كل

الأشخاص الي في دايرة حياتك لأشخاص بيئذوكني.. وده لأنهم
يا إما هيتسهلوا ضعفك فهيجوا عليكى.. يا إما هيزهقوا من
شكاويكى فهيهربوا منك..

ماتسييش نفسك سجينه لأفكارك ومعتقداتك الخاطئة..

ماتسجينش نفسك بمزاجك وتدي المفتاح لسجان قلبه مش
عليكى..

ما تعوديش نفسك على السجن والحبسة والحياة الناشفة
والزنزانة المهينة وتقولي أصلي خايفة لما أخرج برّه ما أعرفش
أعيش..

خليكى قوية واتحرري من سجنك..

«المسلم القوي خير عند الله من المسلم الضعيف»

ربنا ما يبجش الضعف والاستسلام والذل والهوان..

ربنا عايزنا نعيش مبسوطين مش في شقاء..

ودنيتك عمرها ما هتبقى حلوة إلا إذا إنتي قررتى ده..

وسعيتى لده..

«إن الله لا يغير ما بقوم حتى يغيروا ما بأنفسهم»

ربنا عايزنا سعداء.. خلقنا عشان نسهعد.. لو استسلمنا

للحزن واليأس والاكتئاب وقابلناه قبل ما نحس بنعمه ونعيش

فيها ونستمع بيها، أكيد هيحاسبنا.. وده أساس عمل الشيطان..

عايز يلهينا عن ذكر الله وحده.. فيدخلنا في مشاكل ويقنعنا إنها

مالهاش حل..

«الشیطان يعدكم الفقر» بس ربنا سبحانه وتعالى عايز يعيشنا
فی نعمة..

«طه ما أنزلنا عليك القرآن لتسقى»

یعني أنزله عشان نتبسط.. أنزل علينا القرآن لننعم
(أَحَبُّ الْأَعْمَالِ إِلَى اللَّهِ تَعَالَى سُورٌ تُدْخِلُهُ عَلَى مُسْلِمٍ)

«ولا تمهنوا ولا تحزنوا»

«اللهم إني أهوذبك من الهم والحزن»

سبحانه وتعالى بيقولك استعيني بيه عشان تخرجي من الهم
والحزن اللي انتي فيه..

بيقولك عيشي حرة وسعيدة..

عشان وقت الحساب هتتحاسبي حتى على النعم اللي انتي
عايشة فيها ومش عارفة تشوف فيها ولا فاكرة تحمدي ربك
عليها من كتر ما انتي أسيرة ومش شايفة غير الوجش اللي
في حياتك..

كَيْدَكَ عَظِيمٌ



حلو أوي إنك تكوني شخصية إيجابية..

كلامك كله حلو.. ولسانك بينقط عسل.. ومتسامحة..
ومثالية.. وقلبك كبيير وبتحبي كل الناس..

مش ده الكلام اللي مدرين التنمية البشرية دايمًا بيقولوك
عليه؟

طيب أقولك على سر.. وربنا يساعني عليه بقي..

في ناس ما بينفعش معاهم المثالية والإيجابية العالية دي..

في ناس بيقوا كارهينا كده من غير سبب..

في ناس فعلاً مفيش فائدة فيهم..

في ناس الغيرة بتخليهم عندهم استعداد يبوظوا حياتنا..

لمجرد إن عندنا حاجة مش عندهم..

في ناس لو عاملناهم بالطريقة دي.. هيفتكروها ضعف..

وهيجوا علينا أكثر..

هي دي طبعا وسيلة عبقرية لكسب الناس..

وانك تأثري بيها قلب أي حد..

بس بعد ماتجربيهما وتلاقيني ان الناس دي مفرقش معاهم

حاجة..

في الحالة دي لازم خطة بديلة..

خطة توقف الناس اللي بتيجي على حقوقنا عند حدهم..

خطة تبطلهم يسألوا أسئلة ماتخصهمش..

خطة تخليهم يبطلوا يتدخلوا في حياتنا..

أو ينصحونا نصايح تحقلهم مصالح..

خطة تخليهم مايركزوش معنا في تفاصيل حياتنا..

خطة تخلي كل واحد غيران منا.. يبعد عننا أحسنه

طيب إيه هي الخطة دي؟

أولاً.. ماتكسفيش.. خليكلي واضحة وصريحة..

أصري على موقفك.. مهما حصل.. ما تغيريش رأيك أو

ترجعي في كلامك نتيجة لإلحاح حد..

لما حد يسألك سؤال انتي شايفة إنه ما يخصهوش.. ردي

عليه بـ «هو انت عايز تعرف ليه؟» أو «بتسأل ليه؟» مع ابتسامة

سخيفة كده.

لما حد يرمي كلام يقصد بيه معنى بعيد عشان يضايقك..

ماتعديهوش.. وقفي الحوار واسأليه «تقصد إيه بالكلام ده؟»
مرة في مرة هيفهم إنك جريئة وممكن تحرجيه فهيطل..
إوعي تحرجي من شخص قاصد يضايقك.. لازم تحطيله
حدود.. وتعرفيه إنك مش سهلة وانك مابتنازليش عن حقك..
إوعي تسمح لي لحد ياخذ حاجة بتاعتك أو حق من حقوقك
غصب عنك لمجرد إنه غيران منك.. وانتي مكسوفة منه..
الناس دي في الغالب مش بيكرهوا أذ ابتسامتك.. وشياكتك..
وثقتك في نفسك.. ودلعك..

الناس دي مش عايزاكي مبسوفة.. فاتبسطي

مش عايزاكي ناجحة.. فانجحي

عايزة تملأ حياتك مشاكل.. فخليكي ذكية

ده مش مقال هجومي.. لأ خالص..

بس أنا مش عايزة حد يستنزف طاقتك..

ولا يملأكي طاقة سلبية..

مش عايزة طاقتك الإبداعية تتبدد نتيجة لإنك محروق دمك

من تلميح سخيف أو سؤال أخرجك أو حركة نكدت عليك..

عايزاكي تستغلي كل طاقتك الإبداعية دي.. في إنك توفقيهم

عند حدهم..

الهدف الأول.. إنك تبقي سعيدة في حياتك.. ومستمتعة..

مش إنك تعيشي ضحية و تفضلي تشتكي من اللي جاي على
حقوقك و منكدي عليك و خلاص ..

مش عايزة تاني ولا شكوي من أي واحدة إن فيه واحدة
قربتها منكدة عليها حياتها ..

وافتكري دايمًا ..

إن كيدكن عظيم .

العلاقة فيها سُم قاتل



لو بتوتري أول ماتشوفي missed call منه.. وتقعدي تحضري
المبررات اللي هتقوليهاله عشان ماشفتيش مكالمته.. وتحلفي..
ويمكن برضو ما يصدقش وتبقى خناقة..

لو بتخرجي مع صاحباتك بعد محايلات كتيرة.. وكل أربع
خروجات تضيع عليك يوافق مرة.. لو هو اللي بيحددلك
المكان اللي هتقابلوا فيه.. والوقت اللي هترجعوا فيه.. واللبس
اللي هتروحي بيه.. لو لازم هو اللي يوديكي ويجيبك.. ويكلمك
كل ربع ساعة..

ولو لاقيتي نفسك بعد كل خروجة بتحلفي على كل حاجة
حصلت وقت الخروجة.. وإنك مضطرة تصالحيه يومين بعد كل
خروجة على حاجة انتي مش عارفها..

لو بتفكري ألف مرة قبل ماتحكيه حاجة بتدور في دماغك..
حتى لو حاجة تضحك.. عشان في الآخر هيقولك وانتي قلتي
كده ليه أصلاً.. وإيه اللي وداكي هناك.. وإيه اللي خلاكي

تعملي كده.. وكل ده حصل إمتى.. وماقُلتليش ليه..
لو رافض إنك تشتغلي.. أو تاخدي كورس.. أو تتعلمي
حاجة جديدة.. أو يبقى ليكي أي مصدر دخل ليكي غيره هو..
لو بيسألك على كل جنيه معاكي صرفته فياايه..
مش بخل.. بس عشان يتظمن..

لو ال passwords بتاعتت موبايلك وال accounts بتاعتك وال
emails كلها معاه ويعمل جرد بصفة دورية من غير مايزهق..
لو بيغير من أقرب صديقة ليكي.. لو بيتضايق لو ضحكتي
على حاجة هو مقالهاش.. لو بيسألك على السواق.. وأخو
صاحبتك.. وصاحب أخوكي.. لو بيسألك على قرابيك..
وبيتخفق من كل دول..

لو كل مناسبة حلوة بتقلب نكد..
لو كل الناس اللي بتحبهم مش بيتزلوله من زور..
لو كل خناقة بيغلط فيكي ويرجع يعتذر ويقولك آخر مرة..
لو شخصيتك بتتغير في وجوده.. وبتبقى متوترة وأعصابك
مشدودة وخايفة لأحسن تغلطي وتقلب خناقة..
لو دايمًا بينقد أفعالك وكلامك.. وبيعدّل عليك في كل حاجة..
لو بيقلل منك..

لو كل صحابك بيحذروكي منه.. وبيدعولك تخلصي منه على
خير..

لو العلامات دي موجودة في خطيبك.. أو الشخص اللي
هترتبطي بيه.. اعرفي إنها علاقة سامة.. هتقتلك.. وهتقتل كل
الحب اللي جواكي ليه..

الناس اللي في العلاقات السامة.. مايعرفوش.. ومايشفوش..
وماياخدوش بالهم غير بعد أول نفس بياخدوه لما العلاقة دي
تتتهي..

ساعتها بس بيعرفوا إنها كانت علاقة سامة.. وإنهم اتكتبلهم
عمر جديد.. وهي عيشوا من تاني.. حياة أحلى.

أكبر مصدر للطاقة السلبية



عارفين إيه هو أكبر مصدر للطاقة السلبية؟

إنه يكون فيه شخص.. دائم.. مفروض عليك في حياتك..
ومنكد عليك عيشتك..

يعني تلاقي نفسك وانت في واقفة تحت الدش أو في أقصى
لحظات استرخائك.. بدل ما تخطي لمستقبلك وتفكري في
حياتك.. تتخانقي في حوار وهمي مع الشخص ده.. وتردي
وتقوليله وتفهميه.. بينك وبين نفسك..

يعني وانت في نايمة وفي أحلى نومة تحلمي إنه حصله وجراله
وتاخدي حقتك كله منه..

يعني وانت في بتصلي بدل ما تدعي ربنا بالجنة والستر وحسن
الخاتمة.. تلاقي نفسك بتدعي ربنا يعديها على خير أو ربنا
يكفيكي شره..

يعني لو كلمتي صاحبتك في التليفون أو خرجتني معاها
ساعتين، هتفضلتي تشتكي من الشخص ده وتحكيلها على كل
المواقف السيئة اللي عملها فيكي..

يعني فكرك وحياتك كلها تبلور حوالين الشخص ده..

تلاقي نفسك بتعملي حاجات انتي مش عايزاها.. وتكرهي
حاجات وأماكن كتتي بتحبيها..

٢٤ ساعة بتفكري في الشخص ده والمواقف اللي بتحصل
وشايلة هم حاجات كتير أوي..

لما بنوصل للمرحلة دي.. بيبقى عشان الشخص ده للأسف
قريب مننا أوي..

زوج.. حما.. أخت زوج.. طليق.. مرات أخ.. مرات أب..

طيب والحل إيه..؟

أول حاجة.. ثقتك بنفسك..

عايزاها تكبر وتكسر الدنيا..

عايزاكي حلوة.. حلوة أوي..

تحبنة خسي..

رفيعة اتخني..

شعرك شوفي حل معاها..

ضعيفة في حاجة قويها..

عارفة أكثر حاجة بتعلي الثقة في النفس إيه؟

إنك تتعلمي حاجة جديدة..

خدي كورس.. تنمية ذاتية

اتعلمي انجليزي أو فرنساوي.. أو صيني

تريكو أو كروشيه..

اتعلمي أي حاجة هتزوّد ثقتك في نفسك جدًّا.. وتغيّر نظرت

اللي حواليك فيكي..

جوزك قافل عليك وحاسك بين أربع حيطان؟ كل

الكورسات دي ليها فيديوهات على اليوتيوب.. دوري واتعلمي..

الحاجة الثانية.. افصلي..

أبوه افصلي خالص بين حياتك الشخصية والشخص ده..

ماتفكرش فيه.. ماتحكيش لحد عليه..

الوقت اللي الشخص ده معاك في فيه.. عديه وخلص..

اعتبري نفسك بتحلمي..

وأول ما يمشي.. اتخزمي وارقصي وغني.. ارسمي.. اكتبني

اضحكي..

واعتبري نفسك صحيتي..

بس إياكي واستنزاف الطاقة والمشاعر..

بلاش يجي في تفكيرك وانت بتقري كتابك.. أو وانت في

شغلك، أو مع صحابك.. أو حتى تحلمي بيه وانت نايمة..

يا كده يا إما تجمدي وتأخدي القرار إنك ماتشوفيهوش أو
ماتشوفيهاش تاني.. أيا كانت العواقب..
هتبقى صعبة في الأول.. وهتتحل بعد كده..
بس أهم حاجة.. ماتستفريش طاقتك أبداً..
إوعي كمية الطاقة السلبية اللي معيشة نفسك فيها تغير من
شخصيتك.. وتملاكي حقد وكرهية.. وتموت الإبداع والخير
اللي جواكي..
طاقتك.. حافظي عليها..
عشان ما حدش هينفعك لما يجيلك ضغط وسكر ومرارة
وجالطة لا قدر الله..

الأسنان اللبنية



الطفل أول ما يتم ست أو سبع سنين يبدأ يغير أسنانه
اللبنية..

أول ما يعرف من أصحابه إن سنانه هتقع بيبقى مش
مصدق..

ولما تبدأ سته تتلخلخ بيبقى مرعوب..

لحد اللحظة اللي بيكسر فيها سته ويصرخ..

وبعدين بيتبه إن الوجد مكانش كبير أوي للدرجة الخوف
دي.. بس دايمًا بيبقى حاسس بالفراغ اللي سابته السنة اللي
اتخلعت..

وكل شوية لسانه يروح عليها ويتأكد إنها فعلاً مش
موجودة..

ده اللي بيحصل بالظبط لأي بنت بتسيب واحد بتجه..

في الأول بتبقى مش مصدقة.. ولما بتبتدي العلاقة تبوظ
وتتأكد إنها خلاص هتخلع.. بتبقى مرعوبة.. لحد يوم الوداع..

ممكن تصرخ من الألم.. وبعد شوية بتحس إن الألم ماكانش فظيع
أوي.. بس الفراغ بيبقى واضح.. وحاسين بيه أوي..

البنات لو كملت مع الشخص الغلط لمجرد إنها بتجبه..
هتبقى عاملة زي الطفل اللي بيكمل حياته بسنته اللبينة..

تخيلوا راجل بأسنان لبينة.. هتستحمل معاه؟

ولأكل شوية هتتكسر منها حته.. ويبقى عايش حياته مرگز
بس مع السنّة دي لحسن يعمل حركة غلط فتوجهه..

ويتنازل عن أكل كبير كان بيعجبه.. بس سنته أجبرته على
كده.. هيعمل إيه ما هو لازم يعيش.. بس هيعيش موجه..
عشان قرر يكمل حياته بسنة مش على مقاسه..

وساعات الشخص اللي بنسيه بيبقى عامل زي ضرس العقل..
ليه جذور عميقة.. وألم فظيع وقت الخلع.. عشان داخل في كل
تفاصيل حياتنا وكل علاقاتنا.. بس ده بقى لو سبناه.. بيبقى ألم
مستمر.. وبيأثر على باقي السنان كلها.. وبتعيشي في ألم ووجع
فترة أطول..

الغريب إن ده بالذات بعد شوية بتحسي إنه ولا كأنه كان
موجود.. والفراغ اللي سابه مش ملحوظ..

ومش باين غير ليكي انتي..

ده تحديد اسم «وجع ساعة ولا كل ساعة»

اتوجعي شوية وعيشي حياتك طبيعية بعد كده.. أفضل كثير
ماتعيشي طول عمرك موجه..

بالمناسبة.. السُّنة اللبينة بيطلع غيرها.. وضرر العقل فيه
بداله ضرر كبير ممكن تقوم بدوره..
بس أهم حاجة إوعي تعيشي بسنة مش على مقاسك
وماتناسبش طموحاتك وقدراتك.. إوعي خوفك من الوجد
يخليكي تعيشي بيه عمرك كله.

التسامح

إحساس الظلم وحش أوي..
إنك تعيشي بإحساس الظلم طول حياتك كأنك بتجر جري
معاكي شيلة كبيرة وتقيلة..
بس عجرة تطلعي وتنزلي وتروحي وتيجي بيها في جميع
مراحل حياتك..
الطفلة اللي ظلمتها مرات ابوها..
والشاب اللي عمه خد ورثه..
البنات اللي اجبرت تدخل كلية مش بتحبها عشان بس قريبة
من بيتهم..
والبنات اللي اتفر كشت خطوبتها غصب عنها عشان قايمة
ولا شبكة ولا فرح..
إحساس الخيانة من أقرب الناس..

الست اللي اتنازلت عن مؤخرها وبيتها وعفشها عشان
تخلص من زوج مايراعيش ربنا فيها..

الأم اللي اتحرمت من ولاد. ابنها عشان مراته مابتحبهاش..
والأب اللي مايعرفش حاجة عن ولاده اللي طليقتة مخياهم
عنه.. واللي اتنصب عليه في تحويشة عمره..
واللي اتسرق ذهبها..

كل موقف من دول ممكن يكون صاحبه بيعيش نفس
الإحساس بتاع أول مرة كل مايفتكراه.. كل مرة يحس بنفس
العدوان والظلم والقهر.. نفس الشيلة الثقيلة اللي شايلها على
كتافه شوية ومجرجها وراه شوية..

بس الشيلة دي مش هتخليكي تتحركي من مكانك..
هتعتلك.. وهيفوتك حاجات كتير وتضيع منك فرص كتير..
مشاعر الكره والغضب بتشغل حيز كبير أوي في عقل الإنسان..
مش بيسيب أي مساحة للفن والإبداع.. الإبداع محتاج روح
متحررة.. خفيفة.. والفن عايز ذهن صافي.. ومشاعر إيجابية..
وعشان تخرج من مشاعر الألم والمعاناة مفيش طريق غير
التسامح..

التسامح هو اللي هيخليك ترتفع بمستوى طاقة روحك
لمستوى أعلى.. فهيجررك من كل المشاعر السلبية.. ويجل
مكانها مشاعر إيجابية بالطمأنينة والراحة.. فهيفتح مجال للراحة
وللإبداع والسعادة.. اللي مش ممكن توصلها من غير تسامح..

وعشان نوصل لمرحلة التسامح.. لازم نبقى مقتنعين إن «كل إنسان له وجهة نظرة إيجابية فيما يفعل»

اللي سرقك كان عايز يأكل ولاده أو يرفع من مستواهم..

اللي اتكلمت عليك من ورا ضهرك نفسها تحس إنها مهمة..

جوزك بيتحكم فيكي عشان خايف تضيعي منه..

اللي بوظلك شغلك كان عايز ينتقم منك عشان كرامته اللي

انت بعزفتها بتريقتك عليه قُدَّام زمايله..

ماتحكمش على حد ظلمك مهما كان السلوك اللي آذاك بيه..

عشان الدوافع لو عرفناها هيصعبوا علينا.. واللي لازم نفضل

فاكرينه.. إن ربنا أمرنا بالتسامح في جميع الأديان السماوية..

طيب ليه؟ عشان يشق علينا؟ لأ عشان هو اللي خلقنا وعارف

إننا مش هنعرف نستحمل نعيش بكل الكره والحقد والرغبة

في الانتقام اللي جوانا.. قالنا نسامح عشاننا إحنا.. عشان حياتنا

إحنا تبقى أحلى..

تحت السيطرة



أي حد يبحاول يأثر على مشاعر وإحساسك عشان يقنعك
بأفكاره.. يبقى بيتتهك مشاعرك..
أي حد بيضغط عليك عاطفياً ويقولك.. ما انتي لو كنتي
بتحبيني كنتي اتغيرتي عشاني..
ما انتي لو بتثقي فيا كنتي سمعتي كلامي..
ما انتي لو بتحترميني كنتي خدتي رأيي..
ما انتي لو باقية علياً كنتي سيبتي شغلك عشاني..
لو عملتي كده تاني همشي ومش هتعرفي توصليلي.. لو
ماسمعتيش كلامي أنا هوريكي..
إنتي أصلاً ماتستحقيش أي حاجة حلوة بعملهاالك..
هو انتي فاكرة نفسك حاجة..
ده اسمه استغلال.. وانتهاك.. وتلاعب بالمشاعر..
بس ما حدش يقدر ينتهك مشاعرك إلا برضاكي وبإذتك..

إنتي اللي بتسمحيله يتلاعب بأفكارك ومشاعرك.. والطريقة
الوحيدة اللي تقدر بيها نمنع أي حد من استغلال مشاعرنا
والتلاعب بيها.. إننا يبقى عندنا وعي.. وعي بمشاعرنا
الداخلية.. ووعي بسلوكيات الناس اللي حوالينا.. ووعي
بالكلام اللي بيتقالنا وتأثيره علينا.. ماتسمحيش أبدًا لأي
شخص إنه يشيلك مسئولية مشاعره السلبية.. خوفه.. قلقه..
غيرته.. عدم ثقته في نفسه..

ماتسييهوش يزرع جواكي أفكاره المريضة عشان يحسك
إنك مذنبه ومقصرة أو ضعيفة أو ماتستاهلش وبالتالي يتحكم
في سلوكياتك لمصلحته الشخصية.. ماتسييهوش يغير المسميات
ويقنعك بيها..

ماتسيينش حد يستغل طبيبتك أو ضعفك أو خوفك أو حتى
تعاطفك..

مشاعرك نتيجة أفكارك انتي بس مش كلام ولا سلوكيات
الآخرين.. ساعتها بس هتعيشي في سلام داخلي وأحاسيس
حارة ومشاعر إيجابية.

- طيب إزاي ممكن امنع حد من التلاعب بمشاعري؟

- بإنك توقفه عند حده.

- بس إحنا قلنا إن ماينفعش أسيطر على سلوكيات حد.. -

ماهو انتي مش هتسيطري على سلوكياته هو.. إنتي هتسيطري
على أفكارك إنتي وسلوكياتك إنتي.

- إزاي؟

-أولاً عن طريق أفكارك إنك تكوني مقتنعة إنك مش
مستولة عن مشاعر أي حد.. فلما حد يقولك أنا بزعل أوي
إنك مش بتكلميني كثير.. ماتحسسيش نفسك بالذنب.. ولما
حد يقولك انتي ماتستاھليش.. ماتصدقيهوش.. لأنك متأكدة
من جواكي إنك تستاهلي.. اللي يقولك انتي مش حلوة.. ده
معناه إنه عايز يقلل منك أو إن ذوقه مختلف.. بس انتي حلوة..
اللي يقولك لو كتتي بتحيني كتتي سمعتي كلامي.. تقولي لا
عادي ممكن أحبك من غير ما أسمع الكلام طالما مش مقتنعة
بیه.. إنتي كده سيطرتي على أفكارك..

ثانياً عن طريق سلوكياتك: وده بيكون عن طريق إنك تحطي
عواقب للي يتخطي حدوده معاكي..

«أنا هوريكي»

لو فضلت تهدني كل شوية أنا مش هرد تاني على
تليفوناتك..

لو اتريقت علياً قدام أهلك أنا هضطر ما أجيش معاك..
لو اتأخرت على معادك معايا أنا هضطر أمشي..

تنفيذك للعواقب هيخليهم يحفظوا حدودهم.. كده انتي
سيطرتي على سلوكياتك انتي مش سلوكيات الطرف الثاني..

كده انتي رسمتي حدودك ومنعتي أي حد إنه يتخطاها..

كدة انتي حرة..

ومش تحت سيطرة أي شخص مريض..

الفصل الأخير

النهاية

النصيحة لازم نفهمها صح قبل ماننفيذها.. وإلا كنا
كلنا سينابون عشان القرفة بتخسس
ندى ترك

الطلسم



سمعت آخر خبر؟

التمثال اللي لقوه في المطرية محفور على رجليه طلسم..

الطلسم ده عبارة عن أربع حروف في دايرة من ذهب شبه
دبلة الخطوبة والحروف «ق ا ل ط»

الخبرا والمتخصصين.. عشان يفكوا الطلسم.. كان لازم
يستعينوا بهارد الجن وخادم الحب «شفثشي» عشان يترجمنا
الطلسم..

المارد قال.. اقروا الحروف بالعكس هتفهموا معناه..

«ط ل ا ق»

يانهار.. ده معناه إن إحنا معمولنا عمل.. الشعب المصري
معموله عمل بالطلاق.. ياساتر استر..

فعلاً في الفترة الأخيرة.. نُص اللي اتجوزوا اتطلقوا.. أيوه
نُصهم.. ده قرار الطلاق بالنسبة للبنات بقى أسهل من قرار

قص شعرهم بكثير.. أما بالنسبة للولاد قرار الطلاق بقى
أسهل من إجابة سؤال «هناكل إيه النهارده؟» وكانت النتيجة
إن فيه حالة طلاق كل ٦ دقائق.. وإن ٤٠٪ من اللي اتجوزا
بيتطلقوا.. تصدقوا؟

ده مش كلامي.. ده كلام الجهاز المركزي للتعبئة والإحصاء..
النسبة دي مرعبة بجد.. دول مش رقمين جنب بعض وخلاص..
لأ النسبة دي بتمثل حاجات كتير أوي.. وارتب عليها حاجات
أكثر.. ارتب عليها نسبة الزواج الثاني والخيانة الزوجية..
وارتب عليها كمان نسبة مشاهدة الأفلام الإباحية.. النسبة دي
ارتب عليها تشتيت الأطفال وأمراضهم النفسية..

النسبة دي ارتب عليها فوبيا الزواج.. والعنوسة..
عشان كده لازم نلاقى حل.. لازم نلاقى التعويذة.. اللي
هنفك بيها الطلسم..

فيه ناس كتير بدأت تاخذ خطوات جدية..
ناس راحوا خدوا كورسات استشارات زوجية..
وناس قالت لأ إحنا نعمل قانون نلغي فيه الطلاق الشفهي
خالص..

فيه ناس قالت إحنا بلاش نتجوز أسهل..
وناس تانية قالت إحنا نعمل قانون حضانة الأطفال للأب
في حالة زواج الأم.. وبكده نضمن إنها ماتطلقش أصلاً..

واللي قال نلغي الشبكة عشان الناس تقبل على الجواز فنسبة
الجواز هي اللي تزيد..

وفيه اللي بيسلط الأضواء على مشاكل المطلقات عشان يكره
الستات في الطلاق..

وبين ده وده.. الحب كده.. مش عايضة كلام.. على رأي الست
أم كلثوم..

عشان تنعم بالحب في الحياة مع مراتك ومع زوجك لازم
تفك الطلسم بنفسك.. الطلسم الخاص بك أنت..

أصل الطلسم ده موجود في دماغنا إحنا بس.. في طريقة
تفكيرنا.. في معتقداتنا الخاطئة والمواريث اللي اترينا عليها..

بس بمجرد قراءتك التعويذة.. «تعويذة شفثي» الكتاب اللي
بين إيديك ده بتركيز وبفهم ما بين السطور هتعرف لوحدك

تحدد إيه هي معتقداتك الغلط اللي فعلاً مآثرة على علاقتك
بشريك حياتك.. ومعطلة استمتاعك بحياتك الزوجية..

جاري تحميل التعويذة..

جاري التحميل..

تم فك الطلسم بنجاح

ندى ترك

الفهرس

١٣	الفصل الأول (الحياة بأعلى جودة).....
22	عائش ومش عائش.....
24	ال Touch بتاعنا.....
28	أيام ثانوي.....
30	ال Inner peace.....
٣٥	الفصل الثاني (اكسر تابوه).....
42	ما أنزل الله بها من سلطان.....
45	المسيطر اقتصاديًا.....
48	جُوه الصندوق.....
52	مش هنعيرى العالم.....
56	بكرة.....
٥٩	الفصل الثالث (داسها القطر).....
66	سنة أولى جواز.....
70	الدوبامين.....
73	تعلیم السواقه.....
76	ماري منيب.....
81	فتى أحلامي.....

85 في قبضة يدي
87 التعويذة الأولى
٨٩ الفصل الرابع (مارلين مونرو)
98 القوة الناعمة
101 الضيف
106 الأحمر العنابي
108 الست قليلة الحيلة
١١١ الفصل الخامس (فك شفرة الرجالة)
118 من وراء القُدَّام
122 أقرب طريق لقلب الراجل
122 معدته
125 الرجالة كلهم زي بعض
127 قَدَّمي طلب
١٣١ الفصل السادس (فك شفرة الستات)
136 مالهاش مزاج
139 الفيس بوك
142 صيانة العشر تلاف
144 غيورة ولا مادية
148 المأذون
١٥١ الفصل السابع (الشئون الداخلية للبلاد)

156	الطاعة العمياء
159	هذا ما وجدنا عليه آباءنا
162	الزُّرَّار
166	النَّدَاءُ الأَخِير
171	التعويدة الثانية
١٧٣	الفصل الثامن (السجن والسجان)
180	كَيْدِ كَنْ عَظِيم
184	العلاقة فيها سُومٌ قاتل
187	أكبر مصدر للطاقة السلبية
191	الأسنان اللبنية
194	التسامح
197	تحت السيطرة
٢٠١	الفصل الأخير (النهاية)
203	الطلسم

تعويذة شففتشي

بين إيديكي تعويذة سحرية..

تقدري تستخدمها لفك شفرة الحياة
الإيجابية..

وطلسم الحياة الزوجية..

رحلة عجيبة كلها أسرار خفية..

هتشربي فيها مشروب الطاقة الأنثوية..

وتحصلي على أكبر قوة ناعمة.. ذاتية

شففتشي.. كتاب الأسرار..

ممنوع تداوله بين المخلوقات الذكورية..

ندى ترك

علاف: مزارين